

徐大臨先生選

小南邨集

芳潤堂藏板



慕古人之志行誦其言往往想見其居遊之跡若身與之晨夕而習聞其緒論非古今之遂相及也亦得古人之意而已陶淵明古之高士其清真澹泊得於性形於詩千載而下慕其爲人則欲學其詩而卒未有及者蓋淵明之詩淵明之志行爲之也區區以文辭擬之固矣金子最木近輯訓倡之詩凡六人人各爲卷取淵明移居詩句總曰小南邨集屬予審定且請爲之序集中之詩未知於淵明何如然諸君皆能不汨於榮利不錮於嗜欲屏氛囂而味虛白相與放懷於琴觴山水間陶冶性靈流連節序各有所自得不爲轆轤失職悼道憫俗之言庶幾善學淵明而得其意者歟吳中風雅代興如

松陵北郭最著奚獨有慕於南邨蓋襲美以郡寮與山
澤友旋又散去青丘諸公多不終其節孰若南邨素心
人名氏即不可考大率如劉遺民之徒超然世網與淵
明合志奇文疑義相與賞析此最木所爲尚友也然自
古曠達之士彼其中或不自得有託而逃焉若淵明非
徒恥事二姓抗高世之節而已其天資近道不害於飢
渴而自得所樂故因閒觀時因靜照物因時起志因物
發詠其言皆道也諸君幸生太平無事之世亦能無待
於外而自樂其樂春醪共撫情話永日停雲之思也顧
惜景光追探墳典榮木之志也風日閑美班坐臨望斜
川之遊也以視淵明殆曠世一契矣最木且曰吾夙好

林泉久厭喧襍將謀十畝之園於山水佳絕處栽花種
竹仿陶九成遺意命之曰小南邨與同志樂之然則其
寄託也愈遠吟詠愈益多予將扁舟相訪從諸君以遊
於小南邨有日矣爲書以竢之康熙庚寅七月朔同學
徐昂發

小南邨集總目

朱襄

崑山 徐昂發 大臨 選

漫與詩彙四十三首

蔣夢蘭

香山詩彙七十二首

金國棟

芳潤堂詩彙八十八首

繆宗儼

桐邨詩彙五十九首

秦應陽

草草亭詩彙七十一首

繆嗣寅

曉谷詩彙五十三首

無錫朱君贊皇以詩名久矣有一亭雲漫與二集漫與集蓋丁丑以來往來蘇杭間與同人相酬答之作杭則止於予青蘿書屋蘇則止於金君最木芳潤堂也比年贊皇著易章一書精思致功以故詩不多作作必斂其才以歸於法每吟哦累日而後成及其成也又歉然若不獲如其志所欲言刪存四十餘首乃取少陵老去詩篇渾漫與之句以顏之此贊皇詩志也然其法亦於是乎在矣最木將爲梓之予不揣而序之如此至一亭雲集則蔣京少輦下和鳴集王景州離珠集黃交三名家詩衡皆選刻紅蘭主人又附刻玉池生彙後故不復錄云康熙庚寅清和月錢塘同學弟吳焯

漫與詩彙

題墨蕉

無錫 朱 襄 嘯園

懷素學書無紙學種得芭蕉恣揮霍無有一葉無龍蛇
只待春雷飛碧落雨師進灑何太迂枉教水墨皆模餽
綠天真蹟誰能賞數萬株中此一株

立秋前一日隱綠軒雨中讌集分韻

同顧爾立關敬扉
戴坤金龔季栗顧

倚平汪紫滄錢亮功倪仲珮蔣丹蘭潘
在之徐南皋桑玉傳陳宗岱尚端文

折簡招邀在帝京滿城煙雨幾時晴門前馬畏泥塗滑
座上人誇暑氣清雲破簷花流夕照風回庭樹作秋聲
天涯投分能如此應笑乘車戴笠盟

合歡花底思冥冥蹤迹渾如泛海萍喜共名流分少長
擬將良會入丹青微軀那得屠龍技老眼難憑相鶴經
美酒百壺供嘯傲只宜沉醉不宜醒

七夕尚櫟山留飲南枝草堂用温李韻

促席留歡值早秋尊前畫角起城樓何來夜氣却如水
微露月明猶似鉤因向人間說天上爭教駮女嫁癡牛
他年縱得乘槎便清淺星河未足遊

神光暮合曉還離所喜逢秋不失期此夜常爲花燭夜
幾時纔是倡隨時流螢點點湘簾暗促織聲聲禁漏遲
應笑南枝草堂上直將清恨託烏絲

送鄭爾諧

宴月遊花比夢間秋來春去幾開顏文名舊熟傳吳苑
道術新知在霍山萬卷堂前孤客迴百花洲上一人還
相逢同學如相問謂劉介子何吧
瞻顧俠君諸子爲說年時此閉關

題柴胥山舉觴圖

君不見婆婆娑桂樹栽何時花開亦受秋風吹三年一度
許攀折若箇心中無一枝借問蟠根在何所云在廣寒
清虛府廣寒清虛府絕奇一盈一闕當三五朔會望衡
不記年唯共義馭相周旋東西進與退不敢清晝懸相
傳是陰精非然蹤迹胡爲然昔有有窮后羿滔天惡阿
母賜以無死藥其妻姮娥竊以奔獨向西行此焉託此
中誰信有深宮七寶樓臺處處通祕藏八萬二千修月

戶磨琢周遭上下俱玲瓏姮娥得安居其樂一何極凌
晨拂鏡照空見好顏色位置證上仙寧忘結髮情欲歸
歸路斷幽恨終難平有時卸却窈窕妝化為蟾蜍仰首
嗚嗚聲類蛙聲驚動海底蝦蟆精蝦蟆何由知委曲宣
言此物亂吾族千回吞食總不能手脚爬沙但馳逐一
片相思心唯有顧兔知乞求司杵白搗藥不少遲雖云
不少遲藥成竟無期老桂憑依作巢穴暗肆奸欺不堪
說芳名本是待才人幾見有才空手折人世喧喧起謗
言負才未免長負冤冤氣衝天天帝怒特敕吳剛斫以
斧隨創隨合真所稀一木與天敢抗違依然開花復結
子散在煙霄著處飛至今西湖靈隱寺拾得光怪如珠

璣湖濱一才子姓柴號胥山錦繡為心腸猶事誦讀間
經史倚丹梯謂可緣躋攀去年文戰推飛將失意歸來
氣空旺蕭條三徑天霜秋嫩菊含葩笑相向七尺無聊
付畫圖圖中有酒容疎放舉觴只解望青天不知月上
青天上月上青天可奈何桂枝重長也應多請將白眼
回青眼看取狂夫一曲歌

集恬菴上人烏石山房分韻

同徐子凝蔣靜山翁允大
陳亦昭錢古玉張履佳

烏石峰頭是碧霄攜朋同上喜非遙新茶為客偏停采
嫩筍呼童更特燒雲起湖中聞過雨江從山外見驚潮
吾師有此清涼境始信松間不可招

紅蘭主人築松間草堂
擬留師住故未句及之

題吳尺鳧樓居圖

繡園樓在畫中看架有藏書讀未完眼見梧桐高百尺
憑他長過碧闌干

性愛吟詩事事幽兩間奇秘足冥搜如君名滿西湖上
誰識終年不下樓

張朗山招集雲居分體得七古

同毛鶴舫先生錢景舒嚴學川暨心學風遠二上人

是集洪昉思以病不赴

雲居山有趺翠之山房乃是中峰禪師古道場梅花百
咏久傳誦思之齒頰猶餘香今有風上人彈琴妙無比
聲固不在絃音亦不在指朗山邀我去訪之因循半載
空爾思况復走使折簡召背蹋烈日行步遲冥濛樹木
暗山口上山入門時過酉稗畦主人病不赴鶴舫先生

到已久主賓握手無俗情開牕脫衣尊酒清一枝紅燭
照談笑那論撲面蚤蟲叫須臾月上東山頭圓如瑤臺
鏡未收輕雲往來光隱見五月涼生不須扇爾我今宵
且勿眠人生歡會亦偶然禪榻相對暫相語明朝各自
東西去

重至武林尺鳧皖輪兄弟留飲孽芷堂分韻

同王

魯齋趙傳舟

經歲淹留白髮生那堪重過武林城開尊慰我愁中思
把卷看君別後情尺鳧兄弟俱以見懷詩出示千里敢言追老驥百川肯
許混長鯨擁爐翦燭歡難竭獵獵霜風下五更

題胡奐廷濯足圖

夾岸長楊蘸綠波此中清濁竟如何雙垂白足船頭坐
似會滄浪孺子歌

途程足繭幾時休欲濯還須萬里流今日輸君先占取
可能爲我一停舟

舟次宿遷次李清一韻

日落黃河曲春寒動旅愁身隨鴻北嚮心與水東流寸
指真難測孤槎豈易浮檣烏飛集處無地著閑鷗

答余尺玉過訪見投之作

無端衣食半生愁忽向天涯事遠遊蓬蓽貧家勞過訪
冰霜殘臘許遲留負才抑鬱同王粲抱策飄零類馬周
薊北江南丘隴在誰歟曾爲種松楸

咏几上落花

同吳寶崖金小郊吳尺鳧

無賴春陰結苦寒一瓶濃豔欲摧殘低翻似恨人輕折
亂點還容客細看自是返魂香氣滅非關消渴露華乾
幾多泥污傷心地只隔東風十二闌

中秋後一日重過尺鳧瓶花齋即事

同趙傳舟吳雪園

倦飛不是怒飛羣欲借雞窗共論文詩兆適符應詫我

予向有對瓶花有感一截句

額題留得恰歸君

表小修書瓶花齋三字今歸尺鳧

嫦娥月過中

秋看羅刹潮回半夜聞勸醉燈前非一度此來深感倍
殷勤

哭呂恂令

迢遞長安道風塵暗朝夕此中俱失路送君驪駒發及

予渡江歸偶憩仲蔚宅忽聞一歲前君已賫志沒子與君丙子別

京師至庚辰在京口晤張淵度始知君卒淵度君高第子也悄然不能言哀至自悲裂豈知客

京華乍別成長別人命固如露天意亦叵測江頭浩浩波流恨永無極

有明訖今茲世情重科目得者即為榮失者即為辱所

以寒窗下一燈几常伏無限英雄人有手徒自束顧瞻

紆青紫畢竟同鬼錄疇如君薄命身喪在場屋篋中富

遺文雖工有誰讀歎彼高第子翻能繼芳躅淵度令兄樸存亦以是秋京兆

試前墮馬卒

吾鄉九峰側碧山有吟社荒煙蔓草中百年無繼者君乃與知己揚扈舊風雅顧蒙不予棄入林臂同把詩篇

播遠近一時競傳寫閨閣豔君作豈特振聾啞已巳君與鮑南侯堵

羽三陳子循聞皋叔姪汪辰玉及子七人有續碧山吟之刻閨秀某稱君詩為才子君聞之有豔體詩四截句紀事載燒尾集中當年歡笑

情依然在盃筇回首難再得清淚風前灑

東郊何茫茫新添一墳墓佳城豁然開君將此中住靈

輻麟麟馳素旒翩翩去親戚紛相送哭聲載行路平生

氣傲岸千載不復晤即使果為神亮非君所慕近聞君為神有人曾

遇諸塗初種青松樹寒濤亦已怒故人儻相逢不遇應同賦

羽三先君三載卒

題成金聲品硯圖

海南佛寺碑一通君書綽有晉宋風一朝摹搨達行

在 天子展翫稱其工筆精墨妙名傳遍無乃酬勲及

於硯畫師好手巧匠同渲染雲根凡幾片或有金帶或
銀星方圓攬各呈真形未知何者攜過海大鯤躍出都
沾鯉往予遊霍山山澗得二石生長清流中顏色不媿
澤其一窪若蚌僅供青黃赤其一面平堪受墨縱遇雨
天疑日炙追隨行橐頗輕便令我心思日窄僻發言落
紙空自藏人或見即驚荒唐始知良工必利器使器不
利難爲良探囊竟無錢一箇對此躊躇雙眼餓幾回攫
取縮手回怪君听然笑而坐君不見米顛却受蘇髯唾

題丁公銓北征圖

北風蕭蕭動地來欲雪不雪吹塵埃僵立枯木禿如帚
平楚直接黃金臺黃金臺高高百尺黃金買駿空陳迹

徒聞公子羅衆賓幾見將軍容揖客天涯遊子滿薊城
飢喉凍骨傷中情還家不敢告妻子賺得旁人盡北征
君有奇文古無有懷抱未伸一何久似此寒威寧可當
匹馬衝開向前走羨君壯遊當壯年容服甚光非少錢
僕夫提壺供買醉下酒野雞毛羽鮮前途行盡難行處
我亦常從此中去今朝畫裏忽逢君猶願停鞭與君語

盧家

盧家七十二鴛鴦養在盈盈水一方牛棘花開春漲滿
隨風幾對出橫塘

題蔣靜山借書圖

詩有別才非關書詩有別趣非關理如書欠讀理欠明

欲求其至徒爲爾滄浪此語真吾師讀書豈止詩人詩
詩人詩亦未易讀雙眼遍觀能者誰妍媸本不分時代
其中面目人人在精神遞減遜前人祇訝篇章多十倍
吾友有蔣生室廬傍西湖湖光蕩吟懷不惜容貌癯坐
見秋風生落葉飄高梧反復吟且讀愛與古爲徒不足
繼以借奔走驅奚奴奚奴歸來行步疾脫手墮地散書
帙主人沉吟若不知反被畫師都畫出

題吳衣聞永思圖

十載江湖一會難聞名猶憶在長安那知無限思親意
忽向圖中子細看

浪迹西泠共苦辛况當煙雨落花春閑窗始悟丹青妙
他日相逢是故人

題美人牽虎圖爲吳靜友賦

君不見劉綱道術能通神授綏迎得樊夫人往往與試
輒不勝縱有鬚眉安敢嗔曾入四明險阻處負嵎咆哮
一猛虎網禁其虎伏不動欲往牙張爪還舞夫人曳裾
行步微執繩繫頸牽之歸到家縛在臥牀脚觀者如堵
門前圍今之畫圖無乃是欲行不行懼彼美彼美可懼
殊尋常猛虎胡爲亦如此炳然文采絕世無一朝受制
遭擲揄權移不信翻爲鼠威失何由更假狐東方蒼龍
三太息化作長松蟠道側愁雲四起塞山坳一片糝餵
渾似墨

題項霜田秋樹讀書圖

項君謝却利與名將身入畫鵝溪橫凌秋老樹作伴讀
見者髣髴聞書聲知君本是佳公子不屑膏粱事經史
學富家貧可奈何應悔生涯至於此一從獻策空歸來
西湖日漸添樓臺林逋高士當斯際縱有梅花無地栽
負才坎壈誰之咎明鏡霜生欲成叟少年仕宦豈乏人
書卷何曾把在手

林烈婦詞

烈婦名如蘭閩之長樂人嫁同邑林生子爲之
傳復系以詞

君之母妾之姑君隨姑亡妾無夫君之父妾之舅妾隨
舅存君無婦姑亡舅亡妾更哀哀君俟久長夜臺白日
照妾妾忍哉閉戶昔投繯投繯願未了閉口今絕食絕
食豈云早縱饒炎炎飢火升亮難化得心堅冰縣官縣
官勿復勸妾今多喫二年飯

題王百朋洗馬圖

幾年遁迹錢塘湖愛與同調相歌呼有時逢君道傍揖
堪嗟徒步真吾徒那知君養一匹馬不騎出門胡爲者
得無鄙彼馬上郎馳逐朝朝競遊冶書生每少買酒錢
君能買馬何由然若使良材必高價惠養至今凡幾年
熟梅雨過漸蒸溽繡鞍未披亦拘束矯矯仰天時一鳴
牽向橫塘塘水浴鼓鬣振尾意態雄左刷右扣疲兩童

赤浮血汗浪花影碧浸玉蹄沙草叢水晶宮殿趨趨走
隱隱如聞老蛟吼縱非龍友亦龍媒定有雷霆躡其後
斯言偶爾得傳聞正欲見君一問君粉墨貌出忽見示
妙手奚啻曹將軍飛黃茲白同磊落來自北唐於此託
箕踞松陰獨自看知君非向圖中索

陳宗岱席上喜與倪仲珮話舊

千鎔門邊秋水隈萍蹤疑是夢初迴幕逢賢主憑君出
尊對良朋待我開舊雨自應憐杜曲雄風誰復記蘭臺
星星霜鬚休相訝錯比江都著玉盃

移居涿水園秦上池南岡兄弟賦詩見贈次韻奉

答

去家百里欲歸難妻女相隨未易安終媿驚猿兼怨鶴
敢誇泊鳳與漂鸞蘇臺一見情如舊皋廡重逢意暫寬
况許平分花月地聯吟亦足慰飢寒

京口郡齋奉答金最木同吳楓江蔣香山繆桐邨

曉谷兄弟秦南岡諸君見懷之作

繇花悉飄落郡齋有餘青春回客未回坐歎節序更梅
子色漸黃連雨不得晴登樓見大江浩浩波濤聲緬懷
芳潤堂空使魂夢縈堂中無子迹顧兔三虧盈同志數
君子憫予久徂征新知得蔣卿未面亦嚶鳴把酒爲新
詩各道相憶情白雲共高妙碧水同鮮明雙魚本鱗蟲
猶爲達至誠何況住人面而不感媿并繫予不自量少

小貪浮名運窮策蹇歸矢志守蓬衡蓬衡未易守羈棲
闔閭城微軀在貧賤舉世所最輕百年又及半衰疾來
相嬰幸獲遇諸公歡愛如弟兄聚首洵足樂那復爲此
行去住難自主悵然心暗驚縱假天孫機報章何由成

金星龍尾硯歌爲蔣香山賦

列星體天天可數四七爲經緯以五諸餘磊落拱北辰
總是石精騰出土不然西北天傾時皇媧煉石何由補
緯星之金重且堅散爲刀布兼金錢偶少則貧多則富
賺人如蟻趨腥羶下士本屬無知者癡笑金星知識寡
同稱五緯隸天文利市專營欠風雅立教尼山未可希
載牘公車亦堪亞金星聞說頗赧顏翻身下降蜀東山

姓名李白號太白詩重有唐天寶間釣鼈客化騎鯨客
上下晴雲杳無迹一靈誓願不歸天遁入歙州龍尾石
南唐後主稱好奇鑿石作硯聲輝赫筆花墨花別一香
端溪妙品同翱翔趙宋以來負才子殷勤託此成文章
近時殘片那易得何況完全未彫刻縱令經歷歲月深
流落吳閭少顏色蔣君偶遇列肆傍不惜典衣滿其值
呼童汲水浸於盆星如撒沙儘可捫火敦腦兒華言星宿海尚
擁隔詎意一蹴登崑崙摩挲愈覺神情爽就枕猶擎在
手掌由來靈物獨享難爰命良工剖爲兩一貽好友謂注韞山
一自留各賦詩歌互欣賞予因誦詩索硯觀乍披寶匣
光芒寒吾生有眼未曾覩喜甚再拜忘整冠拜罷回身

向君祝君命應臨好星宿木水火土已從金聚在奎垣
成一族張騫槎可泛天河劉向書能校天祿君乃愀然
請具陳昨宵入夢是錢神爲言爾寶金星硯爭救書生
貧日貧

繆桐邨招集西郊探春

同吳楓江蔣香山金最木丁振公載行
兄弟秦上池暨繆殿仙友陶曉谷兄弟

立春五日歲始新茅簷飛光又過旬桐邨兄弟皆間傑
邀我出城同探春城濠水落城根出畫舸亭亭水中歇
客至招呼上渡船卓午咿啞櫂初發行行兩岸人煙稠
一岸忽斷樓邊樓半塘橋西煙浪闊虎丘孤壘當船頭
薄薄輕雲合天宇准擬有雨却無雨春鳥時聞一兩聲
隨風吹去知何處垂楊未絲艸未芽小梅亦未舒寒葩
邇來風俗迸簫鼓姹女肯露顏如花上山下山重開宴
酒入柔腸氣蒸遍注目看春不見春那識春歸在人面
嗟予衰鬢欲成翁猶與少時歡笑同行步敲危覺沉醉
歸途月出光朦朧

同金退山宿大乾上人德寧菴分得中字

遙指歸鴉歇梵宮春宵喜與故人同淙淙雨到鐘聲後
翦翦風來燭影中鬢鬢點成微雪白衣衫褪盡軟塵紅
十年慣聽蓮花漏不學攢眉謝遠公

題界洵先生雲山爛漫圖

五岳雲皆觸石出維彼泰山真莫匹膚寸而合不崇朝
遍雨九州肯遺一崑崙虛是諸山祖層城九重峙西土

其高一萬一千里上連閬風及縣圃縣圃更上即上天
較城之高各倍數縹緲雲氣難攀登下下高高色成五
東南黃山名天都山山峭拔人間無一縷雲生欲鋪海
絕似潮頭閃光彩魚龍出沒峰巒伏奇怪末由訪真宰
至若巫女雲氤氳楚王說夢何足云大都山乃雲之宅
雲出於山疇不識一飛上天東復西不定浮蹤詎容測
縱使無心化狗形亦或乘機假鵬翼蔽日蔽月蔽斗星
小者便爲大者抑茫然迷却歸山路久住天邊總難得
於我富貴如浮雲先聖遺言宜法則所以後世真英雄
學仙深入深山中神鼎丹成駕鸞鶴蹴蹋雲頭昇碧落
十洲三島誇仙人俯視一切煙花春先生有才高且妙
不信請看此寫真如何兀坐不動身

題青蘿書屋圖

吳子尺鳧於瓶花齋南構書屋三楹前用石城
階鑿池疊山雜植花竹與繚垣薜蘿相掩映後
復有薜蘿自庭陰緣壁駢織瓦上因顏之曰青
蘿書屋子館其中十年將復爲京師之行尺鳧
出此圖索題爰賦是篇康熙己丑秋九月
曾讀江淹賦挂石青蘿起遐慕又讀劉滄詩拂水青蘿
縈遠思豈知此中有水復有石却把繚垣幕無隙且緣
後壁上簷頭竟出前楹過屋脊瓦松何曾經雨蒼牆薜

不省逢春碧弱蔓根生未易攀小花葉蔽寧堪摘主人
有書不我吝主人有酒不我惜讀盡十年風日朝醉盡
十年煙月夕爾亦於我似有情滴露常供注周易憶爾
初種時數莖細如絲量之不盈尺坐對抽新枝如今蔓
延凡幾丈看見何人不欣賞青青顏色逼天青莫忘東
君與長養

芳潤堂分賦蠟梅爲桐邨四十初度

階前向日黃葵心籬下凌霜黃菊節此乃木本色亦同
匹如蜜蠟尤難別却與寒梅發並時結實如鈴飽冰雪
京洛人家共喜栽號爲蠟梅非是梅當年得與涪翁遇
欣賞新詩偶然賦芳華從此蜚英聲梅譜至今添一名

麻姑說是如花女烏爪纖纖長尺許自降蔡家經幾秋
近聞重到吳閭遊忽見此花話前事崑崙宴罷歸羅浮
羅浮山頂乘閒坐樹樹梅花開向我其中一樹猶未開
戲撚蜂房綴花朵朵顏色凝中央形如罄口浮金光
丹爐煙氣蒸透骨變作檀香一味香凡胎移得長年少
道家裝束天然妙蝴蝶起舞鸞皇歌贏得羣仙拍手笑
那知異種出世間還教綠萼稱同調仙人神術言豈誇
請看種玉成瓊花

分賦魚燈

兀誰持燭射魚迴似逐琴高出水隈腹炷蘭膏流遠照
鱗藏竹素見新栽喁喁欲向南溟去撥撥疑從丙穴來

漫與詩彙
試問杏園燒尾宴可容留待禹門雷

尺鳧至吳門最木招集芳潤堂牡丹花下分韻

牡丹明豔簇中庭十載花時眼未經豈是待君同宴賞
還應慰我久飄零拂桐影裏張羅幕布穀聲前敞畫屏
一片春光濃似酒好教吾輩醉無醒

漫與詩彙

予於詩學未深況今衰耄舊聞荒落盡矣然竊念詩之
於文同途而異軌如木之有竹花之有梅卉之有蘭蕙
閒澹清永超然色相之外三唐諸公惟韋蘇州得此意
故李杜兩家以逮高岑王孟後人或有模擬相似者惟
韋蘇州不能學東坡猶難之今讀芳似香山詩意興都
在言外此真善學蘇州者矣試由芳似之詩推之昔陳
玉燭之文仿史記而絕不似史記歸震川不仿史記而
絕近史記此可與知者道也芳似其以予爲知言否八
十三叟岑居賀寬題

吳門蔣芳似詩芊眠清麗而不失之雕飾雕飾則真氣
漓真氣漓而徒以字句爲工則意格氣骨俱不講而詩

香山詩彙是圖
之道存者幾何矣太白云秋水出芙蓉天然絕雕飾其
芳似之詩之謂乎意者本也有意則有格氣與骨各視
其性情而見焉芳似因其所已得而孜孜焉求其所未
得將日進乎古作者之堂豈特與今之人較優劣乎哉
北平王源識

香山詩彙

我有

吳縣

蔣夢蘭

芳似

我有豐城劍銳利莫敢敵光芒射斗牛神物無滯迹昨
夜山中行荆榛頗充斥交枝刺我衣敲條傷我鳥妖狐
穴深叢猛虎亂蹄躡神劍聊一麾大道如砥石利器不
示人惜此猶輕擲

三徑堂桂子歌

花洲木犀天下稀花開結實何離離枝葉如蓋立三徑
風吹實落打我衣小山古香亦自奇三秋一過無容輝
那如此實經年垂歲寒不懼霜雪威形如橄欖味辛苦

俗夫齒頰無所施入泥不復萌芽茁仙種豈肯人間遺
仙人不來來何時誰傳服餌升天墀

秋夜

風雨一牕寒蟲聲四壁滿青燈耿長夜明滅依孤館吟
嗟寫憂樂閱歷知冷暖黃雞咿喔鳴白鷗消息斷何當
泛空濛萬里不顧返

壅蕉根

種蕉十餘年經冬輒糜爛焉能蔽白日徒足滋憤惋往
歲寒無力中庭挺枯榦方春嫩葉抽已出危牆半愛惜
罷揮灑綠沉秀書案昨日西風顛數葉吹已斷粗莖大
於斗搖曳如拋擲便恐撥其根持抱急相喚阿兄運甑

石周遭立圍岸泥土築堅深及此消息難嚴霜早晚至
彫瘁何足歎包裹俟春回參天插雲漢會期羊角垂空
庭發璀璨甘美既堪食豔冶仍可翫人生且無根未能
保一旦况復砌上姿當此歲時換盼望一試花過此不
復算

補被行

鬚髮中歲稀即恐霜染白微鬚亦無多羨彼髯如戟吟
詩未敢撚照鏡安忍鑷奈何麤布衾令爾遭鏟缺家有
破綢被歲久冷勝鐵喚婦速縫補裝棉白於雪殘鬚庶
無傷飢臥亦良策

伐木篇

丁丁伐木于彼中林嚶嚶鳴鳥懷我好音結交莫交面
結交當結心棄我忽如遺離居感至今非因是時困切
切望子深願我為去病之良藥願子開聽納之虛衿未
及進善道之告豈遽置坐羶之鍼乘車戴笠不相棄况
我與子同浮沉十千沽美酒與子常共斟箝我苦口令
色孔壬三日不相見幽夢期相尋百年無寸功何異辰
與參文章不足重所重在規箴庭前翠柏苦難食歲寒
能作蒼龍吟平生之言曷敢忘與子終為絃與琴

題蓀九新居

幽人卜宅喜幽深靜巷無人好細吟不信遷居家具少

買鄰也合費千金

與瑤圃
宅相對

次澹遠壁間韻二首

幾處搜奇石何年得異花飢驅多撥棄三徑鎖煙霞
讀書能自誤擊劒竟何成歐冶東家近空聞爐鞴聲

不寐

天道運四時一弛乃一張寒暑得其職人物無天傷盛
夏忽金令瑟瑟風兩涼羅幃動輕縠篋篋含冷光奚童
性酣適鼻息聲皇皇鄙夫獨輾轉憂思匪居康孱軀蒲
柳質調攝無神方陰陽苟錯迕藥石誰輸將况茲畎畝
間禾稻殊未長轉盼倏秋冬我飢曷以當飲啄有定分
天壽齊彭殤殷憂蹈杞人精理輸蒙莊去歲冬不雪野
老多徬徨豈知今年春菜麥盈圃場飢固委丘壑飽亦

歸北邙不聞朱門客老病獨可禳白日已莫返明月辭
我牀羨彼夢不回喜茲夜始央結網追逝鱗補牢歎亡
羊何爲魚目睜悞此黑甜鄉人事莫倚據真宰尤渺茫
且復適今夕生理詎可量

早渡胥江

濃霜滿地月在天西風刮面手欲攣忍寒曉逐辭樹鴉
却惜一夜無安眠渡頭獨立如鸛鶴肌膚凍皴體不便
入舟匍匐已戰慄中流波浪逾喧闐舟人死力弄柔櫓
欲進反却思攀援只憂倏忽力不勝縱有萬慮何由煎
艱難仗爾得相濟驚定乃覺愚異賢日高三丈睡猶穩
靜聽啁雀鳴檐前

吳中口號三首

生兒信是生女好東家老翁年已老長男賣菜晝不歸
竈冷無煙色枯槁前年嫁女哭西鄰今年寄書兼寄銀
回頭偷看如花女却喜二八當青春

長髻輕鬟雲霧入繡羅衣裳蘭麝浥粉黛臙脂細細施
高門送入當軒立從頭徧指說風標態濃意遠誰會描
莫把千金看鄭重人間難得董嬌嬈

路遙日短開船促耶孃哭聲斷還續罷流雙淚作好語
此去行看衣食足計日先期寄好音雖云割愛亦酸心
女兒再拜無他囑耶孃休易揮千金

風雨達旦庭前三小梅恐零落逮盡急省視之喜

而賦詩

皎皎機上絲，湔染失其素。翩翩公子家，貧賤喪其故。庭前三小梅，本非金石固。風雨摧殘之，獨立能不懼。徒使惜花人，反側何時豫。倚枕悔我心，咄哉少防護。奇香發霜骨，外物何足慮。依然林下姿，猶可伴晨暮。歎彼凡花開，衆色燦雲霧。細雨兼微風，香落泥露浣。乃知君子操，不易改此度。

向余讀書雁蕩里，有山鵲往來樹石間。又有翡翠捕魚方塘而皆不見，其偶心竊悲之。丙戌春復見二鳥歎之曰：此真失其偶者矣。作二孤鳥詩。

憶昔俱飛日，山巔與水渚。捕魚雙照影，啄果共翻枝。風浪寧教失，崎嶇肯暫離。但知呼應合，豈識死生悲。何日分飛去，難忘聚集時。臨流傷特立，宿谷歎孤危。巖際將求伴，溪邊每忍飢。微鳴聲似訴，觸目意能知。毛羽雖皆異，飛翔只自疑。夢應尋截竄，魂不泛漣漪。羞近鴛鴦側，愁令孔雀窺。一般山水趣，歎爾獨奚爲。

惜春

遊絲也怯春將去，欲繫韶光教且住。罨花無力那禁吹，半逐花飛落何處。憶昨溪橋日脚斜，黃鶯閒啄黃柳花。柳花鋪地誰相惜，行人亂蹋成泥沙。只今春日無多日，青梅如豆桃李畢。好花看過百兩金，薰草炎風不堪出。兩丸赤白機上梭，青鬢織成白髮多。少年不似春光易。

寒冬去盡重相過

探梅八首

舟行

冬暖春更暄數月少雨雪水淺胥江渾岸高橋梁突放
舟過瀆川舵礙難遽換櫓搖水底泥每致損魚鼈薄暮
入東崦曠望始可悅長風送輕舠飛渡片雲拂生憎春
山走不分梅花發主人數致書遊侶得重結但對三珠

樹

時同山輝韞
山水蒼昆季

自傷紫荆折

鳳岡書屋

好鳥多在山名花不宜俗舍舟歷級登高齋踞山麓鳳
岡對棊几幽人比鶯鶯達尊有其二孫子皆雖肅古杖

倚簷前素琴挂屋角讀君壁上詩酌君尊中醪自慚城
市間日與飛塵逐倚枕聽松聲欲睡何由熟

馬家山

田中菜麥乾春農抱深憂既喜昨日雨又恐陰雲收豈
知尋梅客裹足歎淹留人生各有願焉得相與侔乘興
共長往崎嶇縱冥搜山泥浣鞵襪花雨妒清遊已斷還
更續且行終不休陟彼馬家山眺望亦自由下瞰白雲
鄉宛在水中洲又如峨嶺山積雪常不流惜哉萬香國
荒棄無人求何不結茅屋假我為拙鳩

兮墓山

從來梅發時茲山梅獨少譬如無實人虛名滿四表古

剝良足雄金銀照縹緲四宜堂前桂繁枝蔽穹昊可惜
非其時天香獨無兆是時正修葺朱欄四圍繞鮮麗雖
足觀不如勤灑埽

五雲洞

側聞五雲洞玲瓏如斗室陰森不可窮山鬼有時出探
竒不憚勞濕雨走愈疾老僧喜人過煮茗燒松節云是
鉢盂泉不竭亦不溢勝地遊蹤滿幽境無人悉修竹含
靜香老樹撐古骨何時著緇衣與爾玩佛日

虎山橋

欲歸心未忍行行反前步邈迤虎山橋竚立縱四顧遠
峰攢萬戟重疊不知數可憐偏仄心曠蕩忽如故新歡
生舊悲往事奚堪愬少日侍高堂畫舫乘煙霧容與在
中流笑粲問何處但識一朝樂焉知百年懼荏苒三十
霜生死幽冥路茲遊足傷心入舟儘悲慕

靈巖寺

夫差骨已朽遺跡猶可問捫蘿歷翠微鐘聲發靈性泉
石久荒涼蘭若終耀銜講堂入層雲疑是吳王殿老僧
南面尊遊人不能見吾亦恣登覽醍醐非所願

歸

登臨能倦人歸家亦可悅豈知盆中梅爛漫正如雪去
年種花者先兄丹
菌手植生死竟長別靜夜獨相看如聞泣幽咽
所在多感傷襟抱何時豁

香山詩集
題畫贈竹坡

皎皎萬里心亭亭千古節蒼松老如龍皓鶴白於雪足
方君子操可比高士質歲寒不畏侵縞素寧受涅汪君
信奇士當世無與匹少年負豪氣矯首追往哲瓦礫視
黃金探囊隨手撒爲笑錢奴輩錙銖計毫末縱轡入風
塵留心訪特達汪度納細流虛懷貯熱血况是家庭間
樹德以爲帥鞞鞞常棣花歷歷椒聊實仰茲德義尊感
爾精誠結何事獨冥蒙有心皆洞徹輪囷梁棟材山林
竟蕭瑟緬邈雲霄翰蒼穹礙奮發獨立倚孤高雙眼看
披拂賢人在草莽君相宜勿怛畫師識此意揮灑心應
筆松鶴與名流三者同隱逸吾聞高岡梧萃萃映旭日

鳳皇棲其上雖似丹穴汪君不世才藹藹王之吉鄭
重網羅求邂逅工師悅

無題

畫船銜尾泛芳春斟酌橋頭語笑頻粉黛綺羅香不歇
凭闌俱是看花人

遊仙

崔嵬萬仞無人跡疑有仙靈藐姑射羊腸詰曲芒屨穿
鳥道龍從曜靈側我行疲乏百里遙山空寒甚飢無力
草長没人足鬼怪叢深刺肌徧荆棘求仙緬邈意慘悽
猛虎深林吼霹靂牙張爪露近我前我有誠心爾須識
泉乾爾渴血可飲山荒爾飢肉堪食傷哉棄家十六年

香山詩集
此心炯炯終難釋豈知神物是仙靈聽我傾心化爲石
幽蘭菖蒲繞曲澗永日和風媚孤客須臾石長肉靈芝
燦燦光華照顏色吾聞食此白日昇三千功行何曾積
我有同心忍獨遺采采來歸同爾喫

桃源

何處桃源路飛花落釣船桑麻春沃若鷄犬日安然漁
父無仙骨秦人有俗緣不知太守後好事竟誰傳

與惠公相如瑤圃閒話

春晚誰相挽紛紛數落花賣書將買劍遯世欲離家是
水堪垂釣何人肯種瓜無爲矜麗色終竟染泥沙

杜鵑盛開小酌元昭齋中

種花十年前花繁人易老酌酒對主人宿昔事縹緲古
時蜀帝魂化爲杜鵑鳥杜鵑啼血多染作花枝好鳥啼
如有恨花枝那能曉尚留萬點紅不肯埋青草歲月去
如矢繁華豈相保與爾同感傷金尊不辭倒

蹋車行

車聲咿啞挈流水農夫蹋車骨欲燬鳴金發號不敢休
我若偷安綠秧死今年五月梅雨稀田中乾裂塵土飛
萬家插蒔十三四恍見妻子相啼飢丈夫蹋車苦日烈
婦女饑餉罷梳髻家中小兒不得眠蚤蟲蚤蟲齧腥血
昨日東南起陣雲停車仰首屬望殿三點五點灑赤土
已過西北空氣氳聞說城中爲祈雨緩征省刑雨當溥

天公不肯活萬民應須憐我好知府衆人悵然轉桔槔
桔槔艱澀如粘膠老翁扶杖不須勸天生我儕甘苦勞

鵲鳩鳴

晚來鵲鳩鳴不已鳩婦含愁農婦喜饁餉纔歸又出門
仰望烏雲何處起鵲鳩鵲鳩願爾鳴明朝可免車河水
兒夫肌肉日炙焦鳩婦休傷雨濡尾

搶水行

上洋邊海車水難潮來水滿潮去乾農夫候潮立港口
築壩壅潮趨港走上流得水截下流爾可蹋車我獨休
率衆排開上流壩下流得水上流瀉上流下流軀命關
苗黃欲死勺水艱誰應歡喜誰應戚爭持搶水成相敵

可憐刀劔入肌膚港邊尸倒血模糊未飢先死誰爲惜
不如海水無潮汐

鷄冠花

金距臨階氣已平雄冠猶戴武夫纓牕前恐有劉琨在
秋雨秋風總不鳴

蒼筤書屋海棠花放韞山作詩誌喜憶丙戌歲韞
山欲遷居於此顧茲嘉樹委棄於荆榛藤蔓中爰
是操斤斧斫削敗類俾得挺生以故培植至今乃
見數花余蓋與有力焉遂次其韻

幾載摧殘灌莽中枝頭猶得見微紅衰榮在物愁相半
愛護如君訝許同自昔斧斤消否運於今雨露奏元功

石家金屋居然是豈藉輕煙作意籠

讀芳潤堂橐贈最木用少陵夜聽誦詩韻

風雅久陵替髣髴面墻壁啁嘲木末喧雖啗高岡寂芳
潤追古音元氣浩無敵迸放鄭與衛太和奏夏擊一字
亦可師片語誰能易發揮秉正中快利比鋒鏑細或抽
繭絲壯或震霹靂微文識者稀賞心潛有激興比半齷
齷風騷那搜剔三百有遺響千載免寥闕

次韻答最木

賤稟耿且拙不作逢人面炎熱世所趨冷淡余所善一
二青松交冰雪時相見芥視富與貴寄懷唯筆硯布素
即文繡瓢飲亦華譙問難往更復語奇歡且拊持此索

冥心忘彼須臾變張宅滿蓬蒿嵇公好鍛鍊漫聽豐干
舌虛襟良可歎衝雪過衡泌倒屣接繾綣吾心未可知
君意誠當辨乃以螾蝘才謬比文章彥坐君芳潤堂松
柏薦蘿纏精誠二照灼塵俗紛消散卓哉文與行勉我
期共貫豈若近世交言語徒眷眷踴躍追古風誰復怯
愚懦

題蕉扇

收拾牕前窻窳聲製成團扇手時擎人間炎熱薰心甚
仗爾涼風一葉生

歙州金星龍尾雙硯歌

昔李後主置硯務官採歙州龍尾石爲硯歐陽

永叔謂龍尾金星者貴東坡詩亦云玉德金聲
寓於石子心慕焉戊子六月偶得於市肆遂與
吾友汪子韞山各剖其半質堅色黝金星千百
點巨細間錯散布其上若夜視澄淵天星倒落
而光怪炳耀過之夫龍尾踵端石而行而終不
勝其埋沒塵坳與敗壞於不甚愛惜之手者不
可紀極幸而得存予幸而遇之韞山又幸而剖
之因各歌詩一章冀好事者屬和焉

黑金爲質黃金文堅玉爲性秋水神南唐搜索趙宋絕
炳耀譜牒名空存東坡牛後語狼藉賦詩補過聊免嗔
歐陽識者亟推許遂使北巖隨後塵嗟予少小事筆墨

鼠鬚蛾綠愁無鄰垂雲主人最莫逆几案三載同夕昕
金星龍尾神所貺邂逅遇之敢獨珍剖琢雙硯各有得
座南六月消炎熏涵泉漲墨貯風雨觸手噓氣生煙雲
夜深明月入簾幕晶瑩的的流星辰年來蹤跡兩迢遞
神光映合爭瑠璘咄哉尤物歷千載天逢好事含悲辛
俗夫有目竟相棄貞質欲獻羞無因一旦乘時託好手
礮磨雕琢傳其真譬如豐城有雙劍安肯終古埋埃氛
人生會遇亦如此蠖屈豈必無龍伸汪君文采炳星斗
精金美玉光紛紜波澄的皜見異狀筆花開放常如春
惟余志願灰已久甘心硯北無聲聞但惜雙硯本同體
遇人又復賢愚分

盆梅得水字

曩昔種盆梅纍纍百千蕊點綴倚卷石灌溉傾勺水淺
土托根株暗香盈棊几惜此山中友咄哉局尺咫况經
裁剪餘束縛良可恥他日植空庭生意勃然起歷今逢
幾春花發仰而視豈憶書案間晨昏伴蘭茝觸目感舊
時灑墨滿素紙盆梅雖不言含笑得妙理今昔無異觀
秀發亦可竅

又得暗字

午榻味正甜忽憶梅可探聳身入杳冥有境半明暗落
落四小山各各列崖礪山中何所有老梅方吐蒼梅身
數十圍交枝俯猶瞰徒倚忘來歸鼻吸香可啗遙見三
五人列坐甚恬憺有時吟頗豪亦或觴正濫俄聞天邊
聲略似漁陽摻奈何驚蟄雷使我佳夢暫覺來恍然遇
盆梅韻孤澹夢醒誰爲真小大詎容勘

西山紀遊八首

存五首

胥江放舟

家住胥江濱日挹西山爽陰雨苦浹辰裏足徒養養主
人趁新晴衆客爭勇往入舟懷輒舒解纜心已賞春水
長一篙旭日送雙槳平生耽燕遊境過動惘惘當其發
興初自謂頗無兩遙擬湖山秀歷歷如指掌

高園

橋矮礙舟行路長阻山麓我有平肩輿
檣榜遂登陸行

行一水窮高園枕其澳主人在何許城市苦錄錄飄搖
幾樹花寂寞萬竿竹新紅委閒階舊翠濕空屋我坐欲
題詩付與園丁讀

放鶴亭

野鶴與支公一去如飛電空留放鶴亭每息遊人倦翼
翼峙山霄軒軒對湖面水光山色中真諦隨時現會心
復何人妙語試一轉

千尺雪

灑迤入禪扉危徑如頽圮平岡壓簷頭停泓落澗底聞
彼瀑布泉惟此亦可比噴雪凍石壁春晝寒浹髓旁流
走中庭鑿石仿曲水奈何壅其源忽似黃河徒徘徊聽

雪亭通塞誰所使

天平嶺

既下支硎麓復上天平嶺石門當嶺開幽暗如鬼境稍
轉路始通略似牕牖罔仰瞻萬笏林詭怪異形影森羅
衆戟攢猙獰百獸猛嶽峯期捫蘿登頓惜斜景吳山固
云多得此樹蕃屏回視衆魄礪靡靡失秀整何當窮壯
觀欲去憂怲怲

送春辭四首

少別猶應遲一年不堪鶯語落花前春風笑我蹉跎盡
每到臨岐始惘然

芍藥依稀惜遠離柔情無那曉風吹倚闌莫賦傷心句

猶得嬉春十二時

且把歡心託酒杯沉沉嫩綠護蒼苔知君未忍分明別
夜半偷乘風雨回

夢醒簷溜響崢嶸似草愁心未可刪回憶昨宵離別處
柳花飄蕩最相關

櫻桃

紅玉琢勻圓籃籠野人送白衫當日午不作東都夢

豌豆

宛宛傍田疇紛紛刈戎菽莢小苗亦柔何爲最先熟

竹實分韻

吾聞鳳皇食竹實不聞有實生鳳雛越人語誕豈足聽

且喜掇取留飢軀丹山有鳥餒欲死胡不采送山之隅
一啄能使六象全再啄能使冠距朱三啄四啄叶太平
載飛載鳴聲郎都何爲狼藉滿會稽一飽但屬鳩與烏

千人石分題

虎丘一片千人石日日遊人蹋遊屐千人石在未曾移
萬古遊人去無迹我來坐石石不知我去空留月光白
安得壯士力萬鈞手提直向天邊擲獨坐常看海月生
不與千人同逼窄

秋日書懷次南岡韻五首

敗紙禦西風颺颺鳴疎櫺重雲貯寒雨霄霄響空庭局
室抱雙膝故交稀晨星志士感素商壯心悲載形慷慨

和鳴蜚飄零等流螢緬懷古聖賢莫保兩鬢青虛名身
後事百歲何時寧

人生六尺軀眇若一莖草嚴霜終有時安計遲與早所
異庸俗流仁戴而義抱貧賤良足安富貴不堪道盛者
非為榮衰者豈即槁風吹墮葉起一笑幾絕倒對酒罷
斟酌愁來不須埽

竹實雖纍纍鳳鳥終不鳴鳳鳥既不至竹實何須生舉
世不厭濁奚為我獨清倘能貶高節安見無英聲以茲
內自省用能消不平咄咄乘時彥文采爭鮮明吾從偃
佺遊敢復纓世情

賈島吟新詩釜中常苦乾瓢飲亦足樂何為多永歎豐
歉本無定循環詎有端所慮陋巷人謀道如食難扃戶
謝塵事長坐窮內觀我心同槁木豈若珠走盤哀彼蚩
蚩者一息猶難安

秋雲淡如抹風吹忽然動我欲寫秋懷矢口忽如凍常
言已厭聞奇語恐駭衆誰信穿楊箭百發能百中惟對
無絃琴靜中獨撫弄隱几若有遇古人入幽夢為言知
希貴勉我勿心痛

所見二首

曉鴉枝上啼呼羣啄田稻稻收餘粒存啄啄猶堪飽
一鴿倏然起旋繞徒自勞駝鈴雙翼重欲奮何由高

記夢

忽忽相逢絮絮談塵根不斷句難參憐無知己吟多怨
聽到深更意漸諳七尺棗容雙手剥半升鐺許一肩擔
芒屨才著驚幽夢破被蒙頭睡正酣

遊天平山後漫書

年來無復動心旌任是巖危路不平一自天平山上過
無端魂夢輒相驚

正月一日同人集芳潤齋用東坡聚星堂韻賦詩
余以泥濘未與斯會續成一章

清都淨界飛花葉新年新得舊年雪諸君相聚意趣饒
應有清詩鬪奇絕城西城東五里遥泥濘却愁屐齒折
坐看飛鳥乏雙翰高興倏起倏復滅終然束帶欲相就

嬌女癡兒肘頻掣想像高齋比聚星組織鮮華爭綵纈
獨將椒酒對春風兩脚局縮空屑屑日光烘照寒雪消
溜滴茆檐盡一瞥泥乾徒步始出門路逢好事先傳說
諸君白戰功已成歎我方求兔腎鐵

泛舟探梅由胥江宿塘灣

西山環太湖青峰百千朵梅花徧巖崖四望無不可別
離已三年高興倏然果鼓棹胥江流晴光正淡沲斜景
迎船頭澹月送船柁瞥眼分晦明變態誰能揣前邨隱
復現塘灣出細火一繫探梅舟水宿頗帖妥

經聖恩寺至錢家礪

晨遊興方鼓招提非所期綠竹密如篔簹徒倚亦足僖徑

轉下山麓香風忽然吹飽聞錢家礪有似庾嶺奇崖前
亘修路澗底縈茆茨湖光盪山脚嵐氣接水渚千樹萬
樹花高下尤參差穿林衣裾馥坐石心神怡磯邊有小
艇惜哉無篙師便欲解其纜乘風從所之

六浮閣

選勝良獨難點金乏黃冶六浮名則佳造物不相假誰
知古人畫竟爲今人寫今人與古人名實豈相下聳拔
出梅梢牕牖香風灑六峰湖面浮如在案間者暫遊缺
坐臥去去終難捨

由西磧山至熨斗柄

西磧路何遠幸可免躋攀澄波浸雲根山盡水亦灣稍
轉林漸密茆屋藏樹間香氣取次濃覓逕行蹒跚平坡
勢欲走奔突衝潺湲雖非昔年盛疎枝猶可觀

拈花菴

探梅不知休雖倦已隔宿歸路試停舟名藍更挾几高
簷出修垣禪扉依澗曲境僻絕人踪山空謝塵俗昔者
拈花禪笑顏疑可掬

積翠菴

山深境愈寂竹靜含微曛嬋娟蔭數畝交加疊重裯一
徑入蒼翠光動波鱗鱗山僧澹無營追陪等閒雲爲言
山中趣若欲招隱淪焉得避城市方袍披我身跏趺坐
僧龕晨夕對此君

靈巖山

靈巖擅名勝一歲必數登茲遊值春暖山勢增峻嶒解
衣藉盤石倦臥枕曲肱遊人睨而視欲問愁不應神飛
湖山畔不異鯤化鵬鐘聲落松梢鼻觀猶微馨努力造
其頂遙望昨所經不見叢梅白但見諸峰青勝事不可
常歸與步矜屐無爲撫遺蹟感慨譚廢興

香山詩藁

江南夙稱山水之窟而吳中爲最佳其淑靈和清之氣
鍾於人好風雅追材賢盛讌會而四方名人逸士無日
不來又修地主之歡拂席以迎幾二十年之久者金君
最木其一也年來老成彫謝同人亦升沉不一最木又
以憂患之餘息景藏采乃顏其堂曰芳潤唯二三詩友
往來過從每當春之日秋之夕輒攜觴泛舟徜徉於山
水花月間互相唱酬以適其適最木少孤暨長恬靜寡
欲凡世人之所好者皆無與焉獨悱然念先人賫志早
世因發其藏書讀之又自置書書未嘗去手凡經史百
家靡不潛心考索所與游處者亦皆直質無流心之士
耳孺目染胸中浩浩焉落落焉非徒讀父書者比故形

於詩古文類皆氣骨高妙而其詩則一出於柔澹而歸於和平春容舒雅有風人之旨焉識者咸歎其天分之優而亦由於讀書交友之助爲不少矣近語予曰予年逾四十碌碌無所表見於世作詩雖日淺不足觀擬將板之以廁於吟流之末非敢望不泯其名也亦聊以寄吾志焉而已子其爲我序之予因念最木以如此其才與志力學好古何難顯其名以及其親顧天若有以限之而使其僅欲以詩自表見不亦可慨也夫子無似因繆君素菴獲交於最木辱最木不予棄許附於倡酬之列今且十年以序見責予辭也敢遂書之爲芳潤堂詩序云康熙庚寅夏四月同學弟朱襄

芳潤堂詩彙卷一

吳縣 金國棟 最木

正月六日對雪同南岡桐邨曉谷作

獻歲人事簡心腑暫疏淪里俗重賀節往來意殊惡牽率過城西寒氣凜郊郭雪花大於掌風急看迴薄歸途紛積玉泥濘步前却衡門凍雀喧空齋興寥廓小車迎故人擁爐命觴酌秦子詩擅場二繆並秀削慚予獨拙澀祇用供歡噓茲辰旣風雅感物思遠託少壯駒過隙年先蛇赴壑翛然冰雪姿忍爲塵勞縛但令酒盈尊不憂錢空橐庭雪快初晴溪梅欲破萼擬泛山陰榷共踐尋芳約

次日復大雪和東坡詩韻

風雪黯春華詞客頻酬和茅齋寄高興雜還誰能那爐
火燄無紅簷雀凍垂墮沉沉暮靄昏風怒凌空簸著樹
何澄鮮眩目看璨瑳疇將冰柱斲空煩玉屑磨飄絮詎
可暖糝鹽誰居貨都忘狐毳溫翻覺酒力挫寒江漁翁
釣空谷幽人坐更憐野岸梅枝柯壓欲臥遠峰沒嶙峋
原野平埒坳清光如明月不遣浮雲浣憑誰畫此景展
卷愁顏破聊尋險韻詩擬作消寒課嗟彼行路人何以
慰窮餓豐年多瑞雪寫爲田家賀

春夜讌集即事

春入中年百感縈漫憑絲竹遣心情無端又惹當時夢

一曲分明是隔生

憶萬峰探梅

十年不到梅花邨湖山入夢迷芳魂髣髴蓬萊在人世
仙人笑我留塵昏環山面湖不知遠芳菲處處皆名園
手攀花枝蹋花徑冷香冰蕊忘春溫有時水月蕩一色
并與峰光明朝暎巖壑清幽尚歷歷胡爲寂寞關蓬門
坐令春風自開落臥遊高詠徒空言我年未老鬢堆雪
幾得花下常開尊

鶴

風骨翩翩羽族仙白雲來去不知年高飛豈羨乘軒寵
善舞寧爲入市妍秋夜一聲清露警空山百尺古松眠

蕭閒獨與高人伴長在蒼煙野水邊

游西山八首以雜花生樹羣鶯亂飛爲韻

幽居臥春雨巖壑清夢匝茲辰載酒遊况乃朋簪盍出
郭青山近欣然屏塵雜煙邨亂紅霞聯吟倒芳榼

晴光蕩明鏡煙景擬若耶畫舫颺羅袖芳隄馳鈿車熏
風拂面香爛漫夾路花窄徑穿雲去峰轉翠黛斜
石壁千仞立飛雪一壑鳴啜茗坐巖際兩腋清風生漱
芳瀹靈府洗耳無俗聲源清流不竭聊復濯我纓

盤曲巖崖裏煙蘿引幽步修竹蔭清湍山閣枕芳樹閒
與白雲棲靜聽松風度遊人春雜逖誰識此中趣

寒山偕隱地泉石餘清芬孤高寄疏鑿標致自不羣竹

香澗空碧誰爲酌孤墳華屋總一丘日夕生寒雲

幽棲曾避世蓮花尚留名欲訪高真跡巖空池一泓宛
轉松枯徑十里聞流鶯春衫空翠滴生我遺世情

老鶴凌雲姿迴非耳目翫幽人旣長往翩然去霄漢西
山爽氣清月夜松濤亂髣髴時下來千年認幽館

落日樹影碧墟煙山色微籃輿下山去花香猶在衣暮
雲還別岫水際沙禽飛燈火楓橋路蘭橈逐隊歸

詠物四絕句戲示友人

燕

軟語低飛盡日忙銜泥時蹴落花香笑他長傍烏衣巷
春晚雙雙宿畫梁

鶯

綠嬌紅小豔陽天
惱亂春情最可憐
何處畫樓驚午夢
好音風送玉臺邊

柳

畫眉張敞本風流
玉勒金鞭逞冶遊
試問陌頭新柳葉
曉妝偷得黛痕不

蝶

粉蝶尋香過短墻
玉人春困日初長
翩翩花底迎團扇
笑說輕狂似魏郎

山行

尚惜餘春在青鞵
始此行豆花香亦好
柳絮舞還輕一

徑浮陰滿千巖過
雨清僧房環翠谷
倚閣看雲生

桐邨偶得畫軸竹梅寒鳩筆意生動百年舊物也

書一絕句

疎香勁節寫清寒
點綴幽禽鬪藥闌
零落百年風骨在
可知穠麗一時看

性愛邨居未遑卜築
偶圖小隱以當臥遊
并題二詩

水北山南一草廬
幽花野竹自蕭疎
雲生翠岫來披戶
澗引流泉學灌蔬
深樹鶯啼春雨後
小橋魚戲夕陽初
漁樵歸去煙邨晚
蓬徑無人問索居

筆端點染即吾廬
十畝之間與世疎
播穀餘勤仍接果

種桑隙地便栽蔬但看農圃多幽事何用功名賦遂初
身在幼輿丘壑裏高風不數武陵居

招同嘯園桐邨曉谷上池南岡西郊探春至虎丘
舟中口占四首

爲愛年光蚤放舟明川翠岫暖煙浮春秋佳日常來往
記取東風第一遊

首春無事息塵喧野性生憎車馬煩今日登臨最瀟灑
水光山色落清尊

虎丘佳麗冠吳中近被天光更鬱蔥草木芳華春色早
人人望幸說行宮

風日暄和春意多萬峰花信近如何十年清夢尋香雪

只向山塘倚櫂歌

初春即事

春回十日春何處西郊結伴尋春去漠漠寒林花信遲
歸來卮酒聊共持酒酣相與求樂方忽聞清歌興欲狂
招邀綽約如花女停眸不語琵琶語揮絃終曲春雲駐
謔浪行杯忘日暮燭下紅顏彌可憐有客消魂最少年
相看咫尺蓬山遠更約佳期酬繾綣此夕風流亦可喜
九十春光自此始

遊滄浪亭讀商丘宋公壁間詩次韻

畫戟凝香幾賦詩空留古意野鷗知柳梢漸長春光淺
梅蕊初開日影遲一曲清漪垂釣處數峰橫翠倚闌時

風流子美登臨地白髮京華有所思

余素不知詩近得楓江提唱因偕桐邨南岡曉谷
屬和晨夕商略偶有所得輒寓於詩用牧齋集中
韻十六首 存十一首

中歲吟詩轉自疑古人格律欲誰師唱酬今有溪南老
試與諸賢共論之

詩家分路各揚鑣魏晉風流歷數朝中截鴻溝非篤論
柴桑豈合讓劉曹

精靈千古未塵埋漁獵翻憑故紙堆縱使朝華能滿眼
香消色黯已如灰

肆筆成詩發古香胸羅千卷秘金箱金鍼獨得誰能會
可許吟壇共激昂

文章變化本如神流水行雲日日新詩律居然成墨守
試將麗句較前人

詞學淵源敢較量紛紛耳食說蘇黃末流詭怪如蛇鬼
尚託涪翁一瓣香

旨遠辭文自躍如詩人比興托禽魚浣花舊跡無人識
只有荆榛滿故墟

未信今人遠古人好詩衝口亦清真追摹舊格輕時輩
却墮元規十丈塵

翠香紅粉出墻東舞絮牽絲颺好風贏得少年工豔體
無題詩句徧吳中

欲刪俠客悲歌句且學風人敦厚詩千古離騷偏善怨
美人芳草托微詞
澹泊朱絃太古音北窗高臥上皇心風標只有蘇州繼
未許時賢和此吟

讀史

文武去千載孔孟復不振縱衡誤六國申韓禍亡秦沛
公奮田野廓然宇宙新惜哉豁達主未遇名世臣蕭曹
任刀筆文法多因循叔孫粗定禮陸生亦空論遂令四
百載治道苦未純區區損益間仁義誰與陳喟然歎王
迹魯史傷獲麟

蚤

猛虎食人肉蚤亦飲人血物微害則均利口縱饕餮虎
猛伏深山機穽常備設未若几榻間嚙膚抑何切鼓翼
鳴暗室類聚難撲滅夏蟲豈有知乘時倚炎熱遂令高
臥人魂夢猶杌杌安得涼風厲飄零始斷絕誰知絕又
生天公意殊別留爲生民害紛紛復何說

夏日山居

水曲山重與世違綠陰清晝映牕扉薰風一枕羲皇夢
起看沙禽自在飛
雨過飛泉響屋簷亂峰濕翠入疎簾蟬聲乍歇松風起
清坐能消永日炎

中秋

秋半氣候佳風月足燕賞胡爲今夕雨不覩冰輪上空
濛桂影寒蕭瑟蛩吟響安得清風吹雲開碧天朗點滴
聲未已坐久增悵惘待月如待客欲飲愁無兩鄉俗燒
夜香瓜果聊用享庭階香霧濕銀燭簾櫳敞幼女頗慧
黠拜祝善俯仰父母壽而康已身亦易長繞膝良慰情
欣然爲撫掌

讀經

聖人如日月煌煌垂六經秦火暫薄蝕萬古照汗青卓
哉漢羣儒表章闢戶庭貞觀定義疏伊洛煥列星遂爲
來學宗百家埽晦暝如何競浮華譬若草上螢我欲會
漢宋修明繼前型炳燭旣多愧微言復誰聽

讀香山詩集奉贈

昔日聞君名恨未識君面笠村吾故人相對數稱善不
憚風雪中欣慕願一見傾蓋平生歡結言共筆硯蓬牕
和高吟佳日陪清讌示我篋中作口誦復手拈聲與金
石鏘辭若雲霞變萬象歸渾涵片語出錘鍊感物多遠
託刺俗寓三歎藹然篤天倫風義何繾綣發言表心聲
肝膽略可辨棟也本孤植早歲交俊彥落落倚青松不
憂蔓草纏誰知同心友中道忽分散丈夫重意氣新故
自一貫莫謂交未深寸心良已眷晨夕望箴規庶用勵
愚悞

感懷二首

磊磊枝上梅采之侑尊斝尚想看花時轉盼忽已夏日
月屢推移少壯亦代謝過此寧復佳老境喻啖蔗風雨
苦無聊白日愧多暇我生竟何爲造物空相借
夜雨愁不寐晨鐘發深省百年晝復夜一身形共影况
我蒲柳姿已及桑榆景我父生我年我忽踐斯境當時
懸弧辰踵事設湯餅今我適初度劬勞徒自警

遊高氏園

行盡清溪上翠微萬竿修竹映柴扉山環小閣看雲出
亭對寒松待鶴歸春雨乍過芳草潤紅香初落綠陰肥
巖棲暫到多幽興結隱空懷十載違

遊支硎

風日清和春已微偶攜蠟屐到僧扉綠蘿花蔓緣崖上
碧澗泉鳴赴壑歸此地果能容嘯詠吾生終不羨輕肥
支公去後誰相賞坐對韶光意獨違

懷嘯園以江東日暮雲爲韻分得雲字

與君同臭味譬若芝蘭薰把酒忘形骸論詩窮夕昕如
何遠行役瞻望隔江雲數子夜相過念爾獨離羣明月
入我室恍然如對君

除夕同嘯園香山南岡淳夫以春星帶草堂爲韻
分得帶字

四序忽以周良朋幸來會相對各翛然高懷寄塵外刻
燭互唱酬妙句出天籟率爾強學步詩成陋自鄙歡言

芳潤堂詩藁卷一
酌春酒氣候漸和藹明朝歲華新樂事良未艾寒梅發
幽香湖山自襟帶相與理煙艇清景誰能繪醉歌萬花
中不覺乾坤大

芳潤堂詩藁卷一

芳潤堂詩藁卷二

吳縣 金國棟 最木

正月十三日桐邨招西郊探春即席分賦

闔閭城外春光好幾度尋春蹋青草春水春山是故人
祇覺年華去如埽今朝桐邨招我遊淡雲微雨隨輕舟
煙水空濛入幽討坐看山色迎雙眸雨歇停橈向林壑
空山無人境寥廓漠漠春寒花信遲小梅一枝初破萼
舟迴日落暮霞橫碧水黏天波不驚酒酣詩成明月上
漁歌互答如有情九十春光如過客探春轉眼春無迹
好將詩酒荅芳辰歸家重蠟登山屐

盆梅得昏字

梅花得氣先造化爲其根一株藏小室藹藹春風溫買
花從老圃移栽自山邨枝幹巧相接渾然無纖痕橫斜
踈影好蟠曲古意存膏雨潛入潤陽和爲返魂置之几
席間忽覩玉蕊繇花光浮茗椀花氣入酒尊瀟灑對夜
月婆娑映朝暎歎予阻幽討愧子來蓬門放曠林下姿
束縛就塵喧我將理煙櫂送子歸故園山空迴清寒湖
光相吐吞把臂攬香雪抗論共朝昏繫予非同調三歎
花無言

城南野步分韻

流光已過一分春重到城南眼底新雨裊林花紅沁頰
風吹池水綠生鱗石欄尚憶題詩處野徑曾無拾翠人

喬木蒼煙多古意遙看雲外碧嶙峋

初春西郊之遊相約探梅山中風雨不果桐邨賦
詩見寄依韻和答

長繩難繫羲烏足胡爲滾滾隨塵俗一停春色雨中過
遙望湖山阻游矚東風吹落山中梅使我空懷繼前躅
桐邨貽詩責寒盟斂師退舍知予曲猶喜三春強半存
采蘭修禊行當續林間鳩語早喚晴銜花蜂翅紛相觸
穠李夭桃次第開湖邊煙柳搖新綠春山相與縱幽尋
百壺潑灑傾芳醪

吉草菴

菴在城南斷崖和尚所創有寶曇者繼主法席

規建益宏竹樹茂密清溪環市匯爲廣池池中
兩石塔菴後崇岡縣亘上有古栝枝葉交翠曲
徑通幽禪房深淨石田先生曾來遊信宿有詩
及序二月二日同嘯園楓江香山過之老屋數
楹旁穿上漏池纔半畝涓涓細流餘盡廢爲菜
畦矣前後培塿小丘寒煙蔓草舉目荒涼惟石
塔尚在不勝今昔之感爰賦是詩并請諸同人

屬和

春風步屨游城南荒岡野水環茅菴石塔亭亭屹相對
小橋細路容幽探入門空寂庭草碧緇徒出迎纔兩三
顏垣未足障風雨老屋差擬棲僧龕此地荒僻身未到

豈知昔日名精藍斷崖首創自元季宗風未墜傳寶曇
流水滌洄若襟帶古木蒼翠蟠峰嵐梵響鐘聲出深竹
禪心秋月空寒潭高人來往寄幽興蒲團丈室留清談
至今遺詩尚可誦當年遊跡誰能諳滄桑自古多興廢
此理合與高僧叅

清真觀之右隙地數弓植梅百株暇日過之風雨
經旬殘花委地慨然成詩

小圃栽花滿茅亭賣酒頻偶來乘逸興可惜過芳辰點
石迷晴雪沾泥簇細鱗隨風香未散靄靄欲迎人

西山紀遊八首

存四首

胥江放舟

湖山緬清曠襟帶城西南江津棹初發遊目興已耽晨
光散煙霧喜覩天蔚藍亂流破明鏡挂蓬迎遠嵐洲渚
布綠淨林薄蒸紅酣愛此風日美亟與良朋探

高園

平生愛巖棲蹉跎意不遂名園傍羣巒林壑占清秘移
家固良圖終愧前言戲重來如吾廬周覽情所寄碧漲
沉黎雲小橋立翡翠撫景展奇懷徘徊發深喟昔爲綠
野園芳醕侑歌吹風月殊可談軒騎亦來萃如何鎖松
筠繁華一朝異惟有西山頭爽氣蒼然至

放鶴亭

養馬愛神駿養鶴沖雲霄灑落悟禪理標尚故自超我
來訪清躅去鶴不可招白雲空往還松風長蕭蕭

橫塘晚渡

舟迴日已曛風急浪花白炊煙近橫塘返照入林澤一
尊暖春寒不覺酒戶窄回頭望西山空濛雲樹碧

遊明瑟園五首

山路日將晚縈紆到上沙小橋橫壘翠深樹帶餘霞野
曠柴門迴溪迴竹徑斜翛然虛館靜開徧小桃花
共尋芳草徑來到綠陰中古樹敲池碧名花倚檻紅竹
光團葉几藤影入簾櫳暫坐平橋上清流處處通
小軒依釣渚面面對風漪掩映朱闌曲迴環翠竹陂遊
魚穿細浪啼鳥蹋低枝濠濮多幽興臨流好賦詩

林壑興無盡田園樂有餘籬邊逢野饁隴畔看春鉏
地課刪草疏渠學灌蔬主人能好事擇勝結蓬廬
瞻望松楸近年年此地過每來看水竹便擬住巖阿茅
屋何時構青山到處多蹉跎身漸老空自戀雲蘿

初夏山行

西郊重泛櫂景物足徜徉翠嶂如初沐明川似澹妝穿
林風絮滿夾路野花香小鳥盤雲上新篁透屋長薰風
翻麥浪碧樹暗池塘桑柘今年好山邨處處忙

八月十二日對月簡諸同人約遊虎丘

快雨洗殘暑涼風散塵襟仰觀雲氣豁明月當天心蟲
吟一何悲落葉忽以深今夕胡不樂白髮已盈簪我欲
彈素琴古調無知音我欲飲尊酒中夜誰共斟清光不
能寐所思在幽岑裁書結游侶把臂共入林緬懷蟋蟀
篇為樂庶在今

寒月

碧落高寒兔魄盈纖雲初卷夜三更風翻疎樹棲烏影
霜咽長天過鴈聲光射玉盤承露冷輝沉珠館浸波明
倚闌莫道衣裘薄身在冰壺徹骨清

讀書

吾家十餘世素業傳書詩篤生先君子卓犖非凡姿總
角入鄉校能文名四馳嗜好與俗異古學惟孜孜積書
幾萬卷不啻渴與飢晨夕不去手博覽無所遺學成屈

時命抱負一不施昔居三杏園伯仲吹埴篔牙籤插滿
架講論常相資未幾鎖松筠數載無人窺蠹魚穴故簡
風雨入空帷鄰家上牆屋掉臂來遊嬉竊書覆瓿甕毀
裂靡不爲余時依諸父蒙稗無聞知稍長過舊宅殘缺
那可追奮力事搜緝庶幾紹前規所得固不多讀之亦
忘疲沿波討其源培根暢其枝名儒共諮叩快若雲霧
披自此聞見擴下筆爲文辭尚賴師友力指授攻瑕疵
繩趨與尺步未足云恢奇平生頗澹退名位非我期樸
學儻有成遺志或在茲中歲涉險艱齒髮忽以衰况余
未抱子有書復貽誰終當付塵劫置之毋深悲潛德久
不耀振起愁無時愛此炳燭光撫卷有餘思

和東坡詩次韻

餽歲

斗酒可禦寒豚肩亦堪佐聊以充問遺情厚豈取貨歲
暮苦寂寥况乃風雪大此時菰蘆中寒士正高臥筐篚
入豪家薰灼傾四座誰能念窮交甚或躬馬磨我亦感
炎涼空言毋乃過安得敦古風一倡衆相和

別歲

老去歲行速轉疑少日遲回頭若昨夢一醒安可追茲
歲復當別惜別情無涯亦知有來歲少壯無還時星星
髮添白貌瘠不再肥及今且行樂飲酒忘我悲譬若送
行人揮手暫與辭馬齒縱加長意氣殊未衰

守歲

順時宜晏息喻彼蟄穴蛇胡爲坐不寐流光詎能遮一
歲已虛度此夕能幾何咄哉兒女情相守徒喧譁而我
獨緝書頻聞更鼓過夜深倦眼澀釋卷從橫斜盛年不
自力志業空蹉跎明朝又新春輸與年少誇

正月一日雪中嘯園桐邨上池南岡曉谷枉過次
和東坡聚星堂雪詩仍用歐陽公故事禁體物語

索諸君同作

破寒卯酒浮蕉葉開牕日眩堆簷雪天公豈爲歲華新
幻出光景真佳絕恰喜詩人蹋雪過出戶相迎屐齒折
呼童洗杓暖餘酒宿火爐中猶未滅積雪當階不忍埽
竹枝委地風來掣春風未到梅蕊凍欲憑綵筆催紅纈
酒酣詩就氣轉豪束縛塵勞詎我屑此時郊原最清曠
一片湖山正飄瞥擬作探春繼舊遊盡收風物歸來說
莫愁冰堅路泥濘便策馬蹄如踣鐵

分賦馬燈

古來神駿寫丹青誰製春燈巧象形紅燭流輝露赤汗
碧瞳閃燄綴華星火攻堅壘征蹄疾燒斷平原獵騎停
此夕兒童喧笑語簇成小隊繞中庭

贈嘯園

嘯園神仙才風貌如神仙能詩兼嗜酒太白堪比肩昔
爲梁園客抗禮王公前揮毫倚馬就落紙當筵傳聲名

震京洛言歸抑何遄註易萬山中精奧空陳編思參天
地祕光並日月懸吳中古勝壤游跡多名賢先生性不
羈移家爲林泉敝居幸密邇一見申惓惓論文晨夕共
把臂形骸捐湖山乘逸興花月常留連數子互酬倡脫
橐煩陶甄人生期不朽疇能金石堅卓哉千秋業詞章
陋雕鐫安得附青雲與子相後先

贈楓江

交道今不講聚散水上萍楓江篤氣誼吾黨之典型落
落秋天高挺挺寒松青視余猶同氣與子各忘形七載
共一室誨我如箴銘君家名儒後風雅傳門庭屬辭兼
比興下筆驚風霆卓犖命世才壯志困一經鯤鵬行變
化奮翼凌滄溟卑栖慚斥鷃弱翻傷飄零願得托下風
此語君宜聽

贈南岡

通門敦世好卜宅幸同里見君垂髫時神清若秋水顧
謂椒圃翁賀翁得才子一試冠其曹頭角纔露耳文章
與年進芳華播蘭芷詩思更清新大雅追前軌晨夕過
荒齋聞聲輒倒屣相對無雜言高詠移日晷辭鋒發新
硯文陣破堅壘愧予先致師往往三舍徒君本磊落人
詭遇性所恥聲名久不振况乃紆青紫交君父子間昔
爲羣拜紀邇來共吟社屈指推國士行當寫君詩一日
傳萬紙莫歎知音希卷中有知己

贈桐邨

爾母吾之姑吾父爾之舅異姓實兄弟吾長爾稍後童
蒙共嬉遊出入常相友逮長爲重親來往情愈厚相過
必信宿經旬復聚首同學三數人鏃厲期不朽高懷寄
風月文彩麗星斗酒酣各狂吟予亦忘其醜愛君醞藉
人雅量涵衆有潔修比白玉表裏無瑕垢亮節同青松
風霜可耐久清門貽一經澹泊甘自守終當振先聲取
印繫於肘

贈曉谷

仲華初拜袞士衡始入洛君年與之齊胡爲尚寂寞况
君雋爽姿風骨清於鶴早登翰墨場卓爾繼往作秀句
擷春華光芒淬霜鏗讀書多妙悟丹鉛綜七略字畫更
遒勁追摹古釵脚閒情較奕品餘事及方藥與君共襟
期衰晚深寄托藝至不兩能才多或患博煌煌六經文
此外盡糟粕沉潛三載功如耕得秋穫奮身青雲端迴
翔縱寥廓

泛舟探梅由胥江至塘灣

出郭喜初晴遙指梅花宅雲開數峰青日漾一川碧浮
煙澹空濛落景迴光射犬吠近山邨漁唱起林澤當天
月隨行映水星可摘清夜泛溪流何異乘槎客

經聖恩寺至錢家磯

翠竹蔽山麓古梅繞石欄冷然一聲鐘如聽維摩禪穿

花入籬落橫枝低拂冠逶迤到山趾人家住湖干雲霄
森危峰履鳥凌飛湍春帆天際孤小鳥隨風盤花在山
水間高下萬樹攢白雲出谷口積雪明林端徘徊坐盤
石香靄徹肺肝更欲窮花徑路遠未易殫

萬峰臺

湖光到處佳平生欣未覲又上萬峰臺蒼茫衆景湊春
水與雲浮微風淥波皺洞庭相對峙奕奕饒神秀遠近
羅羣峰濃淡畫難就一望天鏡寬爲我洗塵陋

六浮閣

青山不逢人信美誰能傳風流李檀園於此常留連至
今六浮名卜築因前賢當時願未就成此幾百年我來
慕芳躅憑眺心悠然千花散林皋清芬蕩晴煙粘天春
水碧點綴青峰巔西山幽絕處勝槩茲爲全遐觀復長
嘯夕陽促歸鞭吾亦志巖栖毋乃空惓惓

由西磧山至熨斗柄

鬱盤西磧山曠蕩太湖水緣崖花連邨氤氳夕陽裏幽
蹊望欲迷步步香風起穿籬趨湖濬山勢益奇詭峻壁
砥中流衝擊如陣壘歲久剝蝕痕依稀見文字巖竇或
棲雲漱石可礪齒發興窮幽遐盡日爲佳耳僕夫屢告
勞同遊意欲止違衆向前途始知此地美徒倚望煙巒
欲濟波瀾瀾

虎山橋玩月

兩厓如斷岸一水橫長虹忽然明鏡開螺髻浮青空舟
迴步溪橋少焉月升東夜深萬籟寂長嘯迎清風憶從
諸父遊聲伎追豪雄余時駕一葉弄月煙波中俯仰三
十霜兒童忽成翁惟有湖山在蒼茫今古同

積翠菴

四山環如城夾路松陰碧澗底流泉鳴時見梅花白行
行山塢深迥與塵蹤隔修竹連雲霄翠影千層積入林
對蕭森時有寒風射山僧貌樸野開戶迎來客峭壁翼
崇岡結構天然闢菩提種何年扶疎已百尺花時爛盈
庭幽香悅魂魄躡足登巉巖茅篷更幽僻聞有逃禪徒
來此共晨夕幸茲半日閒清談意頗適笑指庭花開重

來繼遊跡

靈巖山

岩堯館娃宮今作梵王殿勝蹟餘蒼厓千載一飛電探
幽鼓餘興攀躋尚未倦山石多離奇路轉峰巒變美人
竟何許遺跡徒歆羨松風響空廊游鱗唼池面清迴雲
外鐘猶疑警荒宴昔予住山下步屨來往便移居入城
市童遊意所戀青山如故人別久重相見徜徉日已西
佳境恨未徧

芳潤堂詩藁卷二

昔孔子之稱詩教也曰溫柔敦厚工部之美太白也曰
清新俊逸夫本溫柔敦厚之意而發以清新俊逸之氣
其於詩也思過半矣予姪敬思性好吟咏久而篇什益
富間是正於予予喜其不加雕績自饒情韻溲然盎然
如春溪綠淨遇柔風而生微波也不有合於尼山少陵
之所稱說乎進而不舍入唐人之堂奧不難矣叔繼讓
題

桐邨詩彙

早梅

吳縣

繆宗儼

敬思

偏乘殘臘試瓊姿豈是天公別有私人愛嶺頭全盛日
我憐庭際獨開時光搖晴雪花難辨香入寒風春未知
似此寂寥誰鬪豔孤標應笑衆芳遲

遊支硎即目

幽蹊旋折入峻嶒樓閣依山翠靄凝誰道牡丹零落後
紅妝還向曲欄凭
隔林遠火射清波帶月牽留柳際多青嶂迴風催去棹
數聲呶軋雜漁歌

歲暮寫懷四首次秦南岡韻

蹉跎違壯志，偃蹇惜殘年。身賤何人問，途窮祇自憐。
敝裘聊卒歲，沽酒笑無錢。風雨寒燈下，愁懷倍黯然。
有兄羈遠宦，底事阻書來。鳧影雲中杳，鴈聲江上哀。
夜寒思大被，曉夢過瓊臺。何日重攜手，圍爐尊酒開。
養生宜習靜，多病鬢將絲。雪霽魚窺藻，天寒鳥啁枝。
消愁憑玉蕤，寄興詠江蘼。埽閣焚香坐，閒翻一帙詩。
虛館無人過，清宵續舊題。燭殘寒睡鴨，漏永咽鳴雞。
躡雪興偏少，探梅花未齊。寂寥誰共語，落月映牕低。

芳潤堂牡丹

昔年種花當春明，恰如幽谷來傾城。天公亦愛此花好，
露滋雨潤叢枝生。今年開比去年盛，滿庭香豔羅繡英。
主人獨賞興未已，招邀嘉客飛瑤觥。幾度看花花識面，
嫣然一笑如相迎。曉霞晚日各盡態，月光燈影交移情。
花發年年不改色，人事紛更獨難測。檢點尊前少一人，
回首春風長太息。

懷朱嘯園分得東字

人生有聚散，浮雲信西東。憶昔識君面，歡然意氣同。
論文對尊酒，辨難開愚蒙。一旦忽分手，孤影隨飛蓬。
才人不得志，往往嗟途窮。前日送君去，春風桃杏紅。
分攜復幾時，芳草已芄芄。遙望隔江水，潮汐信未通。
思君不成寐，落月窺簾櫳。

遊支硎次金最木韻

山氣空濛翠色微，寺藏深竹不知扉。
數聲啼鳥雨初歇，滿徑落花春欲歸。
昨見鬢鬢官柳嫩，重來磊磊野梅肥。
清遊別有閑滋味，同此登臨與俗違。

西郊探春

東風澹蕩林端來，幽窗夢覺思尋梅。
遙知西郊春滿路，招攜嘉客同銜杯。
輕鷗矯翼迎船起，山色波光兩清美。
霏微何處暗香浮，煙外一枝新破蕊。
波底遊魚靜不驚，家家屋上春禽鳴。
縱然此地頻來往，景物流連各有情。
人生只合恣幽討，胡爲抑鬱傷懷抱。
世事從來水面漚，及時莫放春光老。

最木約入山探梅會風雨不果朝來喜晴賦此簡

寄

平生愛花看不足，况是梅花更超俗。
主人逸興好尋幽，曾約春山寄遥矚。
那堪雨急春風顛，閉戶沉吟自躑躅。
坐看細草階前生，不覺百端亂心曲。
茲晨薄日透虛牕，雨聲忽斷禽聲續。
飛揚如入空山中，寒馥依依暗相觸。
煙雲散盡千峰青，陂塘處處浮新綠。
莫遣春風冷笑人，急喚輕舟具醽醑。

盆梅

盆梅開獨早，一室生春光。
會心不在遠，咫尺羅浮香。
惜哉山中花，放曠無何鄉。
天公每相妬，日夕風雨狂。
何如

一盞間寄托無摧戕霜禽不棲枝凍蝶不尋芳蕭然南
牕下花與人相忘

吉草菴次最木韻

年年尋春到城南不知蘿逕藏茅菴芳潤主人頗好事
遙聞鐘響隨窮探歸來爲予話清景欲語不覺歎者三
謂此由來稱勝蹟歲久寥落餘花龕禪扉靜開竹風下
小池雨漲遙接藍殘壁題詩蒼蘚沒跣趺丈室空瞿曇
盛衰俯仰感今昔暮林荒阜來山嵐聞言歷歷宛在目
塵心如洗臨清潭平生未識楞伽意安得靜聽高僧談
世人苦被塵網縛蚩蚩此意誰能諳一菴興廢何足論
萬事錯迕皆須參

偶遊小圃見落梅有感

步屨臨煙徑閒園花落頻孤芳如避俗冷豔不逢辰著
地香黏屐浮尊酒感鱗斷魂誰索笑點點正愁人

二月十三日得家兄書

春鳩屋上鳴芳草階前綠臨風悵然正憶君忽得家書
勝金玉接書在手未及觀先從使者問平安開緘恍忽
如晤對蠻煙瘴雨隨毫端上言五載長別離下言不久
當團圓一官久已輕雞肋解組行將還故國何處幽深
堪結廬爲我買山同釣弋讀罷悲歡并一時嗟君遠宦
久羈縻相違萬里難會面喜得寄語知歸期去年細札
燈前發猿啼鴈叫當秋月今朝書到已深春花紅柳翠

鶯聲滑不愁尺素杳難通却惜時光去飄忽

西山紀遊七首

胥江放舟

出遊撰良辰江天喜澄霽雨歇草木潤煙空雲景麗波
間一葉輕超越隨風逝回望城郭遙野綠浩無際春花
繞通川垂柳迎蘭柁極目西山青倚舷結遙契

放鶴亭

支公跨鶴去無人識幽蹤誰爲構此亭山腰樹蔕龍煙
蘿垂裊裊流水鳴淙淙仙馭不復返千載留高松徘徊
坐盤石白雲滿南峰

千尺雪

嶽崮聳高峰倒挂雪千尺噴珠碎却圓跳沫瀉復逆忽
驚銀漢傾旋駭飛電激響雜松聲寒流迸雲根坼我欲
洗塵心來此漱瓊液

法螺

茲山邃以深幽蹊曲不斷縈紆屢移渡修竹自纂纂禽
響與泉聲引我閑步緩殿閣倚山出山青雨新澣花藥
羅階除香氣日夕滿

天平嶺

度嶺摩青霄空翠衣欲濕何年風吹雲飛作萬石立攀
松陟其巔湖光俯堪挹依微浸遠山隱約漁舟集登茲
眼界寬山川在呼吸

獅山

崖口衆山斷橫嶺何突兀起伏勢猙獰雄詭卓天骨巉
石抉牙爪灌莽動毛髮驚風入松林震若吼聲發疑叅
馬祖禪噓噓欲出窟

橫塘晚渡

歡賞未云歇暝色來遠樹挂席移歸舟洗醖酌清醑燭
光波上動漁唱聲交互遙見人煙雜知是橫塘路遲迴
良夜遊緩棹到前渡

遊明瑟園五首

沙浦埃塵外幽居水竹間林深交細路檻曲俯清灣山
鳥知迎客畦丁爲啓關名園春倍好風暖雜花斑

依岫雲連屋交枝樹作棚石橋凌水闊洞戶對山明籬
外逢溪釣亭前見野耕蕭然自成趣徙倚覺神清
苔和芳草色桃亞綠楊枝捲幔爐香出當窗日影遲小
園閒作賦叢竹醉題詩山水清音在何煩絲竹隨
素萼堆晴雪紅英絢綵霞燕來知迸筍鶯語惜飛花聽
雨宜高閣又魚便小艇相看無限景何處是仙家
未盡登臨興相將緩緩歸花當斜日斂鳥帶落霞飛遙
指雲山暝回看臺榭微薔薇春晚發重約醉芳菲

蜀葵

花開一丈紅灼爍滿庭中向日心仍一舒葩色不同疎
莖挹微露密葉動清風常詠嘉州句開尊對碧叢

菖蒲

昌陽稱瑞草採食可長年白石盤根老清泉養葉鮮千
齡龍骨瘦九節虎鬚堅泛酒傾杯綠微醺即是仙

蒜

夏雨滋膏壤畦町葉葉鮮根從絕域得種向萬山傳獨
顆輕綃裹分囊嫩玉聯高風懷仲叔貧不受人憐

艾

醫草重蘄州春苗入夏稠象人懸戶上剪虎繫釵頭治
病三年蓄蠲邪五日收瓶中叅綠葉瀟灑映葵榴

石湖阻風游石佛寺

濕雲潑墨風怒號石湖水急鳴洪濤浪花高捲打船尾

纜繫猶恐非堅牢篷窗忽見遠峰入樹裏傑閣連雲高
灘邊信步入古寺老衲破壁艾蓬蒿危亭飛榭俯絕巘
面對湖水波滔滔壯聲初疑嘯猛虎巨勢又若翻鯨鼇
漁子操舟若風疾一葉掀舞如鴻毛我獨胡爲不得渡
見此頗覺心膽豪何當乘流借輕舸揚舠擊楫歌且謠
放浪煙水同逋逃

送春辭四首

東風初拂柳條輕看盡花開草又生春色自來還自去
不知何事獨關情

片片花飛綠葉新暮寒庭院最愁人驚回清夢三更雨
暗度風光不是春

韶光已逐水東流望遠傷心獨倚樓莫道春風偏惹恨
鳥啼花落更多愁

留春不住轉悽悽蝶懶蜂慵日易低芳草垂楊俱是恨
嬌鶯從此不須啼

紅葉

紛紛木葉盡摧殘獨有楓林綺繡攢一夜風高失故綠
萬山霜重染新丹吳江日落含煙冷吾谷秋深帶雨寒
豈是天公恨蕭瑟重施濃豔作花看

正月一日雪中過芳潤堂用東坡聚星堂詩韻

浙瀝夜窗疑墜葉晨光照耀庭堆雪歲朝得此殊可賀
三白連年嗟久絕平鋪矮屋積漸高低壓枯枝垂欲折
家家閉戶息塵勞城外城中行迹滅自笑出門何所詣
一到君家便挽掣閒徵雅令搜腹笥頻泛清尊照眼纈
主人勸飲猶未休嘉客清談醉霏屑不知見曉雪已消
一片寒光去如瞥歡呼豈獨愛佳景年豐野老先傳說
從今風雨願無愆佇看買牛銷佩鐵

諸同人分賦初春草木爲余四十初度余得水仙

花敬用酬答

寒花濯濯微香起不染淤泥自清泚嫩葉飄蕭水石間
柔莖搖曳冰霜裏莫嫌澹泊未逢辰香草江梅獨與親
一種清芬同臭味羞隨桃李鬪鮮新托根盆盎原如寄
春深花過留深翠豈如奇樹產拘樓一飲仙漿七日醉

生日

平頭四十愧無成未報劬勞虛此生歲過一旬添馬齒
春來五日變禽聲看雲憶弟腸應斷聽雨思兄夢亦驚
鏡裏星星雙鬢改那堪義馭不留行

過涿水園訪朱嘯園秦上池南岡兄弟不遇用石
上詩韻

柴門深掩足清幽爲訪高賢復此遊却值志和乘野艇
不逢貞白在層樓春回墻角林花發雨過階前澗水流
徒倚石闌人寂寂虛亭髣髴是虛舟

買花歌

山塘花滿市有若錦繡堆冶遊買花厚輸直攀條弄葉
多裴徊珍重泥封復水注碧盞縹瓷雜紅素春風擔得
陌上歸遊蜂舞蝶還隨路我來看花殊可憐輟然一笑
囊無錢無錢買芳華惟將命乞花或尋山之阿或問水
之涯一春蹋破幾兩屐贏得與花共朝夕

次南岡韻

與世寡交歡柴門罕人迹雖無山水樂聊用安吾宅軒
窗春色深玉蘭花漸白延君慰索居蓬徑埽紛積佳句
得隋珠清光照四壁移情藉琴尊疑義徵典籍孤高絕
氛塵瀟灑見標格在昔樂追攀期與永朝夕茲得申平
生夙心幸弗逆世路若波瀾誰能固金石忘形無爾汝
襟懷各坦適願言篤惠好歷久無睽隔

友人送牡丹

平生愛花藥每值春紛披牡丹富貴花荒徑非所宜東
鄰舉相贈冒雨今朝移謂此因荆棘顛顛少華滋我見
忽興歎世事常如斯不見東陵侯亦有種瓜時壅土培
其根插竹扶其枝何須怨春風聊爾安藩籬

泛舟即事三首

小舫風微漾綠汀澄波如縠樹如屏薄籠嵐氣山腰白
只露峰尖一抹青

澹澹墟煙繞樹斜岸花依約晚雲遮夕陽已沒青山外
猶帶餘光作紫霞

一弓明月絕氛埃明日晴山好看梅忽聽疎篁風外響

颼颼故作雨聲來

泛舟探梅由胥江宿塘灣

梅花天所愛遣此風日妍颿輕瀉清澗山光鬱蒼然已
見岸花白早識開空山萬峰望不及倚棹心飛騫夕陽
忽墮嶺浮浮墟里煙樹杪明月上流光隨我船犬聲近
邨落繫纜春溪邊柳枝拂篷窗颯颯驚醉眠

錢家壩

探梅得幽勝窈窕石徑邃面湖接煙光背嶺陰空翠造
化闢山川梅花真得地延緣入花叢疎香襲衣袂駘蕩
心神融清曠耳目異悄然不逢人靈境天所闕

六浮閣

查山雖不高礪磊多奇石傑閣構雲峰栽梅作花宅晴
雪明疎櫺幽香團几席太湖湛明鏡遙峰澹浮碧延佇
欲忘歸杳靄川光夕

虎山橋翫月

山白月當空平波乍摩瑩入雲澹欲無蕩水光難定長
松倚層崖風吹韻笙磬橋下漁舟歸櫂歌清入聽夜深
羣動息一嘯衆山應

拈花菴

山徑何縈迂林隙日光吐小橋跨清溪短籬當環堵精
廬去雕飾一望氣象古飛泉靜更聞遠峰青可數幽鳥
不驚人時來窺廊廡對此樂忘機一笑謝塵土

靈巖

石磴平如砥雲飛山欲動嘉木藹餘清禽聲風遞送疎
鐘響入雲忽破塵土夢池魚樂浮沉啜餌時一縱逶迤
上香臺梵偈聞高誦修廊屨沉響空臺琴罷弄陳迹逐
浮雲青苔遍巖洞登閣瞰湖光鳥飛天宇空

去歲己丑五月十五日聞伯兄訃三弟友陶即束
裝就道扶櫬迄今杳然予旣悼兄之歿而又念弟
之未歸也率成是詩

死別痛難忍生別情何已人生苦離別而况兄與弟嗟
予有兄弟相依若唇齒自兄官瓊南迢迢八千里六載
不相見雖生已如死蠻荒瘴癘地一病入骨髓昨歲得

凶問淚落如流水呼天天不聞誰謂天有耳是時夏五月雨濕悲風灑陰雲慘不開夜泣聞新鬼海天杳茫茫羈魂何所倚孤嫂守總帷二女哭靈几誰人衛輜車相送歸桑梓俶裝事長征吾分固應爾子弟泣相告我行君當止于役弟久便所歷况舊軌觸熱赴險艱不顧家室累萬里一身孤淒涼傷客邸掛樹斷猿腸揚波掣鯨尾留滯不還家時來夢魂裏出卜問行蹤計程時屈指哭兄既眼枯憶弟恒垂涕生者胡不歸死者長已矣作歌歌未終燈暗雁聲起

繡毬花

瓊葩爛漫殿春殘琢玉玲瓏映石闌何處落梅千百片

飛來枝上簇成團

松陰夢

長松翠落青山影雲臥不知盤石冷飄然仙骨凌青蒼塵夢何由來此境綠陰縈繞冰魂清一枕度盡秋風聲飛泉淙淙響巖谷覺來山月當空明

和南岡春暮有感二首

殘花著雨落莓苔亭午柴關尚未開莫怪空齋無客過家貧新燕不飛來

綠樹鶯啼到夕暉柳花點點撲書幃天涯芳草知應遍惆悵春歸人未歸

桐邨詩藁

含真秦子學詩有年非夫人之所謂鏤刻爲工而固有其道也曩與子俱從吾師匠門張先生遊又得因之折中於竹垞先生故其詩詳別僞製浸淫風騷大要以陶寫性情發摠湮鬱自然協律者爲宗至靈微要渺吾師固不能言傳而含真獨有得焉子則心知其然而未能及之者也自吾師往京都子學日荒而含真獨加精專遇益窮而詩益工間讀之則紆餘洋溢之態足以感人其格力亦日造自然所謂非人之所爲工者含真殆無媿焉金君最木常與倡和愛其詩而謀刻之子故書其卷端以見詩之有道含真學之深不偶然也康熙四十九年五月吳江同學弟李重華

秦子含真出詩一卷見示且曰吾詩不盡於此此梁谿
朱君贊皇所選錄願子一言題其卷首予伏而誦之大
抵不事雕繪蕭散冲澹得自然之致尤長於寄託不爲
苟作迹其所自言志亦庶幾能守其素不競進以俟時
之君子也含真爲吾家櫟菴先生孫壻熟知其能文又
以餘力能旁及於詩今卷中諸作直駸駸乎登古作者
之堂而入其室矣如予者久窮於世其言何足爲含真
重况贊皇詩名籍甚又精於鑒別亟稱含真可與道古
則含真之詩寧有待於余言哉吳江同學弟吳覲文

草草亭詩藁

長洲 秦應陽 南岡

園居

蕭蕭一畝園淶水漾其側軒窗於此開蘋藻有鮮色養
拙塵事稀塊獨衆緣息溶溶水天雲舒卷不可即吟嘯
激清泠澄懷與無極

梧桐蔭南軒小鳥來啁啾斯世無鸞皇且復容其遊孤
蹤鮮所託守樸栖蓬丘即物聊與歡微吟以相酬拂石
橫金徽寫此中情幽往哲多予師知音何用求

雨餘種園蔬生意忽可觀採擷芣羹湯芬苾亦滿盤歡
顏奉慈闈時復勸加餐食貧養不足明發心未安強求

懼貽辱膏粱非所難

穉弟乃可憐讀書抱微慧琅琅牕間聲聽之感垂涕先
人昔課我素業期相繼媿茲樗櫟材嗟爾宜自勵新松
映虛檐已具凌雲勢毋爲歎飄飄植立在根柢

日長坐忘飢一卷靜搜討志士希進修富貴不期早風
霜四壁侵歷歲轉潦倒病妻需藥餌嬌女索梨棗嗔喜
偶然并中情忽如搗何當棄詩書躬刈西疇草憂道不
憂貧此志用常保

昔聞南邨居樂多素心人我生鮮所諧相契形影神巷
南二子顧我情獨親跌宕餘習氣轉用賞吾真酌酒
談風詩拏舟玩山春風節敦歲寒且以娛良辰

舟過雪浪河有懷陳鹿嘉

風雨一川迷孤舟晚來渡遙思故人家只在煙邨住不
及前溪鷗翻翻入煙去

春郊行

金閭亭邊桃李花千枝萬枝春風斜吳姬十五慣沽酒
花裏纖纖垂素手橫波一盼知爲誰門外遊人暗回首
青驄馬紫絲韁笑指酒旗下醉臥酒壚傍鷓鴣杓深醒
更酌人生百年貴行樂吳姬莫自誇盛年幾見紅顏常
綽約斜陽揮鞭簇馬蹄馬蹄蹋花旋作泥

野步

殘梅飄逕滿繁杏俯溪明物色已如此我行空復情雨

痕新水活山態野煙輕芳草如愁思仍憐到處生

簡金最木

卷中傑作霏雲煙門前深轍留高賢危樓攤書一萬軸
况有二頃城南田嗟君得此亦可樂何為兀兀沉憂煎
人間憂患誰得免處之要在能恬然精金從來出百鍊
試我盤錯寧非天我聞至人坐空山道心歷盡冰霜堅
山精木客壘相侮毒蛇猛虎遊其前我心不動物莫害
么膺伎倆徒堪憐人生壽命非金石順運庶使神完全
憂來成病復憂病參苓那得供長年我生多病復坎坷
幸未即死餘癡顛嚴霜已零寒菊豔期君同醉東籬邊
休休且吟蟋蟀詩楚楚莫憶蜉蝣篇

古意

竹垞先生說經
芳潤堂分題

漢川有修竹紫玉森千莖寒枝青霞宿陰葉多露傾結
實餐鳳皇飛下時和鳴一朝鳳遠舉誰知竹虛生翦伐
諒不辭斲取成瑤笙清風鏘然來常留鳳皇聲

謁泰伯廟

至德傳遺廟鬼峩鎮要津荒庭紛藥草碧瓦簇魚鱗
綠封碑古雲紅照檻新虹梁通市陌繡戶壓城闈一片
繡華地千秋立極人仲雍齊亮節季札踵清塵享得吳
歌侑牲將周鼎陳衣冠思雅化榱桷肅明禋遺像瞻當
日樞衣拜此辰平生頑懦意感激有天真

葉烈婦詩

婦孫氏其夫死翁逼之嫁投溪水而死吳翊聖
述其事爰賦此詩

天目萬山水分流下曹溪曹溪接震澤徹底清無泥東
西十數里桑竹連邨起邨中有好女本是農家子面白
不傅粉脣紅不塗脂十三學織布十五學治絲生長田
舍中不識書與詩嫁作邨西婦舉動有禮儀入厨作羹
湯翁姑稱可口新郎愛新婦兩步一回首妾自上機織
郎自下田耕織絹備寒衣耕田冀秋成阿翁晨下田郎
逐阿翁行郎性婉而勤翁性戾而猛指摘到纖微鞭撻
不時逞勸翁翁不解長跪爲郎請三載到郎家習知翁
性然翁性妾敢怨郎病妾自憐郎病翁不知郎死妾何

爲同衾不同棺恨恨莫由隨低徊遲一死所冀叔生子
撫養作郎後下慰黃泉裏嚶嚶倉庚鳴桑葉何菁菁自
郎身歿後采葉怕朝行寒燈淡生光機杼冷如霜傷心
織成絹無複製郎裳天長日易落倏忽閱寒暑東鄰見
新婦嘖嘖爲翁語婦少又無子不嫁義何取我有大兒
郎阿翁好爲主翁言固我意未知婦肯不入門呼婦語
聞言雙淚流生爲翁家婦死作翁家鬼翁請勿復言妾
志已如此翁言婦年少無子而家貧婦欲守不嫁誰爲
養婦身婦言翁勿憂何事累翁爲十三學織布十五學
治絲紡織少所諳朝昏粗可支強欲逼婦行一死何足
辭阿翁聽婦言出門私詈詬默思與婦言其事終不就

歡顏謂東鄰新婦已相許爾今備禮儀此事宜速舉東
鄰大歡喜殷殷謝阿翁開箱出羅綺兩兩間青紅紅俾
婦作裙青俾婦作襖金鳳銜珍珠釵環攢八寶擇日送
翁家婦知心獨苦忍淚坐空閨不言亦不語阿翁私覘
婦疑是亦心許婦趁無人時開奩覓鍼綫上衣及下裳
一一縫之遍老姑呼婦餐私取厨中膳逕往野田邊哭
向郎棺奠奠郎郎不見哭郎郎無聲飛雲亦徘徊飛鳥
亦悲鳴翻身赴清溪從此畢妾生溪流何湯湯溪風日
淒淒至今野鴛鴦不敢此間栖

燈下看盆梅水仙

窗融蟬翼輕風隔熒熒照影春燈碧誰伴孤吟坐夜分
清寒贏得花相惜翠袖嬌扶淡淡妝別勻輕粉鬪新黃
檀心麝屑誰深淺并作氤氳一段香江妃含顰洛妃笑
幾回相對仍年少夜寒未忍背花眠欲眠重起迴燈照

題秋花冊

往時癖性愛秋花手闢林塘種無隙荒圃清秋儼畫圖
新妍繞遍臨溪宅水邊嫋嫋弄柔紅墻角垂垂綴寒碧
玉葉中心屑紫檀翠苞枝上飛仙舄向陽叢萼傍檐舒
背陰小朵當堦坼籬下寒香更吐奇黃鵝紫鳳嬌翻翻
艸亂花繅不記名風枝露葉鮮堪摘十載移居入郡城
飢驅未暇營花石小園亦自羅松篁秋來風物愁狼籍
豆藤瓜蔓繞柴籬蟲絲半罨莪葵瘠鄰園豈無百種花

乞栽兼苦分畦窄墻東野客幽興多裝成示我秋花冊
良工摹寫生色饒令我展翫增憐惜恍然如向故園秋
夢落垂虹草堂夕

蟬

寒蟬坐喬木垂緜時一鳴迎風挹高爽飲露占潔清豈
知汙泥中變化真隔生君子恕舊惡達節觀晚成

蜘蛛

蜘蛛腹彭亨亦自蘊經緯營成密密網中據何雄毅飛
蟲偶相櫻斂翅無生氣世網盡如斯何處不可畏

螢

腐草化爲螢輝輝草際飛自照亦有餘勿謂其光微雨
餘看愈多月下數略稀清霜幸未來蓬蒿任相依

蜻蜓

蜻蜓四翼輕高飛本無力欸欸點清池亭亭立叢棘癡
雲偶然興千百蔽天黑此物亦何能空思附龍翼

蠖

有物生夏木蝕葉抑何酷龍蔥蔽日陰濯濯隨轉矚葉
盡身亦墮盈階手難觸爛斑文彩身誰識鋒芒毒

蠅

蠅生趁炎暑營營鳴得意族類頗不同可憎亦無二列
饌呼羣來陳冰側身避安得無熱丘此輩不能至

飛蛾

飛蛾就明燈隨以自焚灼無知最可憐死亦豈所樂物
情戒妄動宵旦不可錯太陽當空行羣生任飛躍

蚓

蚓生土壤中即土以爲糧屈伸本無心塊然安故常入
夏天久旱龜紋坼野場蠕蠕爾何辜出爲蟲蟻傷

題張顓三水周林次匠門先生韻

清溪有畸人胸懷淼秋水鶴立超風埃翛然傍城市誅
茅對松筠漱芳擷蘅芷珊瑚作釣竿往往逐漁子
澄潭蔭喬柯著屋如藏舟遙遙窗中帆煙外隨浮鷗雲
濤壓几席風月宜春秋載酒愛奇客晨夕來環周
隔水暗籬落禪房出疎林得此塵外觀愜我靜者心煙

鐘散遠響風鐸傳清音忘機幸無嫌高僧許同尋

鷄冠

昂宿正凝精鷄冠早吐英翼翻分綴葉吮引獨抽莖猩
血千層染丹砂一片明雌含猶斂伏雄負或崢嶸粉蝶
應相避青蟲敢乍櫻雨淋垂似啄風觸鬪無聲紫鳳分
儔侶黃鵝列弟兄白兼華表鶴綠比隴山鸚朱粉圖難
盡搜羅態別呈荔支圓未摘木筆穎初生錦被樓前曬
珊瑚石畔擎玲瓏張羽蓋纖細胷珠纓種處宜金谷移
歸定赤城凭闌愛秋晚霜菊共敷榮

中秋前一日最木招遊虎丘同徐穉筠丁桓審繆
桐邨曉谷兄弟張孟養作

中秋風物正輕明高柳疎花遶郡城新水似雲山似黛
蘋香濃襯畫船行

朱樓白堦對嗟峨指點年來幾度過最是湖山好風月
詩瓢留得酒痕多

茉莉開殘桂粟肥看花人盡買花歸園丁不分空囊客
分得幽香滿素衣

沉醉還須喚酒杯人生何處首堪回花前檢點尊前客
可似前秋箇箇來

秋晚泛石湖有感

為任齋尹先生營葬地

指點蒼茫路未窮湖波清淺漾孤篷半山殘照沉寒碧
幾樹秋雲暗冷紅聚散沙禽驚逝水榮枯木葉信飄風

誰知滿眼山陽淚引入漁舟一笛中

采蓮曲

江上荷花十里深看花一度一沉吟清江似鏡花如妾
照見花顏不見心

千頃澄波浸晚霞晚風吹鬢綠鬢愁郎無路來迎我
江北江南總是花

秋郊夜泊

寒雲黏天鴈聲苦西風吹散三更雨青熒燐火遍荒郊
切切煙中鬼相語溪山如夢夜幽幽淡月朦朧照髑髏
終古遊魂招不得青楓林上叫鴝鷓

韓園看梅同李實君作

春暉門外萬株梅信步幽尋日幾迴江上羈懷空自笑
被人猜作看花來

梅藏修竹竹穿山山外江光縹緲間天宇寥寥啼鳥歇
箇中清氣隔人寰

荒池高閣半荆榛斷碣憑誰訪昔人只有梅花無冷熱
年年常放十分春

苔侵古榦影離披未許千金買一枝粉墨祇應期妙手
荒園誰解賞清奇

同實君遊鵝鼻山作

黃山枕大江君山隱相對迴岡矗鵝鼻奇險豁蒙昧潮
來山頂浮浪激巨石碎裂疑龜紋坼迴似鰲首戴紛如

蛻龍骨長或亘蛟背其形分秀頽其色襍蒼黛玲瓏奪
人巧斧鑿具衆態窪深積水停洞黑幽宮在荒寒藏異
境知閱幾時代鼃鼃曝晴明舟航指冥晦曾無紀遊人
磨崖名偶載我來同勝侶高叫詎能耐興豪忘足疲攀
陟了無礙長江若成酒醉此死無悔乾坤蘊奇絕發揮
待吾輩怪彼遊君山紛紛逐行隊

澄江客舍送鹿嘉

江天梅花如雪繖寒香想見浮荒園歸心脈脈被花惱
幸君情話同朝昏一尊未醉梅花底煙邊已把歸帆理
送君何處引離愁船頭百折澄江水

哭郁誕寧

忽漫成長別平生杳莫追天乎何至此逝者竟如斯弱
子髮初燥孀親鬢已絲情深膠漆契念爾不勝悲
五載南州榻相于辱弟昆話深愁燭短吟苦愛盃温自
得新秋作惟聞伏枕言不堪回首處總帳夕風翻
筠石仍三逕含悽忍再過聯牀魂夢在開卷淚痕多天
壽何須道文章定不磨慰君還自悟世事總南柯

遊高氏林亭次最木韻

雨過春山宿靄微登臨乘興歛巖扉別開雲壑翻疑畫
喜到林泉却似歸水暖一灣蘋葉細土香三逕藥苗肥
誅茅有約同酬倡莫遣南邨素願違

懷朱嘯園分得日字

柴門草樹深新綠暗虛室我歸輒問君歸期杳難必憶
昔初識君晤言苦倉卒小園快移居奇字易相質貧交
聚首難各爲飢驅出君來閱冬春相對祇旬日傭書我
自嗤逆旅視蓬華君行向京江訪舊得膠漆窮途仗友
生聊用解憂恤思君我獨勞離懷耿難述男兒壯無奇
緬古媿投筆一飽何足營煮石苦無術何當同把鉏菘
韭味逾蜜空山坐窮經疑義共梳櫛茲願恐遂虛撫心
還自失遙瞻北固山天末空翠嶺

贈蔣香山

端居寡儔侶篤志求友生十年見吾子私心良足傾襟
懷曠以達詩骨健以清鬱鬯無凡香朱絃鮮靡聲苦心

挽風雅不顧流俗驚惜哉困蓬茅惟以鳴不平方流知
玉美圓流驗珠明寶氣不終藏誰爲發其精

匠門先生寄示秋懷詩奉和八章

存六

南山有瓊樹高枝入雲裏千年一敷榮風香飄萬里我
欲採其榮持以聘彼美崎嶇歷艱辛踈躑閱層累幽峻
不可凌中途雷電起山靈顧我笑子意徒爲耳珊瑚作
籓籬黃金佈其底飛仙儻能來嗟爾塵俗子我行感此
言塞默中途止辜彼美人心三秋隔煙水茫茫望江漢
余情曷能已

秋思忽鬱紆徐步登西城城中十萬家朱樓麗飛甍炫
耀被文綺靡曼調新聲妖姬一朝餐十千不辭傾我吳
今年雨野屋如流萍倉皇四郊農岌岌魚頭生天心偶
悔禍曜此日月明嗷嗷笠澤鴻秋來遍飛鳴胡爲縱奢
華宴然如不驚愚者愛苟安智者防其盈憑高發長歎
狂瀾倚誰平

我年未三十攬鏡生二毛曠言舊交親纍纍葬蓬蒿念
此劇悽惻中腸割如刀至道懼不聞老死何足逃西風
撼庭樹入夜如奔濤飛鴻戴霜鳴鄰雞順風號愁人苦
夜長反側心倍勞起來剔殘釭光微益其膏琅琅聖賢
書炳如日月高明訓感吾師汲古重索綯

神女飄霞裾粲然冰玉容顧我忽目成遙情抑何濃中
誠旣已達豈在綢繆蹤我居似盤石君行似飛龍音徽

邈難接雲山莽千重今朝南來鴈寄我雙芙蓉芙蓉好
顏色不若凌霜松珍重區區心終始期相從

秋月白如玉秋露明如珠秋氣感我心所感與俗殊丈
夫寡宦情富貴何足圖田間蘊經濟要使民俗蘇何時
展素抱淳風見唐虞我車旣已駕我馬亦已芻行雲日
奔馳逝將與之俱山妻烹伏雌送我惟長吁長吁雖不
言嗟我良非愚回頭望山南臨岐忽踟躕

瑤京十二樓其下集羣仙青谿一道士冠珮何翩翩朝
宴赴蓬臺暮歸遊芝田石室翻靈笈雲璈和新篇天上
纔一朝人間忽二年豈知故山中徒侶遙情牽秋來風
景幽寒溪瀉潺湲清猿吟緒風獨鶴翔蒼煙霜楓何煒

煒露菊何鮮鮮遨遊亦云樂歸哉莫流連

題高士李休翁遺像

枯藤削杖葛裁巾遯跡聊存野外身手把青松招故友
心甘白髮老遺民鳧鷖秋水虹亭月風雪梅花湖浦春
盡是先生行樂處依然餘韻見天真

題誕寧遺藁

重陽剩句思邈老人日遺詩記蜀州開卷不禁清淚滴
梅梢斜日下簾鉤

胥江放舟

林皋收宿雨西山卷煙嵐拏舟及新晴波面朝暎涵莎
汀綠初潤花岸紅方酣尋樂豈嫌晚春餘十之三

高園

綠蘿翳雲扃籬疎花氣散曲逕希人蹤
山禽入虛館寒泉亭下流石筍階前斷
頻來緬經始今昔餘三歎

千尺雪

層巖噴飛泉千尺向空落蜿蜒虹飲
礀淅瀝珠貫索濕漬坻雲根聲沉應
風壑清冷與耳謀塵襟忽疏瀹

橫塘晚渡

下山暝色微登舟山已暗行行向橫
塘溪白霧痕淡村酒尚飄旗山樵旋
弛擔杯深燭正長窮日更無憾

遊明瑟園

山路千盤到溪流一曲迴低垣茅屋
露轉岸竹扉開猿

鶴休相避風塵不用猜未應幽絕處
獨讓主人來逕曲籬隨勢亭卑竹不妨
鑿池通野岸疊石作魚梁小艇宜垂
釣澄泉合汎觴翛然愛清曠濠濮興
初長小閣方池上高齋古樹邊櫺虛
通野翠檐敞入山煙瀟灑幽情愜清
深俗物捐便思留酒伴埽榻此中眠
暗綠圍軒密緜紅拂檻斜園丁防蹋
筍來客笑攀花野鶴歸猶晚山禽語
自譁殘書愁賣盡無計問東家餘興
猶忘返言歸却浩歌竹輿邨路遠籬
落晚風多硯北身將老山南意若何
回頭空悵望杳杳隔雲蘿

題水邨圖

白雲橫飛綠山遠一水抱邨流百轉
平橋曲岸入蒼茫

沙港煙坡隔深淺何人卜築水之涯迴環水木含清華
若非甫里天隨宅定是下泖楊顓家參差衡宇遙相望
人家多在溪光上幾家一簇別成邨無數垂楊作屏障
疎籬茅屋無塵喧漁翁牧豎同嬉然松門一帶水東寺
恍聞清磬飛寒煙誰剪生綃寫清景點染水雲千萬頃
我來看畫忽相忘招呼欲蹋溪邊艇我家舊日居江鄉
煙蓑雨笠曾相羊桃花漾裏鰕魚美鴨漪亭畔蓴絲香
一自移家郡城住耕釣年來成兩誤葑田漁屋森煙邨
夢逐閑鷗每飛去須知我亦畫中人看畫休嗤認作真
試向畫中重問訊團茅何日更爲鄰

正月一日雪中過芳潤堂用東坡聚星堂雪詩韻

仙萸今日初生葉高城昨夜留寒雪春光猶在有無中
妝點乾坤轉清絕開窗正訝池面凍埽逕仍憐草芽折
更憑小閣望西山一點孤痕鳥飛滅試訪南鄰攜蠟屐
留坐不嫌肘被掣一尊新酒破新寒醉眼朦朧漸生纈
空庭冷暈不知晚屋角飄風墮殘屑好乞陰雲三日留
莫遣陽烏來轉瞥人間佳景本無盡草堂勝事宜傳說
吟成蹋雪夜歸去不覺棉衣冷如鐵

雨霽

檐樹雨初歇新陽淡簾櫳孤花破寒意亂蝶翻和風煙
景藹生媚年芳感吾衷所思不可接幽抱將誰同

泛舟湖上

借得青蓑上釣船湖光灩澦浸春天人行細雨輕煙外
詩在新蒲弱葦邊白鳥橫飛山影破紫鱗驚躍浪紋圓
蒼茫漸覺村莊近一點漁菴傍葑田

松陰夢詞和張來儀韻

雲生石畔飛輕綿翠陰作被凝秋煙寒泉琤琮淨心骨
風香入夢魂翛然空山茫茫覺天小飄揚忽在青霞表
蒼龍蟠護山鬼藏小睡千年忘昏曉

晚思

空庭栖鳥定虛室了無覩鐘來翠微寺樹暗黃昏雨脈
脈念同心絲絲引孤緒試問壁間琴塵埃不堪撫

玉蘭花下戲作簡桐邨

小園玉蘭花一樹開時我却來君處君家玉蘭花正開
君趁花開入城去城東城西十里賒主人兩兩不歸家
莫使春光偏寂寞煩君往看小園花

暮歸

富貴亦有累賤貧安得休出門越旬日內顧懷私憂依
依望煙火言尋蓬葦幽入門籬落靜孤花雨餘留池暝
綠煙凝林荒野禽投會心且命酌觴至不用酬我生有
定分稻梁安足謀

草草亭詩藁

往予讀書霍山山中時素菴繆君司鐸其地邂逅相遇
且相得即聞其季弟朝曦年少有雋才能文工詩雖欣
慕而願見未獲也已而素菴令瓊之樂會予送別吳門
始與其諸昆弟相見并獲交於金君最木最木愛風雅
不知予之鄙陋更互倡和今茲十稔矣其間遊宴之歡
多至不可數酒酣耳熱仰而賦詩詩成讀者悠然神往
爲之驚歎者必朝曦也蓋朝曦熟於漢魏以來之詩洞
徹源流如涇渭判然於胸次以故吮毫之頃天真自露
抽芬芳而振金石宜乎令人驚歎也最木謀鋟倡和詩
藁朝曦聞而歛然辭再三不獲辭然亦僅出己丑庚寅
兩年所作復與同人商論深求其疵而去之雖古虛懷

曉谷詩彙
之士何以加自此孜孜不已則其所至寧有涯哉故予
愛敬之爲題其端云同學弟無錫朱襄

曉谷詩彙

古錢歌爲朱嘯園賦

吳縣 繆嗣寅 朝曦

君不見昔時和嶠有錢癖積錢富比王侯宅又不見蕭
宏錢多百萬餘宗族作論譏錢愚君之好錢則有異刀
布金錢無不備宋元以下亦搜羅一一俱堪續錢志是
皆經歷歲千百古氣縱橫色相射或如一片蒼苔青或
如數粒丹砂赤多少埋沒泥沙中銅花時復生幽宮君
從何處得此寶叩門定有青衣童惜君寶此空爾爲蕭
然四壁貧難支俗人好今不好古欲爲世用豈稱時何
如竟作守錢鹵一生長免寒與飢

訪友人不遇

偶向城東訪隱淪，悄然籬徑不逢人。
疎林鳥掠飄紅萼，曲沼魚跳破綠蘋。
小坐獨依庭際竹，留題自拂壁間塵。
怪君底事出門去，拋却名園一日春。

初春桐邨二兄招遊西郊作

綠水新漲何沖融，輕舟一葉隨春風。
湖光接天雲滿樹，西郊山色皆濛濛。
天公亦厭塵迹擾，故灑微雨來蒼空。
頻飛玉笋答風景，清遊况與羣賢同。
繫船挈伴入花市，有如蜂蝶歸春叢。
年來懶惰漸成癖，尋芳只在郊原中。
江南春色擬徧覽，空勞夢寐安能窮。
殘陽挂柳增暮景，流霞忽斷如長虹。
欣然舉盞洗更酌，已有新月迎歸篷。

春夜對雨

獨對寒燈夜欲殘，鼓窗浙瀝覺衣單。
梅花處處飄香雪，誰到深山冒雨看。

胥江放舟

西山氣日佳，選幽棹輕鷁。胥江何茫茫，奔流亦清激。
日亂岸花明，沙澄渚蒲白。定檝舟行徐，野趣快盡覲。
寄情雲山間，石徑如歷歷。茲遊會窮探，衍漾恣所適。

放鶴亭

白鶴去不返，虛亭沒榛叢。支公不可見，千載青山空。
我行倦遊覽，聊復憩此中。俯視萬頃綠，仰瞰諸峰崇。
蒼蒼松柏間，日夕來清風。

千尺雪

峭壁懸清冷，轟轟石俱激。陟巔疏其源，飛湍勢益驟。落澗寒風鳴，觸崖急雨逗。琤琮下樹杪，噴灑濕雲竇。爲取水一掬，因之洗塵陋。

法螺

行行山更深，遊人得徐步。蘿徑何盤紆，澗道亦迴互。但覺石狀變，不記來時路。叩門入禪房，閑庭花竹布。白雲牖外飛，泉聲自相赴。

獅山

籃輿下谿谷，野曠路盡平。仰見青空礙，一峰突相迎。孤撐挺奇秀，勢與諸山爭。積石像狻猊，蹲踞何猙獰。樹搖忽奮鬣，風振時有聲。咄哉造化功，足使耳目驚。

晚渡橫塘

回舟日已暮，夕翠斂山岬。橫塘漸以近，煙火滿邨市。水鳥驚篙聲，穿波入枉渚。湖映晚雲沉，疎星俯而視。即事叩舷歌，餘聲雜輕櫓。前途人語喧，應是停橈處。

遊明瑟園五首

屋背青山近，橋橫曲岸通。林深藏密翠，牆短出疎紅。細路春泥淨，澄溪碧水空。暫來幽勝地，清賞境須窮。客至少逢迎，籬邊緩緩行。但知花有態，不問樹何名。古木巢雲重，疎篁拂水輕。石闌苔蘚厚，小坐待鳴鶯。傍舍平橋闊，高齋瞰水隈。一渠穿竹出，百曲繞階迴。石

罇輕儵簇魚梁飛燕來欲從朋好輩此地共流杯
獨立孤亭裏溪南極望長邨娃語柔隴水鳥下春塘空
翠晴猶濕歸雲晚更蒼山光兼野色相對兩相忘
昔有逃虛客幽棲築草廬栽花成小徑鑿地出清渠舍
影空浮漾山雲自卷舒長歌招隱句臨去獨躊躇

送春辭五首

怱怱載酒去聽鶯忽漫飛花欲送行風雨幾番愁裏過
自來春色不分明
乳燕呢喃傍母飛纍纍梅子綴枝肥千門多少青絲柳
難繫春風不放歸
鳥咽蜂喧各別離蕭蕭暮雨打簾帷庭花也解含惆悵

盡日凝珠作淚垂
鼠姑落盡減芳菲剩見薔薇雨後稀一架輕紅春不管
任他花發又花飛
明日池塘景又新五更鐘動失芳辰縱然留得春風在
墮白飄紅愁殺人

石湖阻風遊石佛寺

我乘扁舟渡湖去狂風颯颯搖空山洪波怒衝灘石轉
激箭亂射篷窗間篙工驚呼不得過停橈暫泊山之灣
亭亭佛寺出山塢一片荒煙鎖顏宇何年鑿翠成屋梁
石像峩峩獨撐拄玲瓏雲竇誰雕剜碧苔蒼氣象古
百紆細路升高亭石湖渺闊當窗橫憑空一望天際白

峇障迴崖雲水隔浪花千頃堆瓊田天壓孤帆不盈尺
昨日顛風浪觸船船傾盡入蛟龍淵遊魂漂泊歸不得
妻孥叫哭絕可憐而我招提縱遊賞得攬異境無窮邊
人生變幻詎可測歸舟獨坐心茫然

新麥

大麥初薦新猶是青青色對此不能餐農夫尚無食

櫻桃

一入漢宮中金盤色相射空山千萬顆烏啄珊瑚坼

吳中歎二首

道逢飢婦人抱兒泣路歧舉頭告行人語咽聲慘悽前
年苦旱去年雨田夫那得將鉏犁城中有米不入釜糠

覈食盡食樹皮前邨之人飢半死後邨日落鬼夜啼健
兒去爲盜與賊上官捕戮橫其尸妾夫客作赴他縣大
男乞食暮不歸君不見千邨萬落皆蕭瑟居人誰得肌
膚肥

荒邨蕭蕭聞野哭白頭烏飛啄人肉凶年苦復遭大疫
但見呻吟滿鄉曲貧家藥餌不得致朝尚爲人暮鬼錄
閉門一月無人開不見炊煙出茅屋病夫病婦臥路啼
身死不葬委溝瀆誰能徧起疋羸人收取上池水千斛

競渡

狂風獵獵雲旗摧日光倒射龍鱗開舟師絕叫鼉鼓震
撇波身裹琉璃堆濤聲喧逐盪水府下坼鱗屋馮夷怒

老蛟驚竄大魚逃激水跳珠散飛雨陽鳥下山兔出窟
羣龍迴翔掉尾疾白浪掀空一瞬間沙靜波平忽相失

秋夜懷朱嘯園

故人何事不歸吳今夜秋風到海隅遙想客牕燈火下
手持周易獨研朱

題採芝圖

山空地僻斷人蹤石上靈根映怪松採去塵寰種何處
竹筐擔得白雲封

七夕有感

微風初冷薄雲浮令節驚同逝水流回首弟兄傷別鴈
獨看星斗對牽牛羈魂遠隔天涯路孤客新逢旅舍秋

今夕不堪頻惆望虛窗涼月入高樓

和東坡歲暮詩三首

餽歲

結交貴情親詎用雞豚佐里俗尚往來歲暮各以貨鄙
哉市道交較量小與大蓬門了無營積雪照高臥篋酒
祇自斟擊鮮亦入座故人貽我詩琢句出研磨一洗耳
目喧佳節不虛過聊用當贈遺灑翰共酬和

別歲

此歲不足惜欲別何遲遲終年抱寂寞往事已莫追送
汝一盃酒遠去天之涯明年非今年爲樂當有時念彼
富貴家快意惟輕肥值此盛時去惜別令心悲我則異

於是喜與舊歲辭人生行樂耳寧論盛與衰

守歲

除夕坐不寐弄墨揮龍蛇擲筆笑我愚歲往安可遮運
流自遷逝戀此殘夜何擁衾清夢適任彼人語譁不知
爆竹震誰聽譙鼓擡起視僮僕倦行步皆敲斜百年幸
未滿此夕豈蹉跎何如一枕餘黑甜自足誇

正月一日雪中過芳潤堂用東坡聚星堂雪詩韻
重雲凝空不成葉極日寒城萬家雪新年屏却塵事喧
出戶更喜人蹤絕茫茫遠山微可覩遮道長松壓欲折
造門早識故人在屐印階泥迹未滅新詩示我騁雄怪
碧海波翻鯨尾掣消寒共斟柏葉酒一吸盃空醉眼纈
傍檐鳥雀聲苦飢翻翅紛紛墮餘屑詩狂醉舞足自了
那惜飛光去如瞥君家客滿尊不空玉山風雅猶堪說
急收清景入毫端凍筆難呵勁於鐵

分賦梅爲桐邨二兄四十初度

稜稜風骨清而癯虬枝鐵榦凍不枯吐花豈待春風煦
水邊獨立影與俱幽棲或在山之隅雪輝月映態更殊
蒼松翠竹爲友于惜無真賞如林逋孤標本自絕世無
朝來南枝花正敷澆花花下攜玉壺冷香和酒沁入膚
頽然不辨花與吾

分賦得兔燈

瑞應曾聞赤兔名乍燃銀燭色全頽巧裁兩眼迷離樣

戲引雙輪撲朔行餘燄尚存丹竈火寒芒猶蘊玉衡精
何年墮下清虛府帶得蟾光一片明

過葑水園

一徑山花紅半園春色早空堂不見人蝴蝶滿青草

泛舟探梅山中由胥江宿塘灣

二月梅正花蕩舟漾春水漣漪泛晴光愛此風日美茶
竈置船頭卷帙亦攤几疎峰縱遊目葉葉飛雲起日落
山盡蘋炊煙亂霞綺娟娟半弓月鎮逐孤舟徒遊人繫
纜宿貫酒問邨市地僻心魂清夢結溪山裏

過聖恩寺入錢家壩

平肩白竹輿穿林蹋花田精藍蔽深竹杳杳鐘聲傳石
垣低可凭俯看花連天寒香接數里寓目境已遷墟落
寡人迹太湖當其前枳籬護花萼千章綴清妍花源遠
難窮不知芒屨穿決皆攬奇秀洞庭隔雲煙何當駕兩
槳往陟青峰巔

六浮閣

傑閣占清曠結構梅花叢千株萬株白并作香空濛太
湖三萬頃一片當簾櫳六峰望如垤羅列浮其中乘風
一葉船挂席凌蒼空平生丘壑情對此心融融緬懷李
檀園雅志未獲終不逢好事者誰爲繼高風

石壁

閑尋招提境却入山水窟叢竹傍青崖清風自摩戛威

紆數仞岡峭立窮攀越震澤抱山根屹如島嶼突白波
渺千里恍惚臨溟渤歸途重回首一帶雲橫絕

由西磧山至熨斗柄

窮幽不計程沿流繞山趾仰看山色佳俯挹波光美忽
逢梅花嶼高下散芳蕊遊人度花杪身在白雲裏山根
一片石數丈出湖涘攀蘿下危磴坐石弄清泚旣入名
花叢復此佳山水勝絕兩合并結廬吾老矣

虎山橋翫月

野曠月更高山行晚逾善平橋一以眺澄河正鋪練合
沓崦西山參差遞隱見修林貯清影肅肅寒風戰一聲
歌未終杳靄漁舟見安得從之遊帶月乘風便

積翠菴

修竹勢參天千竿同一綠入林幽以邃微光漏晴旭古
刹門半扃經聲出深屋一亭在林杪憑眺寄遠矚數里
無人居迴抱山重複不知城市喧但逢樵與牧

喜晴

日色晴自佳餘光照東軒把書步庭除碧草經雨繁蛺
蝶忽相聚鳥雀靜復喧閑望鄰家花已復過我垣

遊華山

春色入佳興名山追昔遊一筇供遠寄兩屐恣冥搜細
路層層折長松落落稠驚泉翻雪瀑怪石冷蒼蚪字滅
林中碣鐘傳雲外樓花宮殊窈窕竹院小遲留萃律峰

逾峻紆迴徑更幽陰巖渾欲暝深谷却疑秋行躅苔痕
滑躋攀藤蔓柔飄然凌絕頂倏爾豁雙眸立低青嶂
平鋪盡綠疇自應通帝座曾不隔神州返照情猶戀歸
途興未休回看憑眺處杳杳白雲浮

罷官行

九重詔下收印綬身離公府不敢後部曲散盡還其家
卑司誰復來趨走相逢盡道不相識半是平生膠漆友
街吏傳呼導騎馳煌煌飛蓋生光輝新官銜命赴官所
行人斂足避路岐舊官去年初到日曾似新官今日時
客有述義鵲事者詩以記之

喳喳衆鵲飛飛鳴避蒼鷹一鵲墮地衆鵲驚人捉取
鍛兩翻蹭蹬不得凌青冥延頸絕叫呼衆鵲衆鵲繞屋
皆悲鳴齊飛下屋銜其尾欲升忽墮旋復升力憊不辭
口流血毛羽亂落飄中庭終然得脫拘攣苦急難乃見
此鳥情迴看燕雀啄蟲蟻區區得食還相爭

夏雨不止戲為短歌

天河瀉水水倒飛圓蒼低迷晝失輝兔毛淋漓鷓翅濕
茅屋作艇滄波圍觸肌風尖寒粟起火令不行赤帝恥
幾欲排雲喚雨師縛羊不入秋潭水

贈最木

何處識君情孤雲出天宇飄然謝紛喧膏粱等泥土擁
書一萬軸卓犖獵千古健筆駭羣愚豪語屏庸腐結交

當世賢高才亦舉舉爾我本世親論交復相許入門索
春醪斟酌無賓主弄雲碧山巔捉月澄河渚呼吸湖山
光化作清辭吐底用車笠盟永結逃名侶

已丑五月素菴大兄瓊州訃至三兄友陶即往迎
喪迄今未歸志感二首

豈意成千古傷心又一年可憐瘴嶺隔空有夢魂牽望
遠余猶怯急難君獨賢重重離別恨生死兩悽然
淚盡秋風日心驚春雨辰每逢嶺外客便問海南人素
旒知何處孤魂應獨親幾時還故土一使別情伸

伍子胥廟


千年怨血逐江流滅楚強吳積遠謀憑仗英雄銷父恨

更誰爲報屬鏤仇

題徐蕉引水邨圖

山居洵足樂水居情更幽披圖忽見萬頃碧迴溪曲港
千邨流人家半在水雲裏風蒲獵獵飛鳧鷗開軒面湖
書可讀結茅傍柳釣可投灌畦飲犢隨水處或通小橋
或小舟如君瀟灑不易得宅抱婁江水千尺飽看湖鄉
風物佳興酣潑墨留真迹借問君家第幾邨他時來訪
清溪客

曉谷詩藁



小南邨二集

芳潤堂藏板

吳越之會多以詩鳴元明以還間爲市隱此鄉愜山水之性同時流風雅之音諸君子可謂卓立毫端迥出物表矣觀其陟歷丹崖白石之區愛爾讌游花灼葉黃之候異地以晨星爲歎故交以宿草爲傷秋士怨其次寥春人感其駘蕩雕繪之作貫穿百家達觀之言睥睨一切人序少長體兼古今斯帙之行吾黨之願也矧夫遺逸擅奇於一方和歌爭長於千載近依北郭本無涉世之蹤遐企南邨真有樂天之志問津鼓枻望衡褰裳我醉殊多子招恐後乎五年給札朋社徒虛累日哦詩物情都淡徙倚桂松之側流連金石之餘奏吳趨之土音景柴桑之風格後塵可步作者即有七人妙句能賡長

小南邨二集

芳潤堂藏板

吳越之會多以詩鳴元明以還間爲市隱此鄉愜山水之性同時流風雅之音諸君子可謂卓立毫端迥出物表矣觀其陟歷丹崖白石之區愛爾讌游花灼葉黃之候異地以晨星爲歎故交以宿草爲傷秋士怨其沈寥春人感其駘蕩雕繪之作貫穿百家達觀之言睥睨一切人序少長體兼古今斯帙之行吾黨之願也矧夫遺逸擅奇於一方和歌爭長於千載近依北郭本無涉世之蹤遐企南邨真有樂天之志問津鼓柁望衡褰裳我醉殊多子招恐後乎五年給札朋社徒虛累日哦詩物情都淡徙倚桂松之側流連金石之餘奏吳趨之土音景柴桑之風格後塵可步作者即有七人妙句能賡長

言不無三歎云爾辛卯秋仲同學匠門張大受跋

余之得交於金子最木也自秀水朱竹垞先生集我吳中之士於最木之居始於時同輩數十人或抗談經義或尚論傳紀百家或考析詩文之源流正變皆不無爭雄長之心最木獨退然其間余固微窺其志尚而未甚奇之也久之而語及於考亭之學最木以一言契余心知其平時之伏習者深矣後又聞其家多藏書而最木於日閒多接其友相磨切夜則篝燈讀書常至漏下數十刻不休宜其中有自得者而伏膺之拳拳常在考亭也自是余數過最木因與其座上之客皆習見其有小南邨詩集之刻皆一時名雋吳中五人而錫山嘯園朱君尤宿素也寓居於此相與鼓吹其閒而最木時為之

主余未讀其詩以爲是無足爲最木難者彼固伏習考
亭之學特出其餘力以攻此耳然而又似慕晉之陶元
亮者而以小南邨名集何居元亮之詩曰昔欲居南邨
非爲卜其宅聞多素心人樂與數晨夕最木豈自多其
素心之友之得常聚而以此彷彿南邨之人耶蓋元亮
之詩考亭夫子常屢稱之最木與諸君亦推考亭之所
尚以尚之耳及余讀最木之詩雄健而踈越雄健則其
稽古有獲不專於詞章之學踈越則不以雕飾爲能而
其詞旨常有似元亮者且年尚強仕而蚤謝名韉與諸
君時時嘯傲湖山閒慨然有師範南邨之心發爲詠歌
有唱斯和雖體製不必盡同聲律不妨閒奏要其放情
物外翛然無纖塵之染則諸君悉出於一致此所以爲
素心之友而結契無閒者歟今茲二集之刻較前未得
列者一人秦子南岡方以其詩名京師而嘯園及蔣子
香山二繆子桐邨曉谷皆舊侶也今則加以繆子迂壑
李子在亭陳子淳夫他時稱詩者其必曰吳中八子矣
余固深羨之不能不爲一言獨惜此集之成竹垞固不
能待當時數十人者亦升沉互異而尹子任齋吳子楓
江與最木平時尤相知愛者以蚤逝而不得與此則最
木所不足於心者也嘉定同學樸邨張雲章書

小南邨二集總目

朱襄

漫與詩彙七十一首

蔣夢蘭

香山詩彙九十一首

金國棟

芳潤堂詩彙四十二首

繆宗儼

桐邨詩彙四十六首

繆宗侃

迂壑詩彙四十首

李果

在亭詩橐四十二首

陳昂發

安詩集四十八首

繆嗣寅

曉谷詩橐四十四首

漫與詩橐

三韻七首

無錫 朱襄 嘯園

人生非神仙自須仰衣食耕當問奴耕織當問婢織俯仰無所媿雖貧志亦得

天上可寄愁寄得頗非易富貴愁亦多爭向天上寄愁如貧且賤將無退而避

龍目與鬼目其形無少異龍目不見石鬼目不見地目之所不見可論不可議

世人貴結交結交空鹿鹿何由使人心推之置我腹我心剝著地亦似數片肉

一犬吠人形羣犬吠犬聲懼於羣犬吠人形露難輕君
子貴知幾庶以全吾生

三五而月盈三五而月闕彼乃天之寶以定十二月若
言月無光伊豈探月窟

已亥作三豕尚在春秋時何況傳至今訛舛尤難知故
不求甚解陶潛真我師

題吳雪園木石與居圖

霜皮斑駁仍菁葱山骨瘦削尤玲瓏雪園園多木與石
佳景如在丹青中我來相訪出此卷摹挈驚歎非人工
丹崖青壁幾千仞樵路依微曲且峻太古烟霞蘊釀多
片片莓苔色鮮潤何處一道飛來泉其勢衝激聲潺湲

下歸曲澗流無地遠入明湖浸有天天邊遙山相對起
新埽修看鏡光裏絕似東西兩洞庭蕩漾空濛巨區水
先生兀坐經幾春木公石公互主賓深山無人暫棲息
各自忘形同守嘿陰陰鬱鬱抱孤高磊磊落落謝修飾
從繩肯構還肯堂孕玉宜圭復宜璧灼見無魚豈妄求
信知有鳥那能擇漫從學海覓支機好伴文城封即墨
不比西山可銜盡祇許東坡纔画得祇許東坡纔画得
得此何殊得真迹

曹浮山招遊紅橋飲竹林限韻

郊原春入凍全消舊徑追尋遠過橋蓮性鐘傳微有省
竹林酒熟重相邀青山雲隔仍難買碧水煙

蓮性係陸蓮
寺御書額

迷未易樵漫說佳遊惟杜牧十年前夢總遙遙

庚辰四月張山來曾

招同王欽州來遊故及之

疊前韻東費滋衡

兩鬢霜沾詎肯消依然萍泛到紅橋碧紗籠後難留詠
金帶圍前孰見邀大小有山曾託隱東西無郭可容樵
故人賴爾能相慰不惜頻過屐齒遙

李唐思招同徐竺邨陳星舫費滋衡集竹林疊前

韻

酒鑪能使客愁消况近如虹郭外橋雪霽曾偕名士至
春分還喜故人邀窮經妄欲希劉牧作志空懷續鄭樵
別久談深心亦醉夕陽歸路不知遙

陪姚太守息園瑞芝堂讌集分韻

太守今詩伯相攜及野人入林消白晝把酒隔紅塵層
疊樓臺迴悠揚鼓吹新小桃花欲綻正值二分春

周司馬樂亭下車歌

蘇州司馬佳公子政事文學兩無比架上筆飛五色雲
匣中劍流三尺水一朝道逢一迂儒叱停騶從當通衢
下車而揖珍重別行者止立驚睚眦共言古人貴折節
斯道於今曾不屑彼何人斯感當路折節乃能如此折
斯人朱姓名曰襄家住蠡湖烟水傍自小善病常伏枕
及長不學猶面墻阿誰夢授景陽錦每自愛攜昌谷囊
唯耽吟詠亦已癖竊附騷雅寧非狂蕭然四壁挫壯志

慷慨子身辭故鄉南轅到處轍偏北圓鑿入時柶必方
弄翰隻手仍舊赤窺鏡兩鬢生新蒼欲保後彫似翠柏
未免倒縮如黃楊以此還家門久閉坐歎流光水同逝
鳳曆虛更十五春馬齒俄逾五十歲紅蘭室裏舊詩箋
偶和陽春有二篇那知司馬獨心賞緡刻滇南為播傳
近從茂苑得邂逅如燭霽月明娟娟通名始畢坐未定
口誦拙句聲琅然知己由來一人足感與慙并信復宿
茲辰步出忽重逢仰荷殊私增局促可堪潦倒敝衣冠
輝光出自旁觀目老去渾疑覲久要歸來不語發長謠
欲知司馬下車處乃在城南飲馬橋

清明日周司馬招遊虎丘限春字

虎丘山下草如茵簇簇鶯花處處春銜尾畫船停七里
當頭金殿擁千人地靈本為笙歌顯天色還緣粉黛新
才子欣逢兩司馬流連觴詠盡斯辰

是日與何司馬洛齋邂逅

陳遺山招集舟中限韻

同劉新堂吳雪園尺鳧兄弟

隨波蘭舫任西東裊裊花枝照座紅雨積豈無雲墮月
春深猶有雪迴風何辭勸醉杯三百其奈催歸鼓一通
明日河橋愁作別好教青柳繫青驄

時尺鳧將歸武林

春望

日日登樓望幾回可憐春老孰相催滿天積雨草爭發
繞郭亂山花盡開桑葉未生蠶浴種麥苗方盛雉呼媒
鄰翁有酒容賒慣好對東風進一杯

送霜洲上人進院次原韻

自昔高僧愛住山支硎西畔尚容攀枕中泉響雪千尺
簾外雲生屋半間開社不妨蓮漏靜吟詩何減芋香閒
敢期明鏡明如月一照風塵老客顏

采茶詞

穀雨後十日貢茶裝載已催畢穀雨前十日采茶奔馳
敢偷逸采茶上山爭唱歌歌聲歡少愁較多一槍一旗
有幾何

養蠶詞

晝餒蠶朝采桑夜餒蠶暮采桑朝朝暮暮提頃筐首如
飛蓬不作妝陌頭何心看春陽堂前列香燭敬恭馬頭

孃願天不寒復不熱使我今歲蠶無荒

珍珠蘭分得九佳

磊砢形相似都梁名並佳願充君子佩故綴美人釵雅
豔宜金屋清芬白玉階國香如入夢應與掌珠諧

讀張太史匠門同秦南岡李實君八月十三夜遊

虎丘用高青丘韻之作率爾和之

虎丘山前天蔚藍亭亭月上消煙嵐正當八月十三夜
空明一片供幽探仰窺松頂光禿榻俯見苔髮低鬢髮
蚌胎蟾魄雨未滿清輝已自遙相涵始知中秋明月好
盈虛於此宜微參闔廬當年志圖霸中原毒逐何其貪
一朝金虎氣銷歇扁諸之劍藏巖嵌磊砢頑石解聽法

生公坐對空喃喃魯公擘窠剗於石歲久剝蝕非書蟬
迴廊繚繞設闌檻千人一座成山龕近來 行宮壓其
上治遊莫辨高僧菴碧瓦鴛鴦出花竹朱簾翡翠遮杉
栴此時月光燭如晝恒娥仙府俱潭潭匠門太史才力
健文章冠冕江之南飄飄意旨詞落落繭紙費盡三吳
蠶雞林賈客起遐慕免園冊子懷深慙預賞中秋趁斯
夕故鄉明月性所耽李白曾誇不用買徐勉亦言只可
談觥船送酒醕無筭座中細擘青黃柑興來爭勝與北
郭歌成豈待更逾三和歌者誰秦與李蘇門名舊仍咀
含凌霄鴻鵠必雙翥歷塊驥駮須兩驂驪龍領珠已探
得剩有鱗爪俱不堪昔人筆研欲焚却此中微意余粗
諳况余名姓不在月有生空負身為男鵲飛尋巢志莫
遂牛喘思臥心難甘唯餘綺習猶未盡搜羅名什附李
戡忽聞君詩徧傳誦良由精研思亦覃華陽修翫久絕
響衰年把此清而酣恍如明月入懷抱滿天桂影飄甍
甍

芳潤堂中秋翫月疊前韻

八月望夜天蔚藍隻輪碾破千峰嵐結鄰憑軒望舒御
金玉風露窮幽探晶英洞徹不我棄照見素髮垂鬢鬢
山河倒影疑盡瀉瞻彼明月仍泓涵人生隱顯難自料
物情彼此宜通參稜稜孤石勢猶狠活活小泉性亦貪
新竹有風鳳尾掉舊松無雨龍鱗嵌橫行蟹每恃郭索

于飛燕輒矜呢喃伯勞何知後身軀脈望那記前生蟬
丘垤煌迷即白嶽溝渠水漲同黃龕燃犀不克照江渚
捫蝨何必顏雲菴夕彫應憐朝發舜東榮孰念西枯柟
我所思兮與誰語瞻彼明月何潭潭顧我生長在草澤
繁華羞聽誇江南蓬門不駐銜勒馬薜衣不雜抽絲蠶
華年惜逝齒欲脫昇平坐享顏空慚惟歡吾友比兄弟
此宵留飲樂且耽陳遵投轄有高義王衍揮塵無常談
清芬撲鼻飛紫桂美味滿口流黃柑不省玉壺傾至百
渾忘畫鼓過逾三同心幸不千里隔瞻彼明月深情含
天寶三郎月中去仰窺素女鸞齊驂桂花樹下奏仙樂
冷光逼射衣難堪歸譜霓裳著令節遂令朝野人都諳

詩家紛紛出名作流傳口齒真奇男燦然看朱忽成碧
爽然鍊苦還爲甘青丘先生才更健韻脚險絕皆能戡
我今鹵莽學其步縱有佳思無由覃筆鋒用久况已秃
抽來欲落興不酣瞻彼明月腹有兔願假一束毛毳毳

中秋翫月用徐幼文韻

明月東出天如藍須臾流照南榮南金波一片澹容與
纖纖毫末皆毳毳橫陳滿地桂花影宛然蘋藻浮空潭
平分秋色最良夜願兔停杵鸞停驂曾無酒果作歡賞
清光猶喜能包涵吾徒少小習文字一飽輸與書中蟬
造端未免笑倉頡掃空何必嗔瞿曇往往茹荼却認薺
紛紛憎蠋還疑蠶柔腸似輪轉軛輓鈍口若谷張矸矸

强低顏色守寂寞靈臺一點千愁含裏蹄保身亦明哲
豈肯輕試書生鑿大都賢豪貴居易吾敢與世同貪婪
側身長嘯翫明月月窟高遠安從探至陰之精結爲月
呼月曰姊我則諳其如坎乃再索得深思弗獲翻成愁
如張子房貌是女如黃崇嘏身非男研朱點易每失笑
窮經無乃空沉酣黃鶴樓頭憩仙館采石磯畔尋僧龕
南皮綺席興無限西湖畫舫情奚堪回思壯遊盡如夢
雙肩簷亦誇能擔惟餘彼月成舊識羞向此際資雄談
貫月浮查出海上那知大匠求榱楠修月利斧臥山下
那知武庫收鈎鐔輪困不妨逐波浪鋒鏑亦可藏壑嵌
曾聞岐公富文筆名高翰苑夫何慚六宮巾帶索詩罷
幘頭滿插金花簪如斯寵光定年少寧有華髮垂鬢鬢
古人未能混榮瘁今人莫怪分辛甘固宜養魚學范蠡
尤當跨鶴追蘇耽可憐此宵一輪月照我五十年加三

送秦南岡北上

景星與鳳凰覩之必爭先君今赴京華光彩俱爛然體
此奇偉姿况當英妙年京華實才藪庶足供迴旋維予
溯昔遊曾費雙行纏才薄性亦拙入世無因緣巍巍黃
金闕高峙凌青天九陌漲紅塵怒馬迷連錢南鄰及北
里鼓吹羅神仙王侯泰不驕貧賤何有焉規矩世所法
難爲方與圓徒使學業荒撫躬唯自憐歷歷同心人次
第高聯翩十載曠音問飛鴻羞爲傳今朝送君去折柳

閶門邊遙望郭隗臺迢迢路三千時候屆秋成糠粃媿
在前

題楊安城補臂圖

羶笠頂綴鷲翎長翩然出塞俱戎裝下馬趺坐三義士
左楊右祁奕李兼中央李左肩鈎楊右臂相顧笑語慨
以慷誰哉貌取神躍出兼令草白還沙黃祁先亡歸李
踵後李死於杭祁則常獨居寂寞是楊子每展此圖增
感傷擬將二像寄伊嗣生綃一幅三分張已之右臂不
復惜劃焉中斷并刀霜無何失火及祁李儀容化作灰
飛揚身死何期像亦燬寸心隱痛牽中腸痛猶未定臂
忽痛調治一載無醫方室人潛覺補以紙其痛立止歡

而康嗚呼此臂昔同把遊行藝苑兼詞場良朋有難欲
援手攘袂而起翻罹殃後臂空聞射必善螳臂那顧車
難當交情豈隔生與死圖中燒去如云亡請看翦紙臂
可補招魂之說非荒唐是後楊子歿塞外兩孤大瓢楚萍泣血
排天閭帝心惻然憫其孝九原奉詔回江鄉江
鄉却在禹陵側遼東鶴得依梅梁杭州常州皆咫尺精
靈不致遙相望留傳補臂圖一角血痕如縷紅飛光

秋來作次韻

同張匠門太史徐端揆孝廉秦南岡李實君朱約成

秋風又起暗生涼誰道吳兒是木腸梧葉影翻侵几席
桂花香動惹衣裳徒驚蹈水原非鬼肯助移山或有孀
入夜酒醒燈欲熄枕邊漸覺漏聲長

次韻答施蘭垞見寄四首

一從鹿苑欣相會每到魚箋見所思羨爾氣凌秦漢上
補亡不數東生詩

徑天高數昧朱儒試問修人知也無年少場中羞漸老
檢方擬染白髭鬚

學富何妨遲對策名高偏藉早能詩即今海內憐才者
說項誰如楊敬之

成都詩客費滋衡十五年前移我情君設雲梯攻必克
須防彼以帶爲城

吳子尺鳧有華山竹杖一枝乃山陰戴南枝先生
遺贈物也後爲王舍人赤杼所借王卒而杖竟不

歸尺鳧繪圖於扇曰憶杖圖且繫以詩屬予索和

芳潤堂諸同人偶失去因悵然賦此以報謝

嗟汝杖兮誰憶汝青蘿主人汝賢主重汝不減七尺青
珊瑚爲是西照頭陀所心許忽有友兮索甚堅義不可
辭兮非舍旃汝胡爲兮遂不旋想像華山兮吐納雲煙
繪以圖兮繫以詩篇命予徵歌兮茂苑邊置諸懷袖兮
似有聲鏗然其時霏雪白滿天歸來呼酒醉即眠凌晨
覓之杳莫得渾疑踪迹同飛仙杖兮杖兮古遺直余負
汝主兮空汝憶

題尚棉村雲車指路圖

碧城洞天有主人出入每駕紅麒麟玉皇香案敕供奉

承恩日日光如新凡心一起遭遷謫三山宛在迷無津
波濤洶湧撼天末秋水凝盡雙瞳神終年欲渡不得渡
蓬窗書劒空橫陳玉函何容蠹飽腹寶鏐時有龍生鱗
桃花雖紅柳亦綠風光豈是仙家春蓬萊織女昔同籍
月樣颺輪碾空碧俯見追懷心自憐雲泥無奈仙凡隔
道本於虛虛本無指點歸根舊踪迹絕勝當時烏爪姑
細話滄桑蔡經宅

喜蘭垞至集芳潤堂次曉谷韻

東海有奇士吟懷未嘗釋尋溪坐扁舟登山躡雙屐行
年纔廿五得詩逾十百鮮意千花魂幽境孤月魄本屬
霞外侶偏契湖上客枉訪旣頻年酬唱又茲夕紅燭殘
更翦清醪滿瓶坼性僻偶爾同情深自相惜追憶良會
初歡然在香積

題蘭垞草閒集疊前韻

清詞祇能翫妙義莫容釋除舊若揮帚探奇似攜屐木
分入已三竿尺進亦百非徒破今膽直足喪古魄名不
受才人譽豈借狂客方剛春與秋靡間晨與夕矢口高
天驚放脚大地坼筆比椽入夢墨與金同惜雖由慧夙
成然亦力真積

題戴笠圖

施子長卿孫頭戴箬笠子俯窺李杜壇睨視屈賈壘詞
氣縱橫凌碧空誓將發瞽復披聾石郎嶺上雲初散一

片飛來笠澤東

城西春泛分韻二首

曲曲城西水春流正淼漫祇緣宜放櫂豈是欲投竿談
笑蠲孤憤歌吟答四難微風更披拂處處助情瀾

有客將言別重爲一笑歡謂蘭且乘新雨霽不畏夕陽殘

柳葉鏡中細梅花笛裏寒春光無限好應共倒尊看

詩徑和香山

從來苦吟侶每爲山水隔倡予而和汝斯樂未易獲香
山暨曉谷同社最莫逆香山如老驥猶騁千里赤曉谷
如雛鳳便露千仞白傲岸志莫遂偶作同舍客客舍分
東西中以板爲壁壁有光如縷側理解鮮捍格吟成即可

通不論旦與夕香山名詩徑其意頗賞適不虞或紆曲
不虞或幽僻不虞松菊荒不虞蓬蒿積研覃以紀事令
我感在昔君家三徑開修竹冷叢碧求羊得從遊猶著
兩人迹今唯曉谷俱取人無那窄吾豈如澹臺撫躬徒
自責

借花歌和香山

足不登石渠欲讀常借他人書手不持銅斗欲飲常借
他人酒嗟予蓬轉三十春及至思歸已白首始信詩人
命屬花花枝裊裊原無家湘蘭名種出九畹亦號幽客
天之涯七里山塘虎丘道盆盎栽來一何好花時欲賣
青銅錢君去看花被花惱看花未足深低徊因從好友

借歸來清芬破鼻盈斗室簾幕春寒晝不開予生所借
多難說唯花不借真癡絕借花輸君雖一籌可堪負盡
花時節

壬辰初夏將爲中州之行小南邨諸同人以雲傍
馬頭生爲韻分賦贈別予合用之奉答

素書忽到意亦慙令我變作無心雲津亭楊柳正飛絮
黃蜂紫蝶俱紛紛小南邨中舊吟社欲別未別杯同把
次第詩成送我行一片斜陽難上馬字字驪珠不易求
其中無數別離愁少年對此頭欲白何況雪華已滿頭
主人近日纔無恙且自開懷莫怙悵請看燕子往來飛
畫檐敞處欣相傍此去勞勞笑此生一鞭重指洛陽城

從今添得相思夢二十年前舊月明

丹陽舟中遣興八首

神禹生而跳艱於治鴻水探得宛委書神鬼受指使至
今效禹步猶能役神鬼

棄國讓與季欲逃挾仲俱得國又讓仲因名名句吳句
吳命名意埋沒久矣夫

北唐有驪馬遠貢穆天子已而產一駒名之曰駮耳驍
騰八駿間毋亦光青史

雙木忽出土一夕超高林其大二十圍其長五十尋用
廣姑胥臺天平爾何心

孔子本無鬚孔叢言豈訛胡爲孔林像有鬚鬚且多圖

與書不侔畢竟知如何
美哉石韞玉混在井里厥琢為天子寶燦燦英華發抱
獻雖封侯雙膝已無骨
上古兵用石易玉復易銅易鐵時最後七國方爭雄銷
之鑄金人或有救世功
卓文解彈琴楊意知為賦馬卿遇合奇後世豔以慕名
字與其姓割裂都不顧

渡江

揚子江灘立追懷三十年那知頭已白依舊上江船

張借亭明府索題曲陽署壁畫松

韋偃何能獨擅名樛枝曲榦亦縱橫龍鱗斑剝原新長

虎魄晶瑩定未生似有雲霄千丈勢豈無風雨半江聲
衙齋終日欣相對始識花封政已成

題畫

蒲帆一幅趁潮還臨水江亭盡日閒草木漸黃秋色老
青青無數六朝山

送張友南歸永清

騷人未必還生楚公子由來重姓張一訪素園

曲陽署西園名辭

大令便騎匹馬返漁陽閒居且得慈顏喜寒食應邀
御墨香十里荷花相送處濠梁不信即河梁

窗外芭蕉

滿屋蕉陰碧裁來只兩窠雨中聽不得雪裏畫如何薄

技逢時少閒情入夜多好傾三葉酒一葉一高歌

送友之江西四首

君家住五茸我家住九龍咫尺不識面翻於此地逢疎
放習成性荷君能見容請看濠梁上觀魚有遺蹤
幸舍各一閒晨夕喜相過祇隔小小庭中有竹千个倡
予子復倡和汝汝還和斯樂未易極頓使愁城破
同是天涯客我亦三十年家仍立四壁囊未留一錢雙
親髮盡白定省嘗缺焉聞君有老母出門應自憐
君忽辭主人即欲明朝去去去潯陽江荻花未成絮我
心如孤帆隨君渺何處坐對燈燭光惆悵天欲曙

再送友南二首

乍見高梧一葉飛客窗愁別思依依留君不住君微笑
笑我如何也欲歸

北望千山落照低酒旗飄處總詩題此行最羨秋風好
一路新涼送馬蹄

送陳淳夫之長沙分得咸字

君山立洞庭迢迢隔仙凡上有橘傍井柳毅傳瑤緘君
今往從之登眺詩當剗融融雪初消和風上征衫柳舒
桃李芳掠燕聲呢喃長沙數千里一帶青巉巖况有賢
主人竹西待揚帆古色發張華新調諧阮咸離心似沙
草初萌已難芟開春纔一日深杯且同銜

秋雨言懷次曹遜邨韻

秋雲秋雨總淒淒喜得壺觴醉竹溪雨已爲霖千壑滿
雲猶如夢四山迷起風自託高唐客離畢誰占后羿妻
最是對牀連夕話膠膠聲送隔鄰雞

秋雁次顧東巖韻

江南秋色動朔雁預期程稻亦知將熟蘆應怯盡橫帛
書成往事箏柱入閒情予昔嘗爲客愁聽是汝聲

題白兔圖

一卷石畔竹叢叢有兔何緣伏此中應羨天教能潔白
無勞人與辨雌雄品唯羲妹飛鴉對名許秦皇走馬同
自具霜毫留小照年年長伴采芝翁

聞蟬次顧玉亭韻

聞蟬不見蟬愁響隔簾傳莫是驚秋女雲迷兩鬢邊

登穹窿絕頂望震澤

在昔有神人行藥來穹窿爲采赤石脂遺迹留無窮我
今攝衣上盤折凌層穹迴出人境外如鳥離樊籠俯瞰
震澤湖一氣連鴻蒙煙鬢七十二微茫卑不崇其中兩
洞庭略辨西與東只恐隨洪濤漂入渤海中搔首坐磐
石目極孤飛鴻

九日書懷

入秋心緒倍堪傷兩鬢唯添鏡裏霜去去流光成老境
蕭蕭落木又重陽泉明未得歸松徑子美仍須結草堂
吟向西風聊自遣任他童稚索萸囊

東巖耕煙閣即席分韻

同遯邨
雨時

凌虛飛閣好耕煙有客同登思渺然繞院已看瑤草長
隔溪應任玉龍眠雁從北地銜蘆後蟹向東溟執稻先
詩興近來濃似酒醉餘多費浣花箋

擬儲御史田家雜興

素不親耕獲亦擬務力田傭工固多費所賴鄰里賢
曲清溪流流與五湖連四圍渺煙水歡友頻迴船間一
造我廬相見情依然邨童頗驚訝羅立衡門前桑麻既
翁蔚草樹亦芊緜時時有花開風色枝上鮮每持一杯
酒自顧還自憐棲棲三十載虛此江南天

送魏耕廡遊西泠分韻

同張樸邨楊大瓢鄭芷畦蔣香山曹遜
邨沈確士吳尺鳧吳篁邨顧東巖青田

兄弟鄉愚
波顧雨時

欲向錢塘續舊盟客程喜即是歸程蒹葭北渚纔相見
楊柳西風又送行岑石猶傳秦代刻曲江不記漢時名
知君懷古登臨處萬點青山白雁橫

周節婦詞

節婦童氏吳江人歸周毓珍六年而毓珍卒先
毓珍撫兄之子孝學爲子甫四歲辛勤教養及
聘婦傳語女氏毋製朱履家人異而問之曰未
亡人之職稍盡矣自是時時悲泣不數月嘔血
以卒時康熙乙亥正月毓珍性至孝不樂進取
解紛如已之紛周急如已之急亦奇士也節婦

生後毓珍二年其卒後毓珍十年年三十六余
為作周節婦詞

棄妾歲月早痛君遺孤在襁褓守君歲月長鑒妾訓孤
能文章能文章妾心喜喜有人繼君起此孤與妾出腹
同是君親撫兄之子年幾及成童納徵有日矣昨已倩
蹇修傳語與女氏製履宜從俗幸勿製朱履製朱履未
便穿妾將見君從夜泉

答李客山見寄次韻

感君寄我詩念我常為客想當落筆時英音出几席黃
山松不高自知產于石賴有和鳴鳥而不共晨夕私抱
憐才心窮老未曾易寂莫住人間驅車欲何適

漫與詩橐

香山詩橐

洪蒼崖箬舟歌

吳縣 蔣夢蘭 芳似

以舟名屋原非舟以箬名舟亦非箬問君箬舟何所取
自我作古意有託慕彼泛宅尋芳洲青箬爲笠遮我頭
行藏舒卷各有遇那即放浪隨閒鷗此身潦倒輕如葉
一任風翻聲獵獵大川茫茫不堪涉欲往從之作舟楫
聞君此語心悠然爲君大書當中懸短歌并記箬舟義
坐君箬舟歌扣舷

次施蘭垞見寄原韻四首

一緘端綺重心巧織天吳我已知奇士君能憶腐儒寒

香山詩集
一
蟬嘶樹急初日映帆孤別思兼秋思於今比亂蕪
相見曾無幾昭然識爾心定知雷煥劍不似戴逵琴長
翻當秋健青雲逐望深何爲歎搖落懷友獨行吟
笑我如蒲柳秋期及早零未刪愁草草已變髮星星世
味終年淡燈光永夜青荷衣隨分製風過動微馨
古道今誰復惟君一線存神交初識面夢別每銷魂醇
酒令心醉清風破睡昏停雲詩句在欣賞徧南邨

十六夜對月

秋月人爭賞清輝我獨憐已過三五夜才許十分圓華
屋停杯酒高樓歇管絃惟餘後時者相對未成眠

灑掃敝廬慨然有作

余本達觀者境往無滯迹欲窮四方志未肯安跼蹐邇
來氣漸衰初心已遂逆新年偶閒暇灑掃花洲宅位置
白木榻圖書設前席軒牕南北開竚望轉不憚鳩工良
所難有力敢自惜仰面整檐瓦低身安柱礎亂礫歸一
隅危墻補衆隙砍伐枯樹株纍纍頽砌石薙草留蘚苔
欣欣露青碧拮据三日餘坐臥片時適先人金沙來經
營想伊昔戊申余以降弧矢於此射兄弟四五人余也
襁褓赤遺孤倏老大哀痛何時釋迢迢數十載歲月盡
虛擲分宅期共守不謂同置奕三徑雖就荒數椽猶可
撫不辭躬作勤忍棄先人澤嗟我庸碌才一飽費搜索
飢驅劬四體無事心亦役經旬或一歸暫坐如旅客明

朝出門去几案飛塵積

春日懷嘯園次桐邨韻

一別已三月思君意獨真半生多作客垂老尚依人物
色催吟鬢風光拂酒鱗他山雖好在寂寞不禁春

二月十日遊支硎至華山分得景字

支硎路接華山境煙巒百匝如圖屏幽懷豈必遠搜奇
熟處還能得新景梅花落盡人迹稀孤負深蹊數株杏
春山寂寂春鳥啼較與前年喜清靜人生強壯能幾時
我力猶堪登峻嶺攀藤附葛頗不難今昔非分怯與猛
清遊所貴得其要澗泉石壁心已領歸來應作遊山夢
一路松陰春晝冷

題憶杖圖

山陰戴南枝先生歿以竹杖留贈吳尺鳧後爲
某攜去尺鳧作憶杖圖於便面索題

人好杖亦好杖在人如在憶人對筇竹憶杖倩圖續吳
子高士流雅節埒前輩題詠滿輕箠一揮拂埃塏余亦
好事人更欲從君丐

春社詞

信風吹來社翁雨杏花初開燕雙語中和酒熟田鼓喧
瓦卜祈年紛俯僂誰人宰肉似陳平父老於今說姓名

養蠶詞

浴種繅絲一月間舉家辛苦何曾閒園桑葉盡心如割

若惜典衣蠶得活隨時染就織未休歌聲一轉千纏頭
賣花詞

花枝新剪來城市春困佳人睡初起一聲聲喚透湘簾
買得鮮花心轉嫌去年人與花爭好今年花笑人已老
次韻和迂壑春暮庭桂忽開一枝

瑞鵲樓前一桂栽東風澹蕩故相催漫教秋半枝枝發
特許春深朵朵開翠葉叢中金粟貯穠芳隊裏異香來
不知仙客吟成後白墮紅飄有幾堆

潘烈女

六安城東五里鋪雙飛鴛鴦連理樹潘家女烈夏生孝
兩兩香魂夜臺聚紅絲昔日郎手牽報郎白練衣桁懸
生時不識郎生面死後教人說比肩

周司馬下車歌和嘯園

大夫文公之苗裔吐餐握髮爲能繼道逢朱君大布衣
下車相揖忘其勢見君面在胥江船頌君詩在金臺邊
萬里三秋慰飢渴滇南珍重繙鸞箋昔日聲名滿京國
王侯卿相爭相識即今踪迹寄吳閭撲面飛埃少顏色
盛事傳來飲馬橋布衣不卑官不驕路旁觀者竦而立
但見素髮何飄蕭長語微聞道繾綣交衢久竚停高幟
大夫折節古所難斯人得遇非爲晚陳張道衰世盡詆
神交又見阮與嵇爲君和歌歌聲齊何者爲雲何者泥
送霜洲進院次原韻

支公千載舊雲山此日高風許更攀白鶴縱歸寥廓外
青蓮應在有無間澗涵雪瀑層崖落門對天平鎮日閑
誰道故林原有主還期說法破愁顏

芳潤堂中秋翫月用高青丘韻

中秋翫月鋪雲藍青丘筆底飛煙嵐勝事已歷三百載
險韻肯許吾儕探嘯園先生抽繭絲鶴髮照映垂鬢鬢
冰心玉骨有秦子湧泉垂露爭泓涵何緣主人意獨苦
結鄰一去悲商參余也筆硯久焚却唯有此景心所貪
有時抱膝比蠖屈有時笑口如巖嵌舉杯問月月不應
傍人竊謂空詎誦飛神恍見廣庭舞玉杵影動常蟬蟬
我欲相從乞靈藥何年始獲硃砂龕明霞可餐露可飲

太虛爲室雲爲菴人生匹如一朝槿此身那似千年楠
摧殘雙翻鶴在籠跼蹐寸土魚遊潭已無知己顧冀北
豈有神術侔淮南長歌正和砌下蠶三眠欲老筐中蠶
不謂中秋正可賞翻令對境懷深慙華陽觀中修翫事
古人所好終當耽西巖一墮又隔歲敢辭達曙聆高譚
况是清尊酒常滿堆盤顆顆新黃柑林中金墓或有一
袖間玉笛何無三撫茲嘉夕興不淺看彼圓月情空含
良朋良會肯虛過莫待走練同吳驂諸君皎皎秋月姿
白榆一點吾何堪金精壯盛必漸衰世態變幻皆宜諳
縱有好辭稱幼婦豈即磊落爲奇男側身仰看廣寒闕
詩腸枯澀分所甘以茲浩歎似來護可惜度曲無何戡

賓興之典今最盛普天懽頌 帝德覃英才文戰正未
已我獨頑鈍判沉酣一雙醉眼不容瞬兔毫細數長絀
絀

前題用徐幼文韻

秋天夜色青於藍團團明鏡當天南博山香爐熱沉水
一縷裊裊風氤氳萬里今宵同色澤一泓何處分岡潭
吾聞月乃日之配好景不獲常齊驂羽衣可舞豈堪舞
淚珠迸落波相涵水晶宮殿鎖離思老死一似書中蟬
皎皎流輝照無寐不如翻遣浮雲曇當年竊藥應自悔
吐絲自縛還如蠶光華洞徹無障礙戶牖朗豁俱欲豁
蟾腹膨脗冷難忍免口缺裂愁仍含嗟嗟吳剛彼何人

執斧徒自誇鑿鑿一株丹桂不能斫冒食天祿唯貪婪
清光因爾多不得蚌胎雖滿何由採隨斫隨合世所誚
君有兩耳當熟諳西河學道偶遭譴有罪豈復猶癡憨
仙家玩忽尚如此何以勸彼人間男貪功更有修月戶
嵩山之側眠何酣豈緣七寶已合成勞苦欲避逃巖龕
朝來日光更相爍似爾惰懶奚能堪但知偷取玉屑飯
兩裏藏襍私荷擔諸君聞言共相笑謂我放誕多奇譚
冰丸當天忽西墮清影側落侵椽楠與酣拂袖起拔劍
寒鋌奕奕生鋒鐔妖墓誰敢縱吞噬畏縮斂跡歸山嵌
偶然逞我一時怒直欲令彼終身慙檐前遊絲風冉冉
一動疑墜纖阿簪月輪敲覆不可挽素女髮亂飄鬢鬢

傾翻藥白散白雪飛落我口芳且甘身生羽翰上穹昊
此鄉之樂樂可耽記取今年八月望詩成已聽雞鳴三
題張草亭采芝小照

吾有青雲芝近在靈臺前靈臺不可到長草何芊芊采
之倘云遲飛去誰能搴以茲謝名利寂守隨流年草亭
有奇骨寓意商山巔畫工調丹青迥然圖神仙阿鏡與
竹筐提攜入紫煙爾芝在圖画我芝在詩篇同爲采芝
者相笑成相憐

送南岡北遊

問君揮手去相見將何時出處旣殊軌聚散安足悲男
兒事壯遊故鄉空爾爲庭前甘菊花委地紛離披日暮
相送歸斟酒以慰之羨君青雲客此去如脫錐良朋惜
遠道恨不同追隨北風吹馬首冷暖當自知

讀友人鍾期死後無人聽碎却絲桐爨下燒之句
作燒琴行

壁間懸素琴三年未曾撫豈無揮絃心鍾期化爲土對
之空斷腸俯首不忍覩奮力摧燒之兩淚灑如雨昔爲
爨下薪雕琢飾絃柱今爲堂上音毀敗屬錡釜心聲復
誰寄坐看梧桐樹

題楊安城先生補臂圖

先生與李兼汝祁奕喜急友朋之難俱流塞外
徐象九寫圖送之右祁中李先生則以右臂鈎

李肩未幾祁李亡歸旋相繼歿先生分其像歸厥後人右臂因隨李肩剪去而二像復失於火先生臂忽痛經年莫治夫人范剪紙作臂補圖上痛遂愈閱數歲先生又卒令似大瓢楚萍屢叩 九閻遂許破例返葬夫先生之于友夫人之于先生固已誠貫金石使不得大瓢兄弟泣血陳情又何以動 天聽乎兩世艱難五倫盡備舉於斯圖見之因感而題其後

圖分臂不知臂剪神未分圖焚臂不傷臂痛心如焚補圖臂立愈藥石徒紛紛異事傳絕塞歲久圖空存卓哉兩孝子泣血動 帝閻破例返靈輻張圖憑幽魂余也生最晚展拜敢不頻想見出塞時掉臂無途巡想見補圖時誠至能通神想見返葬時奉圖感 殊恩此圖有遺痛兩世俱酸辛此圖終不朽萬古扶人倫

酒菌歌

婁東王君無爲假館洞庭西山周翁家花下小酌旣罷翁復取酒一瓮啓之異香盈室探得一物狀如菌徑四寸許置碟中時王已微醉不覺口涎溢流急取啖之盡四之一輒酣然而臥旣醒翁笑而語之曰先生醉兩日矣王驚問翁曰此酒之菌也藏久而後生酒係先大父所造在明萬曆中迄今幾七十年矣王曾爲予述之予

未之信後余每語人人聞予言猶余聞王君言也康熙辛卯冬偶與嘯園談及嘯園獨領之蓋嘯園十二年前六安聞氏招飲得嘗此味亦明季所藏酒也于是予信嘯園益信王君矣同人欲紀其事遂序而歌之以爲倡焉

醞釀天乳仙人方周歷甲子凝精光是生酒茵甘且香一朵滑膩流脂肪尊瓢壘杓空列傍雙箸夾起爪甌瓢融融入口熏我腸太和之氣包洪荒春駒栩栩飛相羊冷圭黯黯迷蒼黃黑甜境界無何鄉遊魂棲息天地房一日如可三秋當四支恬適歡以康無爲之說中心藏嘯園印證非荒唐流涎汨汨神飛颺瓊漿肯許凡夫嘗

喜蘭垞至集芳潤堂次曉谷韻

我友倏而至離懷渙然釋攜來驚人句脫却衝泥屐此生著幾兩此卷繼三百好春已半過圓月未生魄正是探花期得逢釣鰲客酌酒試相問今夕果何夕嗟余病與愁紛如草木坼笑口爲君開爛醉寧敢惜乍可君歸後相思更重積

疊前韻答蘭垞載別之作

數日共吟詠諸事甘捨釋譬如猩猩醉聊復著雙屐不覺舍退三幾致榜受百羨彼青青松盤根養靈魄願爲松上鶴飛鳴伴仙客融融豔陽景日出忽復夕飄飄紈素衣綻補忽復坼一別猶可留再別殊可惜何以比我

愁漠漠蒼苔積

城西春泛分韻二首

旭日照春水移船翫景光城西風物好此去任彷徨鷺
浴空教起鷗眠自不妨誰知牽錦纜穩穩度林塘
雲山藏樹色風岸遞花香坐穩隨遊目溪深淨酒腸縱
懷甘落托高詠對蒼茫歸計誰能決停橈問夕陽

追和清遠道士詩次本韻

有酒不斟酌寧免誚癡漢閉門裏雙足終向松根竄茲
晨數舉杯陟歷恣清翫春柳綠依依春波光漫漫衆樹
遮遠天一山壓平岸盤石巨靈剷碌碌空紛亂烏兔東
西輪光景各分半崖崩金精走風迴白雲散陰晴換春
秋煙嵐失昏旦道士神仙流領略弄柔翰寫此靈異姿
憑高發深歎後遊繼前賢讀罷不勝讚

題相佯君戴笠圖

蒼龍圻地奔雷霆采箬編笠天爲形戴之者誰相佯君
呼吸元氣乘翠雲我有棕鞵與桐帽鶴蓋高軒不堪道
共爾相佯結幽好

借花歌

浣花邨中杜子美松竹桃梅求不已乞花舊例自渠開
借花近事從余始幽人性喜藝芳蘭砂土平分手自搏
弱葉幾莖飄翠袖香花數朵傾雲鬢憑君借我移書屋
蚤晚相看伴幽獨鎮日何人款我扉却似深居在空谷

藝蘭本擬爲看花誰道看花事竟賒我本無蘭偏得看
敢將此意向君誇從來物理難推測無勞歎息栽培力
明年花發儘君看暫時失却終教得只恐明年及早春
乞花更有杜陵人知君應憶還花者翻笑栽花似乞鄰
詩徑索曉谷和

書舍本相連唯用一板隔微吟聲亦清分坐似同席中
有一線通可以傳簡尺新詩偶然成倡和頗無跡名之
曰詩徑無事頻搜索雖非遵周行豈致類邪僻嗟嗟終
南山捷徑人共借

鐙花

鐙花如芙蕖銀釭作池沼水傾一勺油藕借半莖草俚
語雖不文其義頗堪討性本附炎灼勢欲焚枯槁其色
如明月其光射參昴頃刻豔紅葩擬奪天工巧剔落還
更開可視不可拗轉薄池中蓮一枝難自保永夜靜相
看黃雞已催曉

壽侯鳳阿

節義在人心文章在人口君家三世來已足傳不朽祖
德盤根深孫枝自蚴蟻君年古所稀未得爲君壽昭昭
鳳與星一出自不偶此意人共知萬古爭昂首

題張朗昭鍊師小照

君不見康風子采食菊實長不死又不見張薦明手植
松樹移我情延年本是傲霜骨誰許秋深比顏色蒼髯

乃是木中仙青青高幹凌雲煙鍊師骨玉神秋水頭著
黃冠履朱履凝然閒坐白石牀惚兮恍兮無何鄉坐間
惟有松千尺菊花一枝手中摘爲師作歌歌那何凡花
凡木徒然多

三月十四夜步月

漏滴境初寂春深月正明晝從丙夜得人向寶臺行顧
影愁衣濕回蹤訝水生來宵應更好慎莫畏嚴更

猛虎行

腥風夜吼飛塵埃春木葉落聲喧虺鋸牙鉤爪電光目
咄咄猛虎何由來侵曉食人父薄暮傷人孩爾寧不苦
飢反縱狼與豺獵人一朝發強弩射殺猛虎如奔雷山
之人兮喜相慶羣狐竊竊翻悲哀虎威莫假中心摧嗚
呼豈但羣狐竊竊翻悲哀君不見俛鬼無依還躑躅天
陰月黑聲聲哭

雨

滴滴無佳韻絲絲動我愁午時昏欲夜春意冷於秋花
墮淋漓淚池添發滅漚陰淫如不已欲擬買扁舟

晚霽

晚睡俄然覺墻隅日影明仰看雲脚動低想陌頭行剩
雨過庭響棲禽刷羽鳴誰云春思減此際不勝情

和野齋對牡丹有感次韻二首

別風淮雨損名花淚浥妝啼怨臉霞欲向秦樓移瑟幕

可憐銷歇舊繁華

舊是花中富貴花愛將豔色比晨霞如今風雨爭相妒
淚濕瓊顚泣歲華

和曉谷

蘭陵甲第尺五天竹松苞茂幾百年羨君兄弟世相守
老屋雖老猶能全雞聲催讀曉先起月色照書宵未眠
胡爲風雨恣凌厲廊檐傾塌遺修椽終然未壞讀書榻
豈不有費探囊錢吾家舊宅花洲上昨者歸視心茫然
土墻淋漓春雨急草堂欹側春風顛爲憶君詩心轉惑
何得我屋仍鈎連擬將一木稍撐拄徒以兩手張空拳
和歌聊復共三歎子敬何日忘青氈

次韻酬李客山

君本青蓮姿澄波浴無垢手中生花筆飛舞若揮帚辭
寡意則長味之比鹽酒余也暗室居豁然開戶牖老大
徒自傷愁見十圍柳感君勗我心一株甘獨守

追輓沈太君

太君姓陳氏山陰人生有宿慧好讀書年十九
歸沈躬範先生未歿前三日夢至定心菴遺命
以平生書卷殉棺中時年二十有三越四十載
令嗣宜士索詩賦此以寄

仙人返碧落形骸豈彫喪爲劍亦爲冰靈迹夙所尚太
君居藐姑金簡恣高唱爲憶人間書暫駐勞采訪作配

歸吳興琴瑟喜操張洵是閨中友雲輶倏移仗夢入虛
無境心定無由悵金卮與玉盃齋送等薄葬不如數帙
書滿柳風雲狀視彼尸解仙此解乃獨叔况是婦道全
百世猶瞻仰蕭條四十年鳳翼已飛颺 金章極寵榮
異事誰信嚮白雲空中來蘭玉遙相望但聞天邊音書
聲出雲上

癸巳元日讌集芳潤堂送陳淳夫之長沙分得畢

字

陳子千人英迥然抱文質從遊幾廿年相契最情實暫
隔僅百里雖別恍同室近有長沙行道故待促膝盈箱
幾卷書長物一枝筆讀罷衡山低吟成湖水溢元日命

尊酒主人速疇匹良聚促卯酉雄談繼甲乙相送各有

辭使我心若失瀟湘名勝區縮地苦無術婚嫁豈有期

志願何時畢方伯韓荆州才卿舊交漆

主人韓方伯與
先兄丹園交好

相見

儻相問幸有卑孤姪諒子今遠遊江山恣雕柳襟懷增
磊砢詞翰添沕滴無為惜離羣看子脫穎出

贈吳魯傳

西南積具區東山孕靈秀山中有望族延陵衍華胄憶
子弱冠初文章若天授今始獲一衿已備 王家標與
子四世交榮落事顛覆感茲愛敬心衰薄不相陋視彼
勢利羣薰蕕豈同臭方今正作人揮筆看入彀先澤既
已深子才亦云茂上以慰祖宗下以光故舊

和野齋客致慧山泉之作

往從慧山過必至慧山麓所愛一勺泉每用兩手巾塵襟仗爾前清致由茲復年來俗慮紛終日悔馳逐遙思第二泉涓涓縐紋蹙焉得一致之爲我洗心目誰知好事流拏舟載寒穀俾我沾餘波充我鼯鼠腹兩腋已生風不似糟與麪今茲欲揚帆去住無由卜長松入霄漢疑聞聲謾謾其下即清泉應爲添慙恧

立春日復集芳潤堂分韻時余與桐邨迂壑曉谷
將往金陵

步屨來芳潤春風不我先但期朋好集數忘歲時遷臘酒尊中盡鎗花座上偏不知綠底事相對共纏綿

集梁與青天然亭題贈疊聯句韻

天然亭壓莫愁濱山色湖光面目真百頃涵窗明鏡淨
兩峰當案翠眉勻談心此日能攄臆卜宅何年得買鄰
最是相逢成莫逆宵深未厭剪燈頻

二月十七日重過天然亭留別與青分得天字

撇卻名場別有天莫愁湖上儘留連重來柳已添青葉
坐久亭疑泛小船欲與閒鷗盟水際那無漁網集窗前
春潮宿雨催歸急莫道新知忍棄捐

秦園得山字

假山誰識是真山點綴何曾改舊顏見客隔花明復隱
尋溪穿石去仍還泉分第二聲聲響竹本無多箇箇斑

一任舟人催放棹縱令盡日亦偷閒

寄懷徐若霖吳魯傳

歸家半月餘惆悵如有失虛名蝸牛角良友芝蘭室爾
汝略形骸談笑露情實就中徐與吳忘年等膠漆老鶴
拂雲翰良驥追風質蓮鐔發新硎朱絃調古瑟攜手登
東山聯吟答遲日蕙風入座來山月當樓出盍念三徑
生倚竹獨無匹

懷客山

時在維揚
離院

憶君春首重離情既別還來聽鳥鳴已儼扁舟載元禮
更尋佳句比陰鏗柏香使院開花小柳暗隋堤拂浪輕
正是清明風雨候共誰相對話平生

訪葉閻峰次原韻

交情已如此每誦絕交書性拙時爭棄心灰愛索居偶
來忽相遇此出未爲虛欲話悠悠事重須造爾廬

命童子取竹篠數根扶植牡丹防暴風搖蕩傷厥
枝幹旣畢事矣乃折一蕊萎然下垂將日就於枯
槁越數日花爛漫矣蕊亦稍放旣違雨露之澤而
生氣未絕不甘委棄然其精力憊甚形神俱失慨
然賦詩

禍福機甚微倚伏未可測誰知愛護心翻使遭誅殛雖
蒙免摘除莖折何由直春露宵來濃羣葩露滴瀝爾欲
仰承之俯首空愁感生氣能幾何一絲未曾息吐芳寧

無意勉強如有激豈復聞天香猶自矜國色辦卷不得
舒苞縮不可副我欲剪其枝感慨填胸臆盛衰各有心
所遇異通塞以况落魄人春時獨悲惻

送曉谷北上兼寄南岡分得宿字

高樹凌青雲好鳥爭止宿巍巍 帝王都名流接丹轂
去歲別南岡今茲別曉谷錐穎必出囊美玉寧韞匱念
遠殊未休離愁且更僕南岡初去時君行豈曾卜意外
忽相逢如見三徑菊舊事共談論新詩頻往復顧余鷓
鷓羣所求惟灌木飛鳴意苟適豈恨辰去速飄風水面
來層波盪羅縠中有數點萍得保長相逐

泛舟餞別次野齋韻

行色兼秋色花香入酒香定知今日會不挽去時裘幔
捲波光淨舟迴日影黃相看俱醉眼此境最難忘

送別後述懷

往時年少輕離別送客來歸心似鐵自甘貧賤守林阿
奚事忙忙逐蹄轍如今遲暮送行人恨不兩翼生我身
未別已先垂老淚得使別後無悲辛少年誰肯愁衰老
未信流光去草草即今富貴豈乏人多半當年致身蚤
我將鼓枻凌滄洲一去不返心油油牽衣兒女未即舍
閉門獨坐風滿樓

曉谷別後風雨徹夜和淳夫作

別緒歸來劇青燈伴獨幽寂寥五夜夢風雨一船秋情

香山詩集
逐滄江遠心依舊侶愁天公如有意應是惜遨遊

翫月次野齋韻

寒光乍透秋天空蟾蜍欲出天之東桂香撲鼻風到懷
一輪送入中黃宮冰心玉壺不知冷內視豈有山河影
常將此意答明月明月人心相與永

哭許笠邨二首

世事傷衰薄天心喪老成分金今鮑叔說劍古荆卿意
氣層霄上襟期皎日明可憐三斗血滴滴爲人傾
聞道思君者人人願潔誠矢懷千載暫旣諾一身輕慮
盡心兼力年忘弟與兄嗟余貧更賤慟哭畢交情

同心蘭爲鄭漢倬薦廷父子賦

蘭乃王者香亦復善變幻奇葩發磁盆一朵十二瓣兩
心如一心同條而共貫君家篤至性衆口不容讚此花
呈其祥豈復由澆灌圖畫與詩章貌似何足算

登穹窿絕頂望震澤

茲山何穹窿萃律塞天罅登頓筋力微雙足忽如借旣
陟窮嶺巔羣岫兒孫亞俯首視具區心疑失嗟訝三萬
六千頃此語成夸詐何況衆細流譬酒斟在筭始悟所
歷高轉盼同轉化信哉登泰山可以小天下

九日書懷

靜對西巖逸興催長吟散髮獨銜杯每逢佳節無多日
幾見重陽有百回半世已如秋漸老雙眉好與菊同開

且拚爛醉東籬下莫待繁霜上鬢來

次淳夫重陽後一日夜話韻

采剩黃花倚短籬秋深風急竟誰知影搖愁聽三更話
夢醒魂依九日詩有月有霜甘冷淡何山何水任棲遲
從君細說陶元亮豈羨先時惜後時

疊前韻

三間茅屋一疎籬秋水秋山結素知有客可譚非絕俗
無人能愛是真詩雲緣少礙行空速碁占先機落子遲
獨坐不愁風露切天心待看月來時

疊前韻

草堂蕭灑隔荒籬獨處何妨莫我知壯志盡銷將賣劍
愁心細寫祇憑詩飲香蛺蝶飛難定駕重駑駘走更遲
落托胸襟空老大思量何用說匡時

疊前韻

月在空庭霜在籬秋宵景色少人知鍊成氣骨千錘鐵
味出鹹酸幾首詩身世百年殊草草古今一晌豈遲遲
幕天席地無窮事收拾西風捲籜時

題楊大瓢照五首

大瓢圖

尼山桴杯渡杯大瓢胡爲哉洪濤萬里浪拍天大瓢雖
大如塵埃先生將往何水隈先生一去何時回新詩盛
我瓢抑鬱爲之刪清酒盛我瓢天地爲之寬見君大瓢

嗒然喪望洋向若徒嗟歎先生濟世擬杯渡先生憂道
宗尼山以茲大瓢作舟楫大川能使無狂瀾噫嘻噓風
波浩浩無時無大瓢坐穩如康衢我欲從之空踟躕

自我非我圖

丹青託好手圖畫如路人誰知百年前潑墨傳君神相
視得妙解身外忽有身無爲求我相真我亦豈真

濯足圖

滄浪水濁豈由人洗耳當年說潁濱今日泉清偏濯足
只嫌曾踏世間塵

黃冠圖

季真著黃冠歸止鑑湖曲先生是鄉人千載追芳躅季

真垂暮年珪組不能束先生本布衣壯歲矢弗告翻令
賀季真媿不早知足

目耕圖

郊原逞遊目煙雨識良圖牛健犁頭滑春回土脈蘇何
煩衣襪禊即景是耕夫

懷曉谷

念爾何時已胥江落照邊袂分秋一半別惜路三千綠
綺終能識明珠莫漫前南來足鴻雁不見寸心傳

擬儲御史田家雜興

晨詣北山北暮歸南山南簑笠雖在身力作殊未諳飼
蠶亦有婦餉田亦有男歎彼衆力勤溫飽心懷慙鄰翁

挈壺酒就飲成微酣爲言於陵人寧戀一肉甘長揖謝
鄰翁死餌知鮑貪相送出荆扉月影沉深潭

送寧都魏昭士遊西泠分韻

菊滿東籬烏滿林晚秋日落酒杯深交情有分才相得
別思無端又漸侵茂苑風花虛客夢武陵潮汐長文心
翠微歸去知何日爲寄空山梁父吟

八擬 存五首

僊

玉洞烟霞鎖林樾奇葩歷亂香難歇青猿上樹采松花
黃鶴當階舞明月乍開丹鼎氣絪縕試與忙忙蟻子羣
相逢却怪無相識歸去山龕臥白雲

鬼

日瘦風淒苦幽獨青楓白楊慘巖谷狐狸跳梁阻我行
鷓鴣號呼引我哭飄飄忽忽同飛塵陰幽不記冬與春
自傷長夜暗如漆喜見衰草明青燐

僧

貝葉繙成轉法日風幡論罷趺雙膝大小叅來夢覺禪
中邊食後甜回蜜已向蒲團制毒龍還揮談柄執青松
黃花翠竹無窮意不問當年南北宗

怪

非神非鬼偏多術精華盜奪虛還實夏后鑄鼎雖可辨
齊諧作志終難述出無入有不可常傳聞莫道皆荒唐

人間異事累千萬笑彼習見旋相忘

俠客

三尺青龍在雙袖十年結客風塵走但求落落有心人
何用區區不義富存亡生死經幾秋矜能伐德良足羞
郭解朱家世莫嗤一生豈必惟身謀

火

康熙五十有二年十月五日夜未眠闔閭城中聲震地
闔閭城外光連天是時秋冬久無雨風日燥烈烘梁柱
姚家街口包氏居偶一不警騰煙炷從此綿延百十家
流光走燄飛金蛇四方奇貨累百萬一炬頃刻成塵沙
大官小官急馳驟反風無術何能救當其烈燄未熄時

誰忍遲留獨居後城頭峨峨百尺高其下十丈深鑿濠
衆人攘攘互出入一橋約束如蜂腰橋窄人多脚蹠踣
危闌一斷崩崖谷火光照水如血紅數百生人水中哭
深濠填塞水不流先墮在底後上頭水濡人壓兩莫當
那得更試吳兒泅魂斷身沉不可記下者翻爲上者利
雙鞵雖濕衣尚乾屍上逃生若平地嗟嗟此火燔居民
奇羸灰燼存其身豈知因火而死水水中死者皆途人
橋西之火勢愈猛火東之路縮如頸萬人擁擠火漸來
不出不入喉中鯁直北一路舊渡津石橋高跨何嶙峋
平時歷級尚不易當此雜還空逡巡下塘隔絕僅尋丈
肩連踵接迷來往來者欲南不得下往者欲北何由上

相持既久難支撐一人蹉跌千人傾强者騰翻疾奔竄
弱者屍積橋梁平或者僵直或卷縮或折手足或穿腹
不如湔沒濠中人縱死猶全骨與肉火止宵殘猶未歸
傳聞兩處心疑非耶孃妻子急相索哭聲一片昏陰霏
濠邊橋邊夾衢路形骸細認齊鳴諱得尸似得活人還
餘者傷心不知處一夜西風白浪顛漂流出沒隨波遷
齊女門邊觀者衆幾人失足沉深淵瓦礫場中拾餘燼
敗墻傾塌雷霆震何事餘威尚未收又見零星買棺櫬
天人之道孰可知寬征與材聊爾爲後世敢希鄭子產
梓慎裨竈亦足師 聖君享祚最悠久况是今年聖人
壽赦詔遙頒囹圄空死囚且得延其首戊子之歲叛逆
誅肝腦狼藉膏血塗教場陳尸約五十此輩齷齪皆至
愚天地生生真大德六府胡爲失其職哀哉無罪二百
人玉石無分在晷刻豈緣風薄俗更澆真宰作意懲浮
囂途中水中有定數特以一火爲招邀而今一路陰魂
滿薄暮依稀識長短啾啾鬼哭略可聞路上行人迹欲
斷騰騰烈火猶可防軀命一失何由償城中城外招魂
哭怕見橋頭并水傍

曉起

嚴冬霜雪苦相兼老境深慚食蔗甜居有數椽聊自守
身經多病始堪嫌破窗紙響風如剪弱骨寒侵被似鑷
曉起青銅忙索照更愁白髮夜來添

長至

雪深舊雪兼新雪長至日長還夜長馬磨縱令窮許靖
牛衣何事泣王章持更鼓濕沉偏急催曉雞寒咽不揚
癡女未梳先刺繡要憑弱線試尋常

遣興

草堂柱側危仍倚花架風翻力不支鶴料取將隨手盡
羊裘縫補上身遲體衰早欲須燕玉骨換終當采肉芝
殘雪未消寒月滿高吟庭際亦狂癡

一鐙

一鐙冷燄宵中暗數帙殘書几上陳屈指年消四十六
捫心我負影形神漫愁雨水漂桃梗豈想蜉蝣等大椿
多病邇來諸事減獨留窮鬼伴閒身

半曷

寒宵半曷步庭前耳目生憎逐境遷南巷犬聲通北巷
東邊蟾影照西邊久衰弱草迷霜砌未息哀鴻叫碧天
最是關心無限事又教獨立意茫然

簡倪又迂

倪迂一別又經年白日相思夜廢眠好友祇今多落魄
病魔於汝獨連絲不知藥餌資誰寄欲問平安信莫傳
擬僱扁舟到清閬探囊空對阮孚錢

張鶴才齋中綵花

忽驚百卉窮冬發髣髴談經天女來五色光團千朵秀

四時氣簇一瓶開仙姿不謝留工巧玉指遙憐費剪裁
誰向韓湘誇頃刻君家咏雪有餘才

殷西澗送慧泉一甕索詩書以應之

人心貴無營有著即有礙豈緣一杯水心液遂不愛余
也有茶癖君已得其概投以慧山泉責報新詩代搖筆
試償君一字心一悔轉念忽自嗤已獲利十倍我詩淡
無味敢與山泉對諷詠意輒窮烹煮騰猶在一甕與一
篇多寡豈容昧願君索我詩數日一相貸日飲慧山泉
我詩不妨再卻恐君心悟投詩發長嘅

香山詩藁

芳潤堂詩藁

吳縣 金國棟 最木

松陰夢詞

山中日長如小年古松結翠枝連卷下有幽人跂脚臥
一枕清夢拋萬緣白雲來徘徊黃鶴墮我前乘雲跨鶴
上霄漢神遊蓬島追羣仙瓊瑤聲動聞鈞天碧天爲幕
黃圖爲氈噓吸顥氣森寒煙周耶蝶耶何遽然魂形尚
覺非天全驚颺急瀑迴松顥覺來佳境誰能傳

遣興三首

雁飛各成行一雁獨無侶露深葭葦寒哀鳴繞沙渚彼
非爾同羣切切空相語

飄忽秋天雲無端翕然聚但能蔽清光豈便作霖雨隨
風掃碧空孤月來為主
蟋蟀鳴三秋哀樂吾不知其聲應金氣彼固當其時繁
霜一以降憫默安所之

古錢歌為嘯園賦

嘯園好古稱絕奇收藏古錢靡缺遺形模名號列圖譜
盛以錦囊常自隨古錢日少恣歡賞今錢雖多肯妄想
室無長物莫言貧一錢氣壓蕭宏榜斑斑古色凡幾年
當時得失人爭焉披露塵沙破荒冢重逢好事為流傳
世無賢愚皆有癖鼎彝珍重踰圭璧翫物曾無愛古心
均之銅臭終何益惟君大雅多舊聞考索制度窮遺文

安得茂先名博物相與道古娛昏昕用志不分十載久
怪怪奇奇落君手好古如君好古錢燦然萬物皆我有
庭前南燭一株枝葉雖茂而不結子綠墻細草朱
實磊磊感而賦詩

南燭移栽日丹砂映碧叢清森終不改爛漫轉成空輸
與墻頭艸翻誇雪裏紅植根何處所誰謂後彫同

歲晚

老來思少日歲晚憶春時此意憑誰覺我心空復知衰
顏同病葉青鬢換霜絲不及庭前樹東風發舊枝

同嘯園香山桐邨迂壑尊溪南岡曉谷遊支硎至
華山分韻

支公舊隱茲山阿蓮峰相望高嵯峨嬉春裘屐何雜遝
余亦屢與詩人過今朝又放西郊棹柳絲輕碧搖清波
山邨桃杏互映帶臨風向日朱顏酡一路山光入眼底
幽禽宛轉啼喬柯峭壁千仞飛雪瀑潺潺繞澗鳴煙蘿
峰迴路轉躋鳥道虬松翠影雲邊摩禪房深靜對修竹
清森滿逕忘春和頗疑向者身未到乍得佳境爲婆娑
平生蕭散愛幽討名山勝踐能幾何向平雅志嗟久負
棲遲一壑仍蹉跎年年此地一再至如逢海若誇秋河
南邨數子擅風雅青鞋到處皆能歌歎息林巒混塵俗
却令吾輩湔綺羅歸來點筆摹清景卷中添得新詩多

玉蘭

去年一樹花如玉何事今春只數枝樹老花稀應似我
清香猶得滿庭墀

去年有林屋探梅之約不果曉谷有詩賦此和之
去年探梅鄧尉山太湖萬頃相迴環湖中有峰七十二
一峰秀絕滄波間林屋古洞神仙宅彷彿蓬萊斷塵跡
極目蒼茫逸興飛湖光蕩漾林巒白歸來恰遇山中人
爲道山家二月春梅花樹樹霏香雪期我今年一問津
香山踴躍議先倡曉谷同聲氣尤壯湖山宿諾空解嘲
不及曩時猶一望青鞵布韞縱冥搜雲煙過眼終難留
豈知少文有妙訣一室衆山可臥遊匹如共作羅浮夢
參橫月落香浮動天風吹上高峰巔冷然聽奏梅花弄

春禽

早知氣候到陽和
遲日園林幾度過
晴拂翠屏雙影疾
暖臨風榭碎聲多
綠楊橋外衝紅雨
芳艸池頭剪碧波
何處深閨夢初穩
忽驚枝上轉嬌歌

春聲

輕雷一夜破寒香
取次遊蜂簇隊狂
選樹鶯啼過小院
賣花人喚隔重牆
錫簫吹處邨童聚
社鼓喧時野老忙
夾路青青芳草徧
驕嘶叱撥向橫塘

題吳尺鳧憶杖圖

一筇移贈高人意
塵外清風已屬君
人物莫言真化去
虎丘明月釣臺雲

春社詞

杏花娟娟燕入戶
青野濛濛降靈雨
祈年擊鼓趨叢祠
酒香盈樽肉在俎
邨巫歌舞傳神言
若爲主伯若亞旅
往哉東作緣南畝
不生蠱賊多禾黍
送神飲福衆乃歡
勸酬雜還意朴魯
老翁醉歸兒童扶
田家此樂僅可數
太平景象占斯辰
誰爲添入豳風譜

養蠶詞

繞屋桑陰漸濃綠
人家閉門守蠶苗
朝朝采桑葉滿筐
夜夜飼蠶不臥牀
愁聽食葉如風雨
葉少蠶飢誰肯與
典衣不惜身無衣
更向前邨買葉歸
上山作繭已嫌遲
夏稅追呼須賣絲

采茶詞

茶之絕品名山產精英所鍾味清遠陽崖陰林乃得地
危峰絕境種尤罕輕雷乍驚紫筍抽雨前采之須晴暖
晨興上山露欲晞細摘膏腴不可緩一槍一旗固不多
終朝翠筍猶未滿歸來家家爐火焙氤氳香氣浮青巘
筠籠遠致供好事乳泉初沸漚花散茗戰誰知采者難
眠雲跂石纔能辨

賣花詞

女墳湖畔山塘路竹籬茅店看花處
菴岸綠陰繫畫船
滿徑紅香拂巾屨
奇花異卉不論錢
傾囊買得迴船去
種花老圃住山邨
芳菲十畝生涯存
朝朝移樹山前賣
擔花入市歸朱門
朱門曉妝堆鬢鴉
花枝婀娜凌風斜
幾番開落花仍好
芳年誰得長如花

題三家文鈔

吾觀萬曆後正路生荆榛
儒家宗良知講學倡異論
俗流競浮華剽竊敝相因
浸淫入佛老怪僻說愈新
卓哉三君子述作追先民
奮筆掃糝糠廓然見道真
朝宗實華胄豪氣誰能馴
危身陷黨禍名聲一時震
叔子志經濟蠖屈以求伸
伏處翠微山敢曰非隱淪
鈍翁際聖世金聲而玉振
文章更古雅議論歸清醇
三子適同時斯文媿鳳麟
平生一瓣香敢望堯峰塵

初夏重遊明瑟園

春去無多日溪山盡綠陰名園仍好在野興復來尋幽
鳥如迎客餘花亦賞心閒身容小憩何必住雲岑

弔羽吉

炎海歸舟遠秋風總帳懸生還空有夢久客欲招魂今
日親朋淚當年離別尊江津折柳處搖落幾株存

六安州學生潘瀚有女許字舉人夏聲子思謚居
母喪毀卒女聞訃自經死郡守以下旣勒石表其
事遠近聞者爲歌詩以哀之

烈婦易節婦難慷慨尚一時從容俟蓋棺節婦易烈婦
難未亡猶視息捐軀忍摧殘烈婦殉夫念舊恩烈女殉
夫未入門夫死孝女死烈婉婉弱女心如鐵萬萬古名

不滅

小南邨集刻成偶題二首

野人豈復念詩名落托高歌寄此生一帙半題風月句
從無姓字及公卿

撫卷長吟更惘然南邨二友

謂任齋
楓江

獨無傳卮衰孤冢凝

秋露木落寒江入暮煙

送霜洲上人進院次原韻

幽人結構闢寒山捨宅高踪未可攀深靜禪局修竹裏
清泠泉響白雲閒香林有待宗風振塵劫空留野衲閒
講席重開修淨業悠然常對碧孱顏

九日

何處尋芳菊誰人送濁醪風前木葉下雲外鴈聲高

感懷二首

吾父生我晚劬勞已暮年可憐三歲孤子焉無比肩吾
母樛木仁使我宗祀綿恩勤踰已出棄我相後先有子
不逮養罔極恨終天尚憶童蒙時執經淚潺湲常誦蓼
莪詩三復杖杜篇

三年離母懷七年離母側兒啼母心憂母病兒不力母
歸奉晨昏承懽愧子職母謂兒尚幼兒長母不識沈繇
三十載良藥苦難得割肉古有之毀傷心轉惑至孝感
神明撫躬常負慝

借花歌

香山名字同香艸性愛幽花見幽抱未向靈均九畹滋
一叢借得看亦好翛然坐對迴無塵如在山厓與水濱
習久花香渾不覺看花人即此花身何須更問非吾有
種花借花亦皆偶此花故事為君傳并誦清詩播人口

虎丘

今春遊西山虎丘獨相左秋光正復佳幽興忽焉果便
呼一葉舟結伴少亦可葭葦風蕭蕭遠水含澹沱谿回
煙樹叢對面晴嵐墮簫鼓鳴中流柳陰連画舸誰知繁
華中冷淡亦有我步入黃公壚三杯澆磊砢斜日披林
丘爽氣薄吸峨楓葉早染丹叢桂方抽朶生公一片石
雜還不可坐余獨尋泉源夾磴寒雲鎖悄然鼓柁歸升

月載婀娜

牡丹

客退虛齋靜
花開清晝長
離離遲日影
細細暖風香
歡笑攜嬌女
幽閒對孟光
芳華重照眼
追憶轉茫茫

登穹窿絕頂望震澤

崢嶸羣山拱浩蕩
三州跨穹窿
挾具區形勢
東南寡我來
登其巔
秋氣正瀟灑
楓林猶未丹
稻雲尚盈野
澄瀾淨明鏡
感浪快奔馬
帆影天際閒
雁字雲中寫
茲山赤松遊
招邀袖可把
不爾泛煙波
試往尋橘社
優游湖山閒
景物共陶冶
笑語塵埃人
碌碌何爲者

歲交水涸客從慧山來
致山泉一舟喜而賦詩二

首

始余遊慧山
手掬慧山水
飲之清而甘
造物洵鍾美
同遊頗見賞
風致亦可喜
竭來三十載
相去一百里
思復鼓枻遊
爲我洗塵滓
水厄嗜頗同
消渴病堪擬
夜坐茶具陳
午夢茶煙起
任彼酪奴嘲
未須著論毀
鬪茗尚易知
品泉誰解此
涉冬久不雨
瓶罄復罍恥
符調輸與蘇
驛送忽如李
欣然來故人
久別味彌旨
回頭念舊遊
逝者二三子
余時年最少
頽唐亦暮齒
豈若山中泉
浥注不窮耳

品泉名第二
天下無此水
石泉更漫流
陸子論最美
中冷難辨真空爲
好事喜何如
茲山泉離城
不數里一泓

徹底清不能雜塵滓試以喻人心高潔誰堪擬空山松
聲寒滃然白雲起身居廉讓間寧須論譽毀不竭亦不
盈今古常如此紛紛浥注勞混俗亦不恥徘徊賦詩別
相傳有短李古來愛此泉想見同風旨淡交味愈長亦
以比君子我欲往山中枕流復漱齒豈必試佳茗遠致
為佳耳

和清遠道士詩次韻

清遠古仙人乘雲入霄漢胡為下塵寰役役類貶竄舍
彼蓬島遊愛此一丘翫恭子復何人遊跡同汗漫遐哉
遡殷周閱世變谷岸荒唐詫鬼神詎與人羣亂賦詩沿
近習讀之疑信半毋乃唐賢徒來此寄蕭散青松白雲
間妙句悟一旦憑虛托幽踪茲山留逸翰好事有餘慕
繼和屢驚歎真靈與文人此道常相讚

九日書懷

朝來爽氣挹秋山便覺身輕欲往還尚有濁醪供放曠
豈無吟客共踈頑未彫霜葉林間綠向晚寒花籬外斑
莫道悠悠佳節過病餘風物最相關

湖上晚歸

白水溝塍滿黃雲陂野連築場愁濕土穫稻趁晴天霜
樹留殘照寒山沈暮煙向來農圃興即日復欣然

瓶梅

一枝誰寄嶺頭春點綴年光數朶新
棊几明窗為別館

水邊林下是前身，渾疑畫卷時。
搖影長在冰壺，不受塵最。
最是幽人清夢覺，半梢煙月夜橫陳。

淳夫往嘉禾度歲，即探梅山中，於其歸也喜而有詩。

歲聿云暮，征人稀。君獨胡爲去，不歸寒風蕭蕭雪滿衣。
側身南望，心俱飛。春回幾日，梅花發，短篷載客浮江月。
徑往山中，不到家，舉觴高詠，神超越。五年夢想花氤氳。
輸君襟袖，皆清芬。孤標自賞，無人識，惟有梅花可與羣。

疊前韻

君詩清絕和者稀，討春應與花魂歸。
夜雨幽窗風襲衣，含毫鬢髮煙雲飛。
煙耶雲耶花爭發，空山獨伴寒林月。

瀟灑風神冰雪姿，古琴一奏音疏越。
看花幾度想氤氳，却從詩裏對清芬。
不須更蠟登山屐，佳客如花總不羣。

白燕次海叟韻二首

投懷有夢是耶非，去國離羣狀貌稀。
晝暖共依珠箔舞，春深閒逐柳花歸。
低窺寶鏡明釵影，細語雕梁伴雪衣。
江左風流殊舊日，休尋玉樹繞庭飛。
入戶人驚舊日非，朝陽映帶認依稀。
戲隨粉蝶垂垂舞，愛惹游絲緩緩歸。
曾伴玉樓迷月幌，應投珠館撲雲衣。
塞鴻也有霜毛潔，春水秋江一色飛。

走筆乞迂壑橐

唯君與桐邨總角，即相友曉谷又鳳雛。
性行各有取冰

清而玉温宜在烏衣右往余舉吟社權輿歲乙酉君家
有二難砥礪志不朽討論淹夕晨脫橐互擊培秀句摛
芳藻古字擬蚪蚪君時適遠遊飄泊誰與耦歸來探行
囊佳詩驚老手矜慎不輕出欲讀每被肘聯珠古所難
才名不脛走胡為抱荆璞清門祇謹守荀陳亦多賢能
詩未曾有願為吾黨光拜賜踰瓊玖

芳潤堂詩橐

桐邨詩橐

春社詞

吳縣 繆宗儼 敬思

羣雞驚飛桑樹巔鄰叟到門掠社錢買得魚牲沽得酒
大家拜祝祈豐年五日一風十日雨農事全憑神作主
燒錢擊鼓送神去飲福田頭盡醉舞磨刀霍霍分胙歸
田家一年食肉稀

養蠶詞

戴勝飛來女桑綠催得春蠶蚤上簇蠶室無風新補垣
家家守箔常閉門相逢桑下無雜語但道蠶多飼葉繁
三眠已過將成繭嘈嘈又聽縑車轉蠶家有絲不上機

年年賣作他人衣

采茶詞

穀雨初飛蟬翼轉早采爲茶晚爲芽雷聲昨夜催旗槍
女郎上山各執筐曲穿石徑雲生履摘露清香隨手起
山銜落日催歸家竹爐沉火焙新芽焙得新芽纔上筥
門前已有行商至

賣花詞

種花得法花開早直同裁剪爭天巧滴水封泥擔入城
六街叫徧皆春聲春聲飄入深閨裏出喚簾前數花蕊
綠戰紅酣潑眼新生涯憑仗一園春但愁無計留春住
紛紛花落成空樹

和香山灑掃書齋

柴門閉深巷知是幽人居雅情好蕭散俗事多屏除餘
閒事灑掃肯使日月虛修垣補石徑一一勞其軀雖勞
亦不惜即境意已舒風暄春意動好鳥鳴庭隅悠然絕
塵想一室聊足娛胥江要路津車馬紛馳驅半是宦遊
客役役無賢愚視此幽棲者喧寂當何如

春曉

臥聽枝頭百舌譁一牕紅影豔晨霞開簾爲放朝飛燕
捲幔先愁夜落花幽徑風生回蝶夢疎籬香動報蜂衙
海棠睡起嬌無力裊裊猶含宿露斜

春思

媚景撩人不自持，情懷如醉復如癡。
與來隔水聽禽語，愁在和煙結柳絲。
風轉綠陰回好夢，雨催花氣入清詩。
眼前無限關心處，說與東君總不知。

春日懷嘯園

江上浮雲斷歸期，總未真居停誰是主。
設醴屬何人有意，騫長翻無波起涸鱗。
不如一尊酒共賞故園春。

泛舟三首

溪邊有殘梅，風動香猶起。今日花在枝，明日隨流水。
修竹出短垣，蒼翠殊可愛。颼颼忽驚秋，忘却春風在。
花開平野黃，柳映陂塘綠。載得十分春，孤舟恣遙矚。

二月十日遊支硎至華山分得既字

西山春日多佳氣，看山每得山中味。
芒屨竹杖自年年，境落夢魂猶髣髴。茲遊恰遇風日妍，青吐南峰掃靄靄。
但逢佳處輒遲留，禪房曲檻羅花卉。筍輿更入萼山路，層巒如活泉如沸。
昨歲登巔躡白雲，蹇葛捫蘿穿履屣。此來且莫更躋攀，行樂從來不可既。
下山遙望停舟處，紅波一片蒸霞蔚。

哭楓江二首

與君臨別日，問我來何時。豈意言猶在，重尋杳莫追。
樓空陰雨暗，帙散夕風吹。十載同酬唱，愁看壁上詩。
人情多反覆，念爾獨硜硜。出口如絃直，開心似月明。
身家終不計，事業竟何成。子弱雙親老，誰堪托死生。

古錢歌為朱嘯園賦

舉世皆好錢好今不好古古錢流落千百年過時不用
等塵土衆人皆棄君獨取性之所好物必聚遐搜廣致
靡有遺按以錢志歷可數虛牕對翫白日移開囊出示
誇神奇俗眼見之皆竊笑何異画餅不療飢那知君心
寶愛此細讀錢文如讀史年來寂寞守衡門側身天地
窮無始多少興亡阿堵中懷古茫茫百憂起有時酒酣
氣激昂壓倒今古雄財子

題李休翁遺像

獨持名節入山深寂寂柴門蔓草侵白髮尚存孺子慕
布衣亦有老臣心梭鞵蓆帽看花出蘿月松風倚杖吟

漫道先生多樂事無窮幽恨寄登臨

有畫眉飛集庭樹經旬不去天將曉則鳴宛轉可
聽一日飛去為羅者所取感而賦此

澹澹春煙起庭樹有鳥飛來不飛去飲啄階除性頗馴
一枝棲息忘軒翥余亦久已遺世情正堪與爾為友生
空齋無事春睡美數聲宛轉催天明那知一出不知警
誤觸網羅在俄頃巧舌從來得禍多蛾眉莫自誇妝靚
嶮巖世路類如斯不獨此禽遭繫羈寂寂無聲樹影亂
倚欄空望暮雲飛

聞淶水園海棠盛開戲簡尊溪

紫綿披拂不禁風細雨輕煙似夢中只恐先生先睡足

燒燈誰照一欄紅

送霜洲上人進院次原韻

泠泠飛錫到西山支遁高風尚可攀
幡影長飄松影裏鐘聲時度水聲間
空潭印月身初定遠岫生雲意共閒
他日訪師叅講席清談揮麈一開顏

送南岡北上

酌酒與君別日暮涼風生丈夫志四方
慷慨就長征况君希世才所至多逢迎
新知豈不樂故交結遙情揮手從此辭
一雁天邊橫

城西春泛二首

為愛城西好年來放棹頻遊從仍是舊
風物幾回新郭

外青山近溪邊細草勻沿洄覺自得魚
鳥亦相親心情甘澹泊世路厭風塵所好
惟山水同遊多賤貧輕煙籠夕棹新月送
歸人縱飲添餘興襟懷醉更真

借花歌

香山書齋春晝閒幽蘭香溢窗戶間羨君
得此作清供答云借來非手種種花朝暮費
滋培及到花開看幾回借花花落仍還主流
水行雲任去來笑我比君更堪訝有花不種
并不借隨處逢花照眼明渾忘紅日天西下

壽侯鳳阿

膠城有逸士高情何超忽濯足白鶴江放
歌滄海月高窗宿閒雲幽徑拾野蕨神安形
不衰朱顏映綠髮終遇

鶴上人從之鍊真骨

次韻答李客山

李君不恃才胸期何冲漠下筆縱橫飛倒瀉千仞壑翩
翩出世姿雞羣立獨鶴伊余好虛恬避喧棲水郭與君
初會面早識情所托知己固所難得君寧不樂

登穹窿絕頂望震澤

穹窿聳崢嶸衆山莫與比振策試登陟徑危行復止積
頤造其巔孤特怯徙倚縱目震澤湖萬頃何渺瀰瀕洞
混太虛不辨天與水洪濤觸山動恐有蛟龍起盪影浩
無極驚風灑凡鄙嘗聞學仙者采藥曾來此我欲訪靈
蹤徘徊白雲裏

重陽後一日夜話次淳夫韻

今宵且復醉東籬落落胸襟彼此知斷飲爲愁重舉酒
有懷緣病不題詩夜深衣冷霜飛早坐久燈殘月落遲
最是看雲還憶弟連牀情話更何時

戲疊前韻答淳夫

閒掃庭蕪補竹籬一生襟韻有誰知不妨閉口聊觀弈
豈必驚人始作詩爽氣可能消鬱結晚香只合伴衰遲
西風自是催秋老何用關心葉落時

三用韻

苔滿階前花滿籬有懷何必令人知水邊鷗鷺堪爲侶
門外雲山盡是詩漁父同舟清話永鄰翁招飲醉歸遲

一聲啼鳥風簾晚又是閒眠夢覺時

四用韻

澗灩湖光照短籬心情只許白鷗知不逢何遜休聯句
難起陶潛共詠詩曉鶴夢醒驚露冷寒蟬聲咽吸風遲
敢將文字求名譽長嘯秋空月朗時

五用韻

秋光收拾到園籬獨與黃花結素知郭外有山堪載酒
囊中無物只添詩烏知避弋歸林早魚爲驚釣吹浪遲
遯跡丘園甘寂寞久知疎懶自違時

六用韻

深巷窮居亦設籬悠悠世事復何知坦懷不作思玄賦
適興聊吟招隱詩居易名難邀顧况景陽才肯讓丘遲
此情只合同秋爽爛醉花前莫負時

七用韻

邨深岸曲水環籬冷澹煙霞世莫知林洞只應常采藥
仙宮底事亦傳詩笙吹雲裏聲飄遠弈對松閒局罷遲
欲學幔亭揮手去塵襟脫盡是何時

訪菊

看菊年年過藥園緣溪路熟識柴門短垣風起香先透
曲徑霜飛色正繁籬下乍逢如有意林間相對總無言
往來盡是看花者誰向秋光酌一尊

晚秋散步

小橋深巷靜無譁記得曾來看菊花門徑未移猶彷彿
兩株垂柳一溪斜

葉滿空廊野寺秋蒼苔漠漠竹堂幽消閒何必深山去
此處風光好逗留

茅屋敲斜傍水灣園翁種菊正爛斑雖然傳我栽花訣
未必明年似女閒

客有不樂者追和高青丘韻

客有不樂者掩卷孤燈幽獨坐誰與語草蟲鳴相酬百
憂從中來蕭瑟非關秋我髮已漸白身計空悠悠譬如
霜前葉一落安能收所至輒途窮何必問九州仰觀南
來雁多爲稻粱謀苟得非所願囊空奚足羞君子貴知

命於人復何尤

懷曉谷弟

維揚來雁信聞爾尚淹留風雨孤舟夜江山落木秋有
詩惟自詠懷刺向誰投今日知何處相思兩地愁

擬儲御史田家雜興

雞鳴接墟里迎晨向阡陌刈獲納茅廬黃雀繞簷隙雀
飢雖可憐農力殊可惜今年幸登成輸稅尚有積石碓
春香稻皚皚雪花白衣食既易足俯仰亦易適沮溺不
辭勞躬耕洵良策

八擬 存六首

仙

家在青山雲水窟，餌桂餐花忘歲月。誰識壺中別有天，
逍遙三見滄海竭。朝元既罷下雲煙，洞裏閒看綠玉篇。
知有洪崖來博戲，爲呼童子候山前。

僧

古寺鐘聲出林谷，趺坐蒲團閉雙目。一盂到處是生涯，
桑下棲身不三宿。莫道楞伽義最微，得來擲錫向空飛。
散花天女休相試，水月心空不染衣。

鬼

偶得此生同過客，重壤冥冥是真宅。未死常懷千歲憂，
既歸此地知何益。白楊蕭蕭起寒煙，泣霜弔月依荒阡。
形聲已滅渾無用，空費人間送紙錢。

酒徒

一生欲向醉鄉老，沉飲不知暮與早。敲斜兩脚口流涎，
白日常眠往來道。萬事到此俱茫然，但與玉友相周旋。
長鯨吸川真快意，安得時時對酒泉。

美人

夢斷雙鬟垂繡領，嬌姿風怯雲屏冷。臨水無分洛浦神，
對月欲妒姮娥影。妝罷尋春上畫樓，纖纖素手挂簾鈎。
無端望裏生愁思，楊柳青青南陌頭。

狂士

禮法豈爲吾輩設，負才仗氣多凌軼。岸幘長歌獨自如，
一任紛紛笑癡絕。不屑屈指數古人，落落肯與今人親。

捋鬢安知天子貴挽衣誰顧丞相嗔

桐邨詩藁

迂壑詩藁

遣懷二首

吳縣 繆宗侃 友陶

數載悲蓬梗舟車不少停駕濤驚浩瀚陟巘怯高冥
北冰霜白天南草木青炎涼隨地異歷盡髮星星
夙昔饒遊興於今願息機青山通竹徑碧水繞柴扉
倦歸林早魚潛上釣稀幽棲誠足羨此志恐多違

渡海北還中途狂風忽作

落魄歸從瘴海曲萬里茫茫愁滿目雲帆夜挂趁長風
水程却喜舟行速推篷一望浩無津月照波心影深綠
頃刻狂風忽怒號洪濤十丈船幾覆舟人絕叫聲喧逐

斯時生死誰能卜世路風波真可畏何似長飢守茅屋
擘荔

頻年獨上粵城航兩度欣逢荔子香望去皺紅分鶴頂
擘來嫩白似羊肪曾聞摘後勝羣樹共說啖時忘故鄉
莫戀甘滋耽作客洞庭朱橘亦堪嘗

初夏遊海幢寺

扁舟搖曳恣幽尋古寺紅牆隔遠林客久忽驚花盡落
春歸猶喜葉成陰禪心寂寂青山老旅思悠悠碧水深
却喜留題多麗句滿廊斜日獨微吟

寄家書

梅嶺迢迢近海陬好憑雙鯉作書郵杜鵑啼處傳歸思
越燕來時動客愁窮路步兵空悵恨懷鄉開府更淹留
到家猶及重陽日共插茱萸遂勝遊

懷野齋

獨恨離情滿遙知逸興長閒吟望落月高臥到斜陽屢
著青山屐頻浮碧水觴故園多樂事萬里日迴腸

懷嘯園

貧愁堪共侶風雅實吾師縱酒花前夜雄談雨後時詞
壇看掉鞅窮路慣驅馳山水西湖好應多紀勝詩

李九成自長寧抱病歸枉過小酌

客舍如同空谷幽故人相見未消愁稜稜病骨風煙際
渺渺孤踪瘴海頭零落萱花君抱恨彫殘荆樹我懷憂

今朝且共尊前醉羈旅何堪憶舊遊

過梅嶺

遠近千巖翠作堆天涯歸客思難裁
聲聲洞口猿啼急肅肅峰前鴈羽迴
未見梅花全盛日恰逢松影送涼來
嶮巖莫道都經盡更下長江破浪回

南安旅舍題壁

飄泊天涯歎倦遊郵亭驛館任淹留
輕舟如葉無餘物載得歸囊幾斛愁

十八灘

飛流奮迅千堆雪亂石縱橫一局碁
野性自來成懶癖乘危策險信非宜

登滕王閣

飛閣巍巍接斗牛蒼茫煙景望中收
繁華銷歇空相弔文采流傳孰與儔
千片蒲帆隨雪浪一羣白鷺立沙洲
不堪回首重遊地漳水漫漫空亂流

哭大兄

身同離雁已傷神况復招魂在海濱
記得衙齋風雨後夜深猶自說鱸尊

夢中得句醒後續成一絕

浮雲聚散總無常何事離人思易傷
此日飄零休悵望江山無處不家鄉

夜泊即事

薄暮停歸棹鄉心已漸平
晚潮隨雨長漁火隔江明
愁逐尊前盡涼從枕上生
披衣聊獨詠月出正三更

城西春泛分韻二首

畫舸衝波去春光潑眼明
初晴花有態新漲岸隨平
幽客添詩思清尊縱酒情
言歸意未愜殘靄暗層城
迢遞城西路頻年載酒行
雨過山色潤風軟燕身輕
冉冉華年去星星白髮生
重遊如有約願得及春晴

二月十日遊支硎至華山分得春字

飄泊天涯秋復春千巖萬壑恒相親
山川縱美非吾土蒼茫獨立潛悲辛
今日歸來續舊遊故山別久翻成新
煙光照眼春如綺登臨况復多嘉賓
對面遙峰疑結伴多情幽鳥來迎人
禪房小憩竹影碧落日催去還逡巡
人生行樂豈易得却悔碌碌隨風塵

首春過香山書齋

地僻城西一艸堂疎窗曲檻駐春光
庭羅花石閒情遠坐擁詩書舊澤長
愧我一枝何處穩羨君三徑未全荒
叢叢修竹幽居好可許身隨二仲行

分賦春山

曉嵐凝翠自氤氳出谷黃鶯遠近聞
幽澗暖融殘臘雪叢梅香散一峰雲
雨過平嶺茶槍潤風度空巖蕙草薰
直上層巔窮遠眺川原濃綠浩無垠

春色

十里芳菲一望收青郊風景足尋幽遠山杳靄晴如畫
新草芊綿翠欲流簇簇小桃紅雨灑氤氳細柳綠煙浮
黃蜂紫蝶紛相逐惱亂心情可自由

送南岡北上

惜無一尊酒送君成遠行醉後便分手彼此忘離情草
草贈別詩勗君以令名會合難預期衡門寂無聲君看
馬頭雲我看水上萍

芳潤堂讌集分韻送淳夫之長沙

故人忽分散酒酣生悵快長沙路正遙洞庭水方長我
亦浮槎客却惜君獨往渺渺隔湘江從茲結遐想

立春日復集芳潤堂分韻時余同桐邨兄曉谷弟

將之金陵

離筵春月下繾綣一尊中乍惜親朋遠還欣兄弟同青
衫映碧艸高浪趁長風去去重回首行踪類轉蓬

春暮庭桂忽放一枝漫賦

巖桂叢生手自栽一枝也被信風吹似愁玉露沾花冷
却向羣芳鬪豔開寂寂小山招隱歇娟娟明月送香來
如何簾外春光裏已見清秋金碧堆

登穹窿絕頂望震澤

平生愛山水登臨恣遊矚穹窿羣山冠太湖衆流蓄我
來躡危巔曠蕩豁雙目巒氣高逾爽水光遠猶綠煙霧
迷漁艇波濤撼山谷憶昔南海遊疾風浪如屋今茲覩

浩渺令我亂心曲安得學神仙形神謝拘束高山與巨
川登涉時一蹴

九日書懷

風急疎林落葉黃淡雲掃盡碧天涼登山有意誰同侶
載酒無人自舉觴渺渺孤鴻飛遠渚蕭蕭衰鬢帶微霜
閒來步履東籬下點染秋容有晚香

野齋買菊已山尊溪各攜蟹酒小飲花前分韻

攜來黃菊晚香浮有客攜壺興更幽遣悶真須逢錄事
放懷更喜說監州光搖燭影疑花動月到天心似水流
醉繞階除聊索句夜深風露不知秋

重陽後一日夜話次淳夫韻

九日雖過菊滿籬交情冷澹兩心知置身欲入王維畫
卜宅空吟韓愈詩雲篆煙銷心共渺風簾月落夢俱遲
無端忽起悲秋意颯颯涼颼葉墜時

戲疊前韻

結就茅齋未插籬孤懷艸艸竟誰知金多不賣長門賦
風靜先吟破屋詩雲怕澗喧離岫遠鳥嫌木落認巢遲
可堪惆悵憑闌處又值哀鴻獨叫時

晚秋散步四首

秋光欲去小橋西曲徑行來路轉迷爲倩傍人頻指點
纔過竹院又前溪

離披殘菊傍籬開野老辛勤著意栽珍重柴門相送意

明年重約看花來

半池秋水浸芙蓉寂寂蕭蕭落落松祇爲尋詩頻過訪
喜他吟客恰相逢

日落風生興未賒踈踈衰柳有歸鴉依稀不記來時路
獨立橋邊看晚霞

客有不樂者和高青丘韻

客有不樂者對菊慚清幽賓朋雖滿座跼蹐安能酬風
霜向後至我鬢驚先秋孤懷旣耿耿世事徒悠悠悲涼
何處起葉落風難收豪情慕北海高尚思南州誰云志
四方跋涉非良謀白雲空出岫羣鳥苦養羞願守君子
節固窮亦何尤

懷曉谷弟

憶昨江干別蕭條已過秋鄉園應有夢客路與誰遊細
數南來鴈遙思北去舟軟塵高十丈撲面慣經不

擬儲御史田家雜興

適世非所期躬耕乃吾職有蠶可以衣有田可以食衣
食苟無虞此志亦已適同井攜斗酒邀歡在農隙所積
旣有餘救荒非無策豈無鼎食人終身常役役願守畝
畝間優游永朝夕

鬼

如煙如霧依殘骨啾啾獨泣荒邨月鷓鴣夜半伴遊魂
任爾多情間存沒回首繁華是故鄉來時渺渺去茫茫

人生誰是能為主原上楓青野草黃

仙

辭家化作千年鶴歸來惟見舊城郭海水桑田任變更
肯把形神爲塵縛一片春和養絳宮壺中日月殊無窮
北邙新冢纍纍滿何如學我凌青空

迂壑詩橐

在亭詩橐

送方勺湖二首

長洲李果客山

芳春河水漲桃花汧重灘君子有遠行欲發重盤桓念
當千里別送子河之干子行豈得已母老方艱難我無
盈觴酒與子開歡顏白日爲之匿河風爲之寒引領睇
江州匡岳流雲煙吾欲往從之惜哉無羽翰
臨岐豈無言氣結合欬歔惜別奏清歌歌短思有餘譬
彼雙黃鵠毛羽交華敷豈必同林棲歡愛有獨殊一朝
忽分飛何由致區區所嗟道阻長世路多崎嶇君但履
忠信古道能不踰毋爲久留滯高堂方倚閣

雜興

客從津門來遺我雲中書書短不盈尺高懷何鬱紆川
原日以遠音問日以踈與子百年內容易流光徂居者
守蓬蒿行者困泥塗文章配吾道浮榮安所須獨有同
心言金石兩不踰春明賦歸來耦耕南山隅

施覺菴考功園亭雜詠八首

高酣亭

城南致足佳亭高復蕭爽超然一酣吟白雲自來往

釀泉

亭際有古泉涓涓出叢竹秋來釀秫成肯負東籬菊

鶴坡

無心託飛揚幽棲傍池沼引吭偶一鳴重林散清曉

橫秀閣

春草欲連天春山渺何極秀色如美人可望不可即

臨霞軒

名花灼灼紅照水尤旖旎不待穀雨開疑有朱霞起

溢吹池

花落水亦流所動不在水試觀池中魚游泳情何美

東莊書屋

清晨露濯花薄暮鴉歸樹靜者自忘言獨坐得深悟

半舫

泛宅多風濤何如此棲泊吾將抱孤桐揮絃遊溟漠

秋夜

白露零如玉令序邁素商端居豈不樂展轉憂無方木
葉送幽響候蟲鳴我牀起視星河流耿耿秋夜長雖有
蘭蕙質淹忽限秋霜物理固如此陶然盡壺觴所期務
令德千秋以爲光

題觀海詩後

成都費子滋衡爲狼山之遊賦觀海詩八章明
日復登劔山投所著詩文海中張印宣爲詩志
其事余來江都快讀其詩因賦是篇

費子才似海奮筆幹元機見其驚人句直與流俗違海
東秋老鷹風揚觀海直上狼山陽天地奇境入胸臆紅

輪爛爛燒扶桑蓬萊一髮青可數忽思縱體乘風翔長
嘯重賦觀海詩前者十二今八章黃河從天瀉萬里筆
力出入爭低昂天下何人爾知己奇文空抱歌慨慷千
篇盡束沉海底傍人竊笑毋乃狂天風吹散海水動神
鬼夜泣精靈藏龍王來窺歎奇異具宮金闕開大洋海
童張樂帝江舞似獲玉敦明月璫中宵有客乘槎過翻
見霞采流精光此間樂府數張籍以詩紀事和宮商江
城快讀兩君作漏短使我寢食忘由來至文不易覲塵
世瑣碎真粃糠眼前攘攘堪流涕驂龍我擬翹天帝君
才千載人自知只今抑鬱將奚爲買田待我北山北牧
豕飯牛計亦得

贈張丈

最愛西溪叟雙扉獨枕湖潮田春種蛤官柳晚藏烏把
卷忘花豔炊煙每日晡從來高世士多半在菰蘆

出郭

春雲隔浦深何處足幽尋落日古原上獨行榆樹林疎
花開野廟高鳥去遙岑寂寂無相識憑誰喻素心

送朱嘯園之河南

垂楊葉老鶯已稀桃花雨過添新漲江南四月天氣暖
官橋艸綠離歌唱朱君匹馬去中州欲行不行益惆悵
馬頭駢駢高於人萬嶺巒岼起屏障乘興于茲賦奇句
搖筆縱橫絕依傍廣武山邊舊遊處野花斷鏃銷塵塊

龍戰寧徒楚漢年把酒臨風神愈王我有懷賢一片心
登高遙望空悲壯煩君借問古夷門可有侯生爲相訪

南邨六子詩

朱嘯園

朱子老布衣十載王門客詩名重燕臺高論每奪席棹
頭忽南歸愛此池上石榆枌九峰陽悵望空日夕會心
偶觀泉冥搜時讀易忽思宛洛遊驅車復遠適

蔣香山

香山抱孤標畏俗踰塵垢中歲困諸生視之如敝帚豈
無絕世才不如盈尊酒春流入書堂華月明戶牖悠然
賦新詩神韻在韋柳三歎有餘思願言崇所守

金野齋

金君愛結客晚歲乃深痛負氣一何奇抽翰自吟諷四
座爭狂言一語輒驚衆清襟藹天機卓識絕依從洗藥
臨清溪看雲入靈洞側慕南邨風素心每相共

繆桐邨

桐邨曠逸人襟情自澹漠門第本清華抗節愛林壑
几擁瑤編古徑馴白鶴迴溪抱春岸綠楊帶西郭平生
事風雅興至每有託浮榮寧足多人生貴行樂

秦南岡

秦子江城秀奕奕謝時彥嗜古有苦心風騷自貫穿搖
筆成新篇淵雅復矜鍊詞氣凌九州讀者悉稱善頻年

遭軼軻學力乃益見送子去京華馬頭掠雙燕

繆曉谷

繆子瑋麗姿玉樹光曄曄昆仲皆同聲迭唱相和洽抱
才雖未遇博綜奮修業恥爲習俗文獨挾楊馬法秀色
春在花寶劍星出匣誦子補臂篇紫塞風獵獵

題楊安城先生補臂圖

黑水城邊霜木紅黃龍舊府啼玄熊三人者誰笑相顧
鶯翎羶笠行從戎徐生好手工繪事楊左祁右李在中
楊公右臂加李肩蒼茫吐氣凌長虹邊風夜吼鬢髮動
八載相隨夢影同一朝二子歸鄉里旋聞墓草生陰風
楊公剪圖報遺孤因之右袂還江東萬事反覆誰復料

經年臂痛醫難攻乃知二圖不可保無端燬滅隨祝融
夫人剪刀有神力煉石還須用女工取圖裁紙爲補臂
轉盼重彎百石弓圖分圖補雖偶然交道於此觀其終
死生旣殊復異縣幽明孰使精靈通古來朋友貴膠漆
千秋遙問誰如公

題儀真使院樓奉呈大理公二首

同楊耕夫成後山沈柯
亭申迪齋商啓字賦

飛檐四起枕江臯使節星移擁綵旄三面全收深樹綠
一方都讓此樓高春生泱泱流膏澤雨霽雲霄見羽毛
我欲東瞻滄海日中宵吟望不知勞

清蟬流響到書牀不待新秋氣已涼江上雲峰來建業
城陰鹽舶指衡湘龍池霞照魚鱗紫寶塔煙開月色黃

况有錢劉託同調頓令清興欲飛揚

天池

池光疑與天相接拍岸驚濤互擊撞泖港中通包巨壑
河流西折走長江白鹽山積明沙雪朱鳥風行度寶幢
笑擁圖書日憑眺百城南面敞虛窗

送人之邳州

送子臨岐濁酒傾獨騎黠馬渡河行楚州雪霽延年里
淮海風高下相城地勢荒寒稀見雁霸圖寂寞罷談兵
橋邊黃石應知我却望遺祠亦繫情

癸巳正月三日集勺湖東亭效輞川體

隔歲霜草紅開春氣新轉初日照漁梁晴雲動波面

古查帶殘雪疑是鷓鴣堰佇立憺忘歸清吟意何遠

雪霽登郡城望西南諸山

新霽陽景舒殘雪積林杪首春幸暇豫高城此登眺東
風破寒威漸見萌百艸仰望西南山遠近青渺渺雲壑
延秀色靈洞迴窈窕豈無鶴上仙冥棲絕人表吹笙碧
雲裏流響遺縹緲我欲御冷風長跪乞秘寶授以吸景
方顏色得長好胡爲感霸圖千秋迹如掃明發涉江去

幽思空浩浩

時余將
之江都

題顧北郭竹溪圖

猗猗澗邊竹鬱鬱雲中岑雲岑渺何際清風動茂林不
見幽蘭秀改序鳴春禽羲馭不待人一往逝駸駸胡爲

誇名譽日夕憂人心進德欣有適祿利非所任高詠謝
公句淵淵多古音

紅樓

紅樓何處美人家乳燕初飛簾影斜吹徹玉笙明月裏
滿牆開徧碧桃花

奉懷陳使君

三載留京口不知時序更樓高延海月春遠入江城獨
立安艱險孤忠仗 聖明湘潭豈迢遞歸雁正含情

題張蓀九採芝圖

春山龍蔥閔靈異迤邐深谷抱幽致張子偶作采藥行
蹤迹平生此高寄手持長鏡與竹筐穿雲欲劖來高岡

從來大藥不世見其土凝結流芳香肉芝千載色愈潤
天地元氣中秘藏黃精蒼耳安足數朱柯九曲昭煌煌
食之自可永年命下觀雲氣如牛羊噫嘻丈夫生不得
志遊廟廊制禮作樂追虞唐便當長揖赤松子翫弄日
月餐霞光那能卑棲汙塵垢悠悠刺促老一鄉他時我
亦跨黃鶴乘風尋爾商山陽

煩熱溷浴爽甚漫作

入夏始三日氣鬱蒸我廬黃蜂繞舍飛落花委階除觀
變窮太始陰聚陽實舒起坐倦煩燠洗沐披輕襦神明
自澡濯清風來徐徐太潔世所忌斂德寧求譽振衣望
茂林明月生檐隅

貽成後山

簇簇鳴珂地栖栖松竹關背城田帶水委巷屋包山詞
賦工何補風塵老未閒舊時霜劍在沙土蝕成斑

題沈筠谷畫二首

十七攜書劒奇蹤爾最多江盤巴子國驛枕白溝河秋
雪飄藤帽黃塵暗橐駝近聞登岱嶽觀日興如何

磯石憑誰寫輕衫向水渚物情隨處得心事幾人知桐
竹交清響蛾眉入麗辭月明好垂釣想見放鷗鷄

筠谷有美人六

影詩

題沈柯亭觀濤圖

柯亭昔歲來長洲才名籍籍驚同儔一見所作蔡芬序

我心纏綿經幾秋，巷南閉門守迂鈍。敢謂無悶依林丘，誰爲傳詩出囊篋。子獨稱善珍珠球，殷勤遺我尺素書。雙帆相約來邗溝，沙田老農方播穀。轉眼兩見衣棉裘，江城柝聲動中夜。龍潭山色來重樓，乘閒把酒話襟抱。渾忘歲月成淹留，羨子學業得根柢。出入六經恣冥搜，作文淵淵師左國。論詩矯矯推曹劉，學人經世有實用。豈事糟粕誇虛浮，春明邀朋爲寫照。輕衫獨坐林之陬，晴雲千仞截石壁。下有巨壑疑靈湫，波濤沆瀣忽明晦。跳珠濺沫不可收，咫尺圖中具遠勢。文瀾浩瀚差相侔，得非爐峰有此境。雪瀑如練松青虬，相對怡然領真趣。顧視塵俗空煩憂，故園池亭入清夢。卉木鮮濯竹石幽。

芙蓉楊柳遶池尾，平橋小閣當池頭。紫燕黃鶯互交語，鴛鴦對浴眠輕鷗。輞川如畫古有幾，子也樂事亦已優。斯圖寄托豈無意，回遡鹿鹿將焉求。我亦東臯種紅秫，杏花邨落思飯牛。平生養晦有同志，自非知己情安投。明廷求賢望至治，竊恐整駕催鳴騶。

寄吳秋屏江寧

寒月上高樹，江樓江北隅。遙思素心侶，空阻莫愁湖。紅草棲沙雁，南城歸夜烏。無由結清夢，獨立意踟躕。

羊裘

關東皮子蘭州布，細意裁縫穿補勻。豈有奇溫比狐腋，羞將新樣效時人。重樓木落宵聞雁，草舍花寒凍入春。

遠愧桐江嚴處士無勞物色到河濱

登樓

舊時高柳岸又見水痕收澤國星明夜平林霜落秋一
身同旅雁八口隔蘇州貧病關生事登樓何限愁

九日書懷

誰說當歌仗酒杯雖逢佳節轉徘徊野情祇羨漁樵侶
旅食徒煩歲序催故國關河迷去路大江雲樹此登臺
兩年真作揚州夢愁見黃花向我開

在亭詩藁

安詩集

西湖

長洲 陳昂發 淳夫

山環水中央造化巧結束恍如絕世姿獨立圍屏曲倒
映武林城煙火亦不俗柔漾三春風寒注千巖瀑飛潛
樂涵泳疏淪醒者目天收宿雨晴微波漾羅縠桂子與
荷花淫奢漫遭辱清辭鐫湖心爲爾一湔浴

孤山

高人去已邈歎息孤山孤低徊梅鶴迹湛然空明圖北
闕書豈上道難與世疎白雲滿前峰可望不可呼

岳墓

茫茫趙江山滅沒飛過鳥尺土爲君留千古香不了男
兒重聲名身喪一秭秒故物有鐵人魂應泣荒草我來
哭英雄白日同皎皎

靈隱

湖景探已半問人取徑幽選勝最覺場欲窮觀日樓壇
高梵唱遠殿迴風光秋兀突飛來峰刻削神鬼愁寺門
舊名隱吾生終焉求蒲團借佛火鈍根庶自搜

韜光

下方路紆迴竹樹蒙青碧上方勢沆漭江海涵幅尺養
晦君子心韜光果仙國傑句徵古人欲追苦無力候日
依巖棲恍躡鬼怪宅終夜四五興景狀變千百瞥見紅
輪翻波濤際天赤幽險一時消雲雞叫荒白奇境指顧
收目窮意已得會當留絕頂豈戀塵埃謫寄言謝山靈
無爲誚逋客

茅家埠

朝辭北山去挹爽南山隈山僧贈芒屨溪邊重徘徊春
色早二分杏花破紅顛山水不改迹時光易摧頽我欲
借茆店西湖當尊壘坐對兩高峰一飲三百杯

于墳

平生慕高賢遺迹歷搜訂碑捫蘿蘚青墓叫幽荒應仰
公作用宏手挽銀河定及乎復蹕初媒孽已不靖亦冀
格君心讓遵唐虞聖勉節就匪躬豈曰戀政柄剛風動

天來松柏敢爭勁此志卒未伸一死亦甚正遙望白雲
堆志士心炳炳

南屏

路直溪前迴崖連樹橫斷鐘鼓傳南屏佛域奪輪奐淒
涼故王陵寂莫表忠觀叢棘妖狐興白日蒼鼠竄望古
恨遙集策懶足已緩茫然理歸舟又擬入雲漢金碧輝
嵯峨綠染春風岸美景若散珠遊心一以貫興歌浴沂
篇重來足幽伴

過白蓮講寺

散步亭臯興味慵還來蕭寺看寒松青陰寂寂諸緣淨
長得聽他曉暮鐘

壘巢新燕掠幡斜我似行僧未有家一片春光眼前過
寺門風落紫藤花

述懷

啞啞屋上烏搖搖風中木哀哀痛存沒黯黯裂腸腹憶
昔先君子西粵返鄉曲大父屆古稀稱觴羅骨肉門庭
靄春暉鮮花炫綵服一朝天降割早奪吾父祿老幼失
憑依完業頓顛覆持家賴母賢仁義以鞠育霜露何不
仁又奪吾母速中閔復悼亡造化偏我毒譬彼梁棟傾
那保摧折續相倚惟祖孫形影弔乳獨強近鮮期功荒
涼走童僕石田未可耕遺書忍把讀令節當清明紙錢
颺林麓蘋蘩佐無人心香血凝掬孤子蒙艱虞倏忽十

寒燠祖顏日衰顏憂不給水菽有姑在遠方鍾離繼芳
躅扁舟迎老親日進幾糜肉此行雖感激睽離日慘酷
先子侍庭幃孝行極純篤冥冥望曾元養志紹平夙顧
茲不肖軀捫摸多慚恧何當營墓田三棺無露暴鳩杖
復歸來竭力修旨蓄散髮棲巖阿岷岷寄瞻矚誓守清
白傳出處遠恥辱此志儻莫遂此身亦何贖

金星龍尾雙硯歌為香山夫子韞山同學作

天上星精化為石山之英靈水之魄遭逢好事千載前
龍尾深溪斲龍脊炳文堅質清越聲眷子羅紋俱辟易
誰遺一片埋市塵有似賢才受驅迫攜歸豈向媧皇求
研試已消顛米癖珊瑚筆格翡翠牀陸離璀璨增顏色

徑尺本是雙硯材知己分遺無吝惜自古人爭金石交
故將此意感同席夫子聲名時望歸著作有心裨六籍
草玄亭上蘸筆時肯許侯芭為磨墨汪子才華邁少年
得硯寵過百朋錫芸窗早夜砥礪勤手擘雷霆電光激
天生材質必有用顯晦升沉皆置奕顧余師友洵非常
且復長歌互賞擊夜看紅光起燭天寶硯一雙耀奎壁

秋水

直自銀河落茫茫一瀉秋冷偏容鷺宿清似却魚遊紅
葉情何處蒼葭望獨愁未應憐泛泛吾道付滄洲

秋雲

誰道秋雲薄秋雲意自真高寒迷鴈足瑣細感魚鱗色

與楓林變容如水氣勻慣來娛冷眼仍是不親人

秋月

金水含精氣清輝亘一天潭光沉鏡皎桂影落珠圓寒
色蕭蕭下秋心處處懸吾將霜裏影來與鬪嬋娟

秋風

浙瀝度層城蕭騷入耳清輕颺雲漸薄冷逼月逾明已
盡摧殘力何堪激越鳴季鷹真寂寞尊鱸起高情

過澗上草堂有感

門俯清流浸碧苔空山寥落獨低回蕭蕭疎影先生柳
寂寂餘香處士梅歌罷黃農心已死魂歸華表語空哀
夕陽原上留雞犬莫是秦時同避來

苦雨次韻

年年春色來江南遊踪幾徧山僧菴今年緘足同蝟縮
豈是不耐窮幽探入春便有愁入骨慳風澀雨兼而三
苦吟但作冰蘖聲清夢時到梅花龕晚聽鶉鳩鳴轉急
呼出四面雲墨墨平郊無力破頑濕羣山強欲撐虛嵐
惟覺閒庭長生色纖艸寸寸皆柔藍嗟余窮薄萬念息
一似簷溜歸空潭求田問舍計初決較晴量雨真常譚
讀書翻得女媧史補天有術笑未諳還當搔首問蒼帝
急追羲馭同朝叅

清明日

落落來郊外青青入望中一春餘幾日無雨亦多風

寄鵬宗景淳二表弟用東坡韻

我年未三十憂勞涉強半用拙愧無成遇物多感歎何
當就一名聊以自弄玩鳴琴鍾子期鍛鐵嵇中散榻上
萬卷書契若良友伴稽古却近情樂意展昏旦酒酌黃
金壘詞吟青玉案默迴夙昔心如以刀切亂埃垢雖滓
身道義容借盥欲馭追風蹄稍救步塵緩二子聯璧姿
高價豈論貫寧作磨兜堅勿效繞指軟雙劍躍豐城造
化在鑪炭雨餘春艸深蒼翠交空館寄詩明素心不暇
及寒暖長歌儻金聲笑齒定玉粲

夜坐聞笛得五字

高齋燈燼夜漸分忽聽笛聲飛一縷此時想像倚樓人
空房不奈竄靈雨起將幽怨調鷓鴣燕子繞梁螢暗舞
梁州水調遞聲吹吹動閒窗客心苦世閒何乏柯亭材
蔡邕未遇誰辨取風傳清曉落闌干爲數宮商偷按譜
曲罷悠然我更愁城頭錯記更籌五

猛虎行

世無射虎裴將軍哮吼白晝山林昏磨牙吮血勢鹵莽
百獸小伏大竄奔山間豐狐妖且老冀脫虎口祈私恩
日攫狡兔戴在首膝行以獻當虎蹲忍饑滴淚乞性命
虎顧而喜竟莫嗔分肥均瘦反相濟假威乃敢欺麒麟
嗚呼世無裴將軍蕭蕭道路愁行人

刈草

庭隅亂青艸一月每一治芟夷不除本復見芊芊時緬
昔周茂叔偶未暇及茲幾令千載後荒穢將我欺

掃地

餘閒事灑掃一室生虛白惟有陳仲舉頗謂此意窄我
非天下才敝帚猶愛惜不堪黃葉飛滿地秋風迹

燒香

楚江有芳蘭欲採道阻修一縷博山煙香氣襲我幽庶
幾尋丈地時與君子遊誰參鼻觀外無隱理可搜

煎茶

颼颼松孤鳴瑟瑟澗幽咽竹爐湯沸時此景同清絕尋
味在味外隨口亦一啜笑彼玉川生七碗徒饒舌

曬書

吾家五千卷一飽輸蠹魚幾欲賣易牛東郊事畊鋤南
軒理涼曝慨想著作初筆未未忍輟古先豈欺余

浴硯

右軍洗硯池墨花漾千載吾抱頑醜質聊用韜文采閒
時弄清泚腕底煙雲變風字傳當年埋照竟何在

修琴

黃農沒已遠何處尋徽聲壞壁挂枯桐中有太古情重
為葺絃軫和藹意已迎師襄亦不作還學陶淵明

看弈

擾擾局中人終莫定非是王樵何庸愚柯爛復歸里世

事一龍蛇運會或流峙所以東坡翁虧成俱可喜

中秋翫月用徐幼文韻

蕭蕭風翦秋林藍鳥鵲飛起秋林南疎星布碁已落落
纖雲散鬢何氤氳中秋坐翫月初午恍惚人境浮空潭
歎息余生最潦倒隙駒肯爲聊停驂清宵有月即良遇
懽心暫爾冰壺涵獨嫌習氣掃難盡寢食差類書中蟬
滿浮杯酒學李白閒弄短笛追王曇舉頭望月忽長嘯
一丸不異抱繭蠶沉滄溟底浴清冷經崑崙側磨劘甜
奔娥何爲竟盤踞妖蟄枉自常吞含一盈一缺本有數
修合萬戶空整整玉兔搗藥愈荒誕徒令塵世萌貪婪
惟有光輝懸萬古此夜更足窮幽探霓裳羽衣吾不知

瓊樓玉宇誰則諳耳目隋黜雖暴棄奇怪搜抉尤癡憨
惟余好辯亦通病顧影幾愧鬢眉男獨醒豈敢比屈平
漁父可信沾餘酣逃禪亦或羨蘇晉彌勒未見招同龕
雖無子輿三至毀略有叔夜七不堪百計空令寸腸繞
一愁輕著雙眉擔不如守拙用吾道茫茫六合何庸譚
奇材匠石未相遇蘚痕斑駁埋梗楠龍泉壯士復誰在
土花薄蝕銷鋒鐔欲將懷抱訴明月側輪西隋依巖嵌
人生顯晦那可料直須各自求無慚桂香飄來染衫袂
擬摘一朵當頭簪絕憐三十未爲老已見短髮垂鬢髮
南邨詩壇翫事修歐陽屈復中心甘雕肝琢脊鬪平險
出語驚世性所耽呼余步武鼓餘興鞭迫退舍窮逾三

酒菌歌

美祿天造遺雲仍孕育和氣通仙靈傳聞產異在兩巒
芝菌益信無根生醉鄉沉醜濁與清一飲恨不江湖傾
豈許甕缶得暫停故鮮酒菌呈芳馨我及未老糟丘營
保歷歲月更萬莫酒星流注含其精似彼芝卉幻九莖
攬入我口委我形百憂冰解懼雲蒸飲中仙侶齊來朋
兀然而醉恍爾醒酒經挂漏傳虛名

送南岡北上

天寒鴈南飛送子趣北裝臨風振健翮鸞鳳同翱翔所
惜南邨友秋水遙相望青雲路非杳子意何激昂還思
共晨夕素心兩無忘

題李休翁扶杖觀太平圖

白髮垂肩放眼寬漫將心迹寄琅玕隨驢大笑華陽叟
可許圖來一併看

詩徑

匡衡壁間隙青燈藉餘光詩徑實類此得名在文章徑
中頗奇詭窺見非微茫峙爲屈宋壘衛以曹劉墻五言
城旣專一字軍亦張蹈襲余何敢更祈示周行

登穹窿絕頂望震澤

吳山數穹窿太湖枕其傍升高寄遐矚人間淡微茫灣
環五百里沉冥生練光中有數點青渺若浮鴛鴦去天
餘幾尺秋風冷衣裳恍遇秦時僊招我棲雲房蟬蛻塵

土夢舉念週八荒乘槎擬東海偃臥思華陽遊觀定瓌
偉何處非吾鄉可惜古勾吳占此天一方鴟夷竟難返
山水空蒼涼回看一片雲下接煙波長

鄰樹

一種鄰家樹能令病眼開將疑垂五柳欲比蔭三槐春
色頻分到秋聲亦送來我懷霜雪感自覓小松栽

晚秋散步

茅屋疎籬落照邊一灣流水數畦田只輸風景如郊外
烏柏蘆花做晚天

高城爽氣逼秋空半角青山入眼中閒過竹堂無俗韻
白榆樹上鳥呼風

藤挂墻陰雀噪籬園翁栽得菊千枝問渠乞取陶家種
待看明年霜落時

片雲衝斷雁橫飛影過寒塘木葉稀我住郊西當此景
江干獨立每忘歸

自夏涉秋與南邨諸君子過從無間冬夜宿芳潤
堂有作

青青松柏枝磊砢多節目托根並山阿孤高本一族賤
子生艱難與世少逞復瀟灑芳潤堂屢造如我屋主人
洵隱淪萬卷貯便腹慷慨陳古先道義以膏沐敢曰知
我希天生是使獨

素心久既舒不厭頻來集盛夏同追涼庭柯壓露濕轉

盼惜秋深隨葉已戰戰人生志無涯安抵流光急用感
君子傷良玉徒什襲慚余三十年造次未有立

雅懷南邨樂賓客真柴桑寥寥數君子坤六合其章擢
秀如靈芝舉以冠衆芳我願比香艸日夕置汝旁無爲
歎鬱結境遇終何常秋山自出雲雲重埋嵐光秋風逐
雲去巉巉露青蒼

主人忽不樂顧我譚文章去古日已遠誰托一瓣香六
經挈綱領大道如康莊史冊列條貫衆理森開張未學
旣異趨搜抉有別腸聲色亂鄭紫喜新而厭常聖賢道
不熄螢燭難爭光讀君造士詩庶免隨渺茫

花晚香更清山晚色逾翠半生雖坎坷守道匪顛顛莫
驚暫時名翻爲身後累千載不朽人造行有實義嗟哉
競虛浮植立志所自

豈無少年場歡樂鮮與競竊喜從素交高論藥余病今
夕各言歸相對虛窗靜風月警初寒蕭然萬慮屏清影
照孤檠共發五君詠

薦蘿纏高柯亦得雨露施吐花遂凌霄造物豈有私嗟
我同堂友聚散各含悲出者振其翮處者戢羽儀阨窮
無表見聊欲工文辭我信退之語天以昌其詩

曉谷詩橐

分賦春陰

吳縣 繆嗣寅

朝曦

千山斂翠濕雲低春草春江一望迷側側寒輕微著面
濛濛雨細不沾泥煙昏柳岸鶯如夢日暗桑邨鳩自啼
可惜紅香空滿樹不教澹月映花蹊

春日懷嘯園次桐邨二兄韻

交情不可道之子意偏真正值梅花發相思江上人囊
琴空白玉匣劒冷青鱗何處堪投足歸歟尚及春

野齋招遊虎丘適余有事中止頗有愠色戲簡二
絕句

錯嫌俗客負春華竹杖棕屨興自賒今日風光正潭沲
煩君重試泛溪艤

曾問梅花邨裏人漫山已放十分春無窮詩思飛騰甚
要借清香入句新

二月十日野齋招諸同人遊支硎至華山

竹扛兜子紛相逐共指西山舊遊熟綠溪楊柳青不斷
山脚杏花時一簇飛泉處處入清聽怪石纍纍煩記錄
叩門時愛香阜靜憩樹每戀松陰綠未愁足力疲屢試
但恐落日催歸速儘收巖壑入新詩還將姓氏鐫修竹
庚寅冬與香山有洞庭探梅之約不果賦此解嘲
平生愛花兼愛山籃輿桂棹往復還姓名久被山靈識

魂夢時到梅花閒看花鄧尉歷數載壯觀欲入梅花海
梅花海在洞庭西春風二月花初齊千巖萬壑布晴雪
冷香如霧遊人迷香山蔣子有同好隔歲已訂看花期
太湖三萬六千頃欲挂片席乘風飛飄然身入萬香國
橫峰側嶺相攀躋君今裹足志空壯我亦蹉跎願未償
坐對花開復花落青山寂寞花惆悵閒身本似不羈鶴
好製松冠辦芒屨祇今已是負花時明年更與西山約

訪範圍

已見湖波泛夕暉暫停雙槳欵荆扉外甥最小能留客
直問來期始放歸

春社詞

沽清酒宰肥羊東鄰西舍家家忙三閭古廟遮綠楊前
邨擊鼓迎神至後邨婦女遙相望齊入廟中拜且祝還
向神前分祭肉

養蠶詞

蠶初生采桑陌上提筐行蠶欲老夜半不眠起常早衣
不暇浣髮不簪還恐天陰壞我蠶回頭分付小兒女蠶
欲上山莫言語

采茶詞

采茶采茶山之曲正值前山新雨足采茶采茶山之陽
采得新芽不滿筐同伴三三復五五踏徧危巖與深塢
一春生計在山中儂家那得辭辛苦

賣花詞

擔花入市春初曉露條煙蕊栽來好蝴蝶遊蜂著意防
飛來強把花鬚抱賣時不惜擔頭春明日重添一擔新

題友人小像

短鋤白竹筐持向青山道借問君何之山中有瑞草他
日一相逢看君顏色好

題楊安城補臂圖

北風捲地飛沙亂漠漠黃雲天一半屹然獨坐塞草白
俠氣猶存臂中斷昔年割圖臂已分異時臂痛因圖焚
剪紙補圖痛亦止咄哉奇事何曾聞展圖有餘慕感激
生天真結交不在貌結交貴結神千載而下乃有此三

人嗚呼安城之圖示千古祁李二人不可補

送南岡北上

我本南邨人平生寡西笑與君爲同心相期事耕釣十年守衡茅離合事誰料孟冬朔風寒送子陟遠道匹馬雪中行獨雁天邊叫子意不復留我愁詎能療臨岐進一觴努力在年少

喜施蘭垞至

濕雲不可掃沉憂不可釋何意雨聲中偏來故人屐故人別已久示我新詩百一讀清我心再讀動我魄金子賢主人明燈留遠客開尊酌澄醪談笑永今夕昔別荷未花今來梅正坼隔歲一相逢時分真可惜願君緩歸

程紆我離懷積

再用前韻答蘭垞留別之作

朋好無久新一遇情難釋况君英妙才頻來駐遊屐唱酬發殊音落紙累千百曉吟日斂照晚酌月頽魄忽然理行艫歸作滄海客挂席在明朝離憂已今夕仰視愁雲重迷漫不可坼來期詎云杳分手能無惜非不欲君留如君歸思積

次韻答蘭垞

獨挂孤帆海畔來吟懷忽地爲君開行囊纔解求詩卷野藪頻添泥酒杯日暮微風衝雨斷漏深斜月逆雲迴一宵清話知何盡幾度燒殘蠟燭灰

再次前韻送蘭垞歸海寧

知君本爲討春來又逐春風挾柁開夾岸冥濛花作幔
半湖淡沲水平杯揮將醉墨千行在換得狂歌一曲迴
惆悵肩吾歸去後寒爐誰共撥吟灰

虎丘追和清遠道士詩次本韻

天風捲浮雲白日挂霄漢連晨晦陰霖及茲雨工竄青
山貌忽開光景入幽翫高興旣飛騰良遊真汗漫踏石
屢欲穿迎風幘已岸都忘霸氣銷但愛煙光亂古刹耀
金碧巍巍壓山半忽逢梅花飛疑是天女散壁峭詎可
梯壑陰不知旦身輕恣登歷如鳥生兩翰討異愜微情
懷古一長歎千秋白雲句妙境誰能讚

貪看

貪看楊柳色不知清溪長溪流清且淺隔岸春蔬香茅
屋三四間結構清溪傍思從漢陰叟談笑追羲皇

借花歌和香山

幽蘭一簇花哈呀叢叢碧葉紛交加閨房馥郁花氣靜
知君借自良朋家何曾栽培與灌溉且得含咀清英華
借花逸事自伊始作歌示我何矜誇令儂早悟達士旨
人世茫茫皆借耳一年三百六十日看花幾見常芳美
種花借花一而已吾聞深山之曲大澤之隈叢蘭處處
逢春開何不往借青山一片石翛然身坐香雲堆日挹
花香飲花露有時花盡還歸來狂言忽發君應哈

三月十四夜步月二首

深巷千家寂清光一片飛我行無定所形影鎮相依綠
樹泣如濕春星暗不輝殷勤今夜月得得送人歸
再踏平橋月泠泠芒屨邊光隨四野闊影落一池圓虛
籟生中夜踈峰出遠天縱然秋夕好能得幾嬋娟

猛虎行

崔嵬南山巔颯颯生悲風君不見猛虎磨牙若霜雪盤
踞崖壁張雙瞳公然白日肆出沒殺人吮血深林中奔
騰裂厚地長嘯摧高峰艸間狐兔不知數紛紛化作豺
狼凶騶虞忽來衆相賀猛虎猙獰當路坐揚沙走石勢
欲吞側足荒谿不得過匣中長劍雪三尺欲往千山萬

山隔以手撫膺空歎息空歎息發長謠曲終仰望蒼天
高

舟行即目步家叔韻三首

春殘隄樹綠初齊打槳行過西郭西夾路野花猶爛漫
蜜蜂飛撲水窗低

黃土低墻白竹門賽神筵上列雞豚短簫徐和迎神曲
奔走兒童喧近邨

溪女科頭不趁姿手淘脫粟作新炊深林無數人煙起
正是前山落照時

雨

雲脚方垂墨義車未駕輪誰知三日雨消却一分春簷

溜何時絕啼鳩亦太頻攤書仍掩卷不復辨昏晨

晚霽

已分昏黃候俄驚未夕暉斷雲消不盡殘雨歇還飛風
靜花猶落天清鳥漸歸料應今夜月依舊到柴扉

又雨

纔對高春日生憎少女風瓦溝仍滴滴石砌復淙淙響
急清宵裏聲迷春夢中愁心花藥徑褪盡幾多紅

晴

翻因積雨後頓使興飛揚呼婦鳩聲變穿花蝶意忙清
陰思柳岸新漲想春塘爲報尋幽侶奚囊試一將

瓦松

底事亦名松青青簷瓦中根微依薄土幹弱信斜風暫
借陰霖長應愁旭日烘無端數寸艸高却百花叢

無奈

無奈春雨何颯颯欺我屋忽驚飄碎瓦復駭墮長木層
陰不肯收坐久斷猶續泛濫庭中池琤琮簷際瀑此屋
朴而古平生寄幽獨月分四壁清日散一窗旭朝出看
山去暮還此中宿居此頗有年一朝懼傾覆人生戀舊
土悄然亂心曲

題蘭垞戴笠圖

海昌才子相羊君蘭垞自號頭戴圓笠如車輪兀然獨立傲
一世世上冠蓋徒紛紛君不見謝家製笠有新樣曲柄

雅稱風流人綸巾紗帽不足比直堪遮斷塵區塵緣山
濱水十畝閒杏花歷亂春深天此笠可以蔽風日願君
戴此鋤春煙黃蘆蕭蕭滿秋浦獨鶴叫空鷗刷羽願君
戴此操漁舟不怕溪風與溪雨生平我亦薄輕肥戴笠
乘車事已非與君同謝浮名去還剪青蓑織雨衣

壽侯鳳阿七十

卓哉生民秀祖德追夙昔舉世挹清芬空山滅遐迹竭
來七十載老臥泉與石始知煙霞中可以鍊精魄顧慚
塵世姿緬懷隱淪客思從白雲遊酌君以瓊液

送嘯園之中州分得雲字

洛陽風土吾所悉憶昔清夜聞之君爲言曾作洛陽客
古道千里迷塵氛驛亭荒絕不可宿邨醜濁甚難爲醺
振衣獨謁古帝廟長歌時弔前王墳當年壯遊逾十載
不覺素髮飄紛紛如何復往繼遊迹胸春令我傷乖分
渚煙溪月誰共賞冷吟閒醉愁無羣相思日望歸驂至
幾時重踏吳山雲

次韻答客山見贈之作

昔賢去已邈文采炳曄曄君抱曠世才千載乃相洽妙
論開愚矇洪鐘響虞業香名旣共欽峻行况可法繫予
棄豪素硯廢塵生匣仰慚仙李枝玉花披狎獵

昔歲

昔歲挈輕舟言尋勾漏道湖平浩渺瀾林密深窳窳廣

陌滅行蹤暮天掩頰照松頂清暉流宿鷺千羣叫遊子
忘前途榜人緩移棹竭來三載餘歷歷記清妙如何穢
塵踪撫躬空自悼終當理行條往覓丹砂要

正月一日集芳潤堂送淳夫之長沙

隔歲雪未消餘光映離筵故人曠襟抱道里輕數千遙
指長沙路思乘洞庭船洞庭渺何許派與湘江連長川
絕飛鳥高浪梯遠天扁舟落君手塵慮快一湔送君還
羨君無事心悁悁

和野齋客致慧山泉一舟喜而賦詩

余本絕俗人久結山泉想慧山百里遙挂席時一往兩
年守荆扉中心常怏怏誰歟忽致此一啜塵慮盪心飛
白雲閒身落青崖上滿目雪瀑驚入耳空巖響此中有
真趣何事羈塵網已辦青行纏駕言試兩槩往掬清淺
流期君共相賞

立春日集芳潤堂分韻時余將之金陵

月色一番新春盤夜酒清暫時辭舊侶未肯戀浮名水
換長江綠風生片席輕雖無千里隔已重別離情

將遊京師留別桐邨迂壑兩兄

夏木何陰陰枝葉相重迭如何骨肉閒翻作千里別遠
行未有期愁心久如結相見情依依相對語切切赤日
施炎威可喻中腸熱

留別野齋

玄豹隱南山欲以澤其身獨鶴萬里飛不受人世塵行
藏縱殊軌高潔亦同倫臨風振羽翼欲去仍逡巡青松
有故巢終願相依因

留別諸同學

忽辭故山去却動征車輪依依向儔匹欲別增悲辛贈
言以相勗毋忘同昏晨幽燕非所戀終共煙霞親長揖
謝吾友余豈塵埃人

曉谷詩藁

余甥繆朝曦年少才雋為人長身玉立弱不勝衣其詩
得力漢魏造語雅馴丰骨峭刻初不矜才使氣而別有
妙悟殆所謂文如其人者歟向刻曉谷詩稿一卷久傳
誦人口茲復集其近詩凡若干首就正於余大抵湖山
遊覽之作居多余自愧三十年來風塵蓬勃潦倒名場
才情漸減行將扁舟南下買田太湖之濱與田夫野老
歌詠太平手朝曦是編而故鄉之思更躍躍欲動矣因
勸之剗劂而題其卷端如此康熙甲午新正晚翠閣主
人顧嗣立

國



